

မာကု

မာကု ရေးဟူးဟူ ခရစ်တော်ရဲ့ ဒန်းကောန်း နိဒါန်း

မာကု ရေးဟူးဟူ ခရစ်တော်ရဲ့ ဒန်းကောန်းဟာ ဓမ္မသစ် ကျမ်းထဲမှာ ယေရှုခရစ်တော်ရဲ့ သတ်တော်စဉ်ဟို့ ဖော်ပြ ဟူးဟူကျမ်း လေးစောန်ထဲဟု တစောန်ဖြစ်ဟယ်။ အယ် ကျမ်းတစောန်စီဟို့ “ဧဝဂေလိ” ဆိုဘီး ခေါ်ဟယ် “ဒန်း ကောန်း” ဆိုဘီး ဓိပါယ်ရဟယ်။ ယေရှု သေဟူးဘီးန အယ်ကျမ်းလေဟို့ မသဲ၊ မာကု၊ လုကာန ယောဟန်ဟု ရေးဟူးဟယ်။ မာကုရေးဟူးဟူ ဧဝဂေလိကျမ်းဟာ ဧ ဝဂေလိ လေးစောန်ထဲမှာ တိုဆောင်းဖြစ်ဟယ်။ ဧဝဂေ လိကျမ်း ဂူလောင်းရဲ့ ဦးဆောင်းဖြစ်ဟူ အယ်ကျမ်းဟာ ခရစ်တော် မွီးဘီးန ၆၅-၇၀ ခုနှစ်ကြားမှာ ရေးဟူးဟယ် ဆိုဘီး ယောင်ကြည်ဟူးဂေဟယ်။ အယ်ကျမ်းဟာ ရောမ ခရစ်ယာန်လေဟို့ အားပေးဟို့ ရည်ရွယ်ချစ်န ရောမမြို့မှာ ရေးဟူးဟယ် ဆိုဘီး ကျမ်းစာပညာရှင်လေဟု ယောင် ကြည်ဂေဟယ်။

ယောဟန်မာကု ဆိုဘီးလည်း ထန်ပေါ်ဟူ မာကုဟာ တမန်တော် ပေါလုန ဗာနဗရဲ့ ပေါန်းဖော် တယော့-က်

ဖြစ်ဘေမဲ့ သူဟာ သူးနှိရဲ့ သာသနာခရီးစဉ်ဟို့ စွန့်ပစ်
လိုက်ဟူ ခီမာ သူရဲ့ ဂေါင်သိကုဆာဟို့ ထိခိုက်လေဟယ်
(တ ၁၃.၁၃)။ နှော-က်တခါ မာကုဟာ ဗာနဗန ပုလန်ဘီး
ခရီးသွားလေဟယ် (တ ၁၅.၃၇-၃၉)။ မာကုဟာ ပေတရု
ရဲ့ ရရာတိုင်းခင်ဟူ ငယ်ဂျင်းဖြစ်လည်း သိမှတ်ဂေဟယ်
(၁ ပေ ၅.၁၃)။ မာကုဟာ ယေရှုရဲ့ သတ်တော်စဉ်ဟို့ မျစ်
မြင်တယော့-က် မှုဘေမဲ့လည်း ပေတရုရဲ့ သတ်သေလေ
ဘောင်ဂီးဟို့ မှတ်တမ်းတန်ဟားဟယ် ဆိုဘီး ကျမ်းစာ
ပညာရှင်လေဟာ ယောင်ကြည်ဂေဘီး အယ်ဇာဟာ မာကု
ရေးဟားဟူ ဧဝံဂေလိတွပ် ခြေခံဖြစ်ဟယ်။ အယ်ကျမ်း
ထဲမာ မာကုဟာ တမဲ့တော်ဖြစ်ဇာန နှော-က်ဆောင်းခီမာ
ယေရှုရဲ့ သွန်သန်ဇာဟို့ လေးပေးဘီး ဖော်ပြဟယ်။

ကြောန်းရာ ကျဉ်းချောက်

- ၁။ မာကုဟာ အယ်ကျမ်းဟို့ နိဒါန်းပျိုးဟယ် (၁.၁-၁၃)
- ၂။ မာကုဟာ ဂါလိလဲပြည်မာ ယေရှုရှိနေဒူး သူရဲ့
သာသနာလောက်ငန်းဟို့ ဖော်ပြဟယ် (၁.၁၄-၈.၂၁)
- ၃။ နှော-က်ဘီးဟာ သူဟာ ယေရှုရှလင်မြို့ဟို့ ယေရှုရဲ့
ခရီးစဉ်န ပတ်သတ်ဘီး ပြောဟယ် (၈.၂၂-၁၀.၅၂)
- ၄။ မာကုဟာ ယေရှုရှလင်မြို့မာ ယေရှုရဲ့ သေရှင်းန ရှင်
ပုလန်ထမြော့-က်ရှင်း ပါဝမ်ဟူ သူရဲ့ ခီကြောန်း
ဟို့ ရေးသားချစ်န ဆောင်းသတ်ဟားဟယ် (၁၁.၁-
၁၆.၈)

ဗတုတိဇိယောဟန်ရဲ့ ဟောပြောရှင်း

(မဿဲ ၃.၁-၁၂; လုကာ ၃.၁-၁၈; ယောဟန် ၁.၁၉-၂၈)

¹ ဘုရားသခင်ရဲ့ သားတော်* ယေရှုခရစ်တော်ကြောန်း
ဒန်းကောန်းဟာ အယ်မျိုးဖြစ်ဟယ်။

² ပရောဖက်ဟေရှာယ ရေးဟူးဟူဇာဟု၊

“ဘုရားသခင်ဟု ပြောဟူးဟယ်။

‘ငါဟာ နန်းရဲ့လမ်းဟို့ ပြင်ဆင်ဟို့တွပ် ငါ့ရဲ့တမန်ဟို့
နန်းရှေ့မာ စေလွှတ်မယ်။’

³ တောကန္တာရထဲမာ ယော့-က်ယော့-က်ဟု အော်ပြောနေ
ဇာဟု

‘ဘုရားသခင်ရဲ့ လမ်းဟို့ ပြင်ဆင်ဟူးဂေ့!

အယ်သခင်တွပ် ပြောန့်တန်းဟူလမ်းဟို့ လောက်ဟူး
ဂေ့!’”

⁴ ယောဟန်ဟာ ပေါ်လာဘီး၊ တောကန္တာရမာ ဟောပြော
ဘီးန ဗတုတိဇိပေးနေဟယ်။† “နောန်ဒရဘီး ဗတုတိဇိခံ
ဂေ့။ အယ်ဆိုဟာ ဘုရားသခင်ဟု နန်းနို့ရဲ့ ပြစ်လေဟို့ ခွ
မ့်လွှတ်လေမယ်” ဆိုဘီး ကြေညာဟယ်။

⁵ ယုဒပြည်ဟု လူလေန ယေရုရှလင်မြို့ရဲ့လူလေ ဂူ
လောင်းဟာ ယောဟန်နားဟို့ ရော့-က်လာဂေ့ဘီး သူးနို့ရဲ့

* **1:1 ၁.၁** တချို့ မူရင်းလတ်ရေးမူလေမာ ဘုရားသခင်ရဲ့ သားတော်၊
ဆိုဇာဟု မှေးဟု။ † **1:4 ၁.၄** ယောဟန်ဟာ ပေါ်လာဘီး၊ တောကန္တာရမာ
ဟောပြောဘီးန ဗတုတိဇိပေးနေဟယ်။ တချို့ မူရင်းလတ်ရေးမူလေမာ
ဗတုတိဇိယောဟန်ဟာ ပေါ်လာဘီး တောကန္တာရထဲမာ ဟောပြောနေဟယ်၊
ဆိုဘီး ပါရှိဟယ်။

ပြစ်လေဟို ဝန်ခံဂေဟူကြောန့် ယော်ဒန်မှလစ်မာ ယောဟန်အားဖြင့် ဗတုတိဇံခံဂေဟယ်။

⁶ ယောဟန်ဟာ ကုလားအုတ်ရဲ့ မွီးန လောက်ဟားဟူ ဝတ်န သားရေခါးဗတ်ဟို ခါးမာပတ်ဟားဘီး ကျိုင်းကောန်န တောပျားရယ်ဟို စားလေဟယ်။

⁷ သူဟာ လူလေဟို ကြေညာဇာဟု “ငါ့ထတ် ပိုဘီး ကီး မြတ်ဟူလူဟာ ငါ့နော့-က်ဟု ကြွလာလေ့မယ်။ ငါဟာ ငေါက်ဘီးဟာ သူ့ရဲ့ ခေနပ်ကြိုးဟို ဖြေဟို့ဟို့မှ ထိုက်ဟု။

⁸ ငါဟု နန်းနိုလေဟို ရေန ဗတုတိဇံပေးဟယ်။ အယ်ဘေမဲ့ သူဟု နန်းနိုဟို သန်ရှင်းဟူဝံညာဉ်တော်န ဗတုတိဇံပေးလေ့မယ်။”

ယေရှုရဲ့ ဗတုတိဇံမင်္ဂလာန စောန်ဇမ်းသွီးဆောန် ခံဟူကြောန်း

(မသေ ၃.၁၃-၄.၁၁; လုကာ ၃.၂၁-၂၂; ၄.၁-၁၃)

⁹ အယ်ခီမာ ယေရှုဟု ဂါလိလဲပြည် နာဇရက်မြို့ဟု လာဘီးဟာ ယော်ဒန်မှလစ်မာ ယောဟန်အားဖြင့် ဗတုတိဇံလေဟယ်။

¹⁰ ယေရှုဟာ ရေထဲဟုထလိုက်ဟူန ကောန်းဂန်ဘောင် ပွမ့်ဟားဘီး ဝံညာဉ်တော်ဟု ချိုးငှတ်မျိုး ကိုယ်တော်ထတ်ဟို ဆင်းလာနေဇာဟို မြင်လေဟယ်။

¹¹ “နန်ဟာ ငါနှစ်သက်မြတ်နိုးဟူ ငါ့ရဲ့ ရှစ်ရဟူသား ဖြစ်ဟယ်” ဆိုဘီး ကောန်းဂန်ဟုနေ သံတော်ထွပ်ပေါ်လာဟု

ယ်။

¹² ဝိညာဉ်တော်ဟု ကိုယ်တော့်ဟို့ တောကန္တာရထဲဟို့ ရှစ်ရှင်းပို့ဆောက်ဘီး

¹³ ကိုယ်တော်ဟု တောကန္တာရထဲမှာ ရစ်လေးဆယ်လောင်းလောင်း နေဘီး စာတန်ရဲ့ စောင်ဇမ်းသွီးဆောက်ရှင်းဟို့ ခံတော်မူဟယ်။ ကိုယ်တော်ဟု သားရဲလေနတူးဒူ ရှိတော်မူဘီး ကောင်းဂန်တမန်လေဟု ကိုယ်တော့်ဟို့ လောက်ကျွေးဂေဟယ်။

ယေရှုဟု ငါးဖမ်းမားလေးယော့-က်ဟို့ ခေါ်ဟူကြောင်း

(မသံ ၄.၁၂-၂၂; လုကာ ၄.၁၄,၁၅; ၅.၁-၁၁)

¹⁴ ယောဟန် ထောန်ခလခံရဘီးန ယေရှုဟု ဂါလိလဲပြည်ဟို့ သွားဘီး ဘုရားသခင်ရဲ့ ဒန်းကောင်းဟို့ ကြေညာလေဟယ်။

¹⁵ “ခီပုလဲဇောင်ဟားဘီ ဘုရားသခင်ရဲ့ နိုင်ငံတော်ဟု တည်ခါနီးနေဘီ! နှောန်ဒရဘီးဟု ဒန်းကောင်းဟို့ ယောင်ကြည်ဂေပါ!” ဆိုဘီး မိန့်တော်မူလေဟယ်။

¹⁶ ယေရှုဟု ဂါလိလဲအိုင်ဘေးမှာ ရှော့-က်သွားနေဒူးမာ ငါးဖမ်းမားလေဖြစ်ဟူ ရှိမုန်န သူ့ညီ အနုဒြေလေဟု အိုင်ထဲမှာ ပိုက်ကွန်ပစ်နေဇာဟို့ မြင်လေဟယ်။

17 ယေရှုဟု “ငါ့နှော့-က်လိုက်ဂေ။ နန်းနို့လေဟို လူလေ
ဟိုဖမ်းဟူ ငါးဖမ်းမားဖြစ်စေမယ်” ဆိုဘီး မိန့်တော်မူလေ
ဟယ်။

18 သူးနို့လေဟု ရှစ်ရှင်းဘဲ ပိုက်လေဟို ထားရစ်ဘီးန
နှော့-က်ဟို လိုက်ဂေဟယ်။

19 ကိုယ်တော်ဟာ နဲနဲဆစ်ဘီးသွားဟူ ခီမာ ဇေဗေဒဲရဲ့
သား ယာကုပ်န သူညီယောဟန်ဟို မြင်ဟားဟယ်။ သူးနို့
ဟာ လေ့ထဲမာ ပိုက်ကွန်လေ ဖာနေဂေဟယ်။

20 ယေရှုဟု သူးနို့လေဟို ရှစ်ရှင်းခေါ်လိုက်ဟယ်။ သူးနို့
လေဟာ သူးနို့ဖ ဇေဗေဒဲဟို လူငှားလေနတူးဒု လေ့ထတ်
မာ ထားရစ်ဘီးဟာ ယေရှုနှော့-က်ဟို လိုက်ဟားဂေဟ
ယ်။

ညစ်ညူးဟူနတ် ဝမ်ပူးနေဟူ လူတယော့-က်ကြောင်း
(လုကာ ၄:၃၁-၃၇)

21 ယေရှုန တမဲ့တော်လေဟာ ကပေရနောင်မြို့ဟို ဝမ်
ဂေဘီး ဒန်းနေမာ ယေရှုဟာ ဝါလယ်ဇရပ်ထဲဟို ဝမ်ဟား
ဘီးဟာ စဘီးသွန်သန်လေဟယ်။

22 လူလေဟာ ကိုယ်တော်ရဲ့ သွန်သန်ဇာဟို အံ့သြဂေ
ဟယ်။ ဖြားဖြစ်ကြောနဲ့ဆိုဟာ ကိုယ်တော်ဟာ သူးနို့ဟို
ကျမ်းတတ်ဆရာလေမျိုး မှဘဲန ခွမ့်အာဏာရှိဟူသူမျိုး
သွန်သန်ဟူကြောန့် ဖြစ်ဟယ်။

²³ အယ်ဒီမာဘဲ ညစ်ညူးဟူနတ် ဝမ်ပူးနေဟူ လူတယော့-က်ဟာ ဝါလယ်ဇရပ်ထဲဟို့ ဝမ်လာဘီးဟာ အော်နေဇာဟို့

²⁴ “နာဇရက်မြို့သား ယေရှု၊ ကိုယ်တော်ဟု ကျွန်တော့်လေန ဖြားဆိုင်ဟယ်နူး။ ကျွန်တော့်လေဟို့ ဖျစ်ဆီးဟို့တွပ်ရော့-က်လာဇာလော။ ကိုယ်တော်ဟု ဖယ်သူဖြစ်ဟယ်ဆိုဇာ ကျွန်တော်သိဟယ်။ ကိုယ်တော်ဟု ဘုရားသခင်ရဲ့ သန်ရှင်းဟူသူ ဖြစ်ဟယ်!”

²⁵ ယေရှုဟာ အယ်နတ်ဟို့ “တိတိဟားနေဘီး အယ်လူထဲဟု ထွပ်ဟားဂေ့!” ဆိုဘီး ဆောင်းမလေဟယ်။

²⁶ ညစ်ညူးဟူနတ်ဟု အယ်လူဟို့ ရရာတိုင်း တတ်စေဘီး သံကုလယ်ဂီး အော်ဘီးဟာ ထွပ်ဟားလေဟယ်။

²⁷ လူလေ ဂူလောင်းဟု အံ့ဩဟားဂေ့ဘီး “အယ်ဇာဟု ဖယ်မျိုးနူး။ အယ်ဇာဟု သွန်သန်မှု သစ်တမျိုးလော။ အယ်လူဟာ ညစ်ညူးဟူနတ်လေဟို့ ခွမ့်အာဏာန မိန့်ပေးလိုက်ဇာ သူးနို့ဟာ နာခံဂေ့ဟယ်!” ဆိုဘီး ရှင်းရှင်းမေးနေဂေ့ဟယ်။

²⁸ အယ်ကြောန့် ယေရှုရဲ့ ဒန်းဟာ ဂါလိလဲပြည် တခုလောင်းဟို့ ရှစ်ရှင်း ပုလန်နို့ဟားလေဟယ်။

ယေရှုဟာ လူလေဘောင်ဂီးဟို့ ကျန်းမာစေဟူကြောင်း
(မဿဲ ၈.၁၄-၁၇; လုကာ ၄.၃၈-၄၁)

29 ယေရှုန တမဲ့တော်လေဟာ ဝါလယ်ဇရပ်ဟုနေ ထွပ်ဟူးဘီး ရှစ်ရှင်းဘဲ၊ ယာကုပ်၊ ယောဟန်နတူးဒူး ရှိမုန်န အနုဒြေရဲ့အိဟို့ သွားဂေ့ဟယ်။

30 ရှိမုန်ရဲ့ ယောကုခမဟာ ဖျားနာဘီး အိယာထတ်မာ လဲ့နေကြောင်းဟို့ ယေရှုဟို့ ရှစ်ရှင်း တောင်းလျှောက်လေဟယ်။

31 အယ်ကြောန့် ကိုယ်တော်ဟာ အယ်မီးမနားဟို့ သွားဘီးဟာ သူရဲ့လတ်ဟို့ ကိုင်ဘီး ဆွဲဒန်လိုက်ဟယ်။ သူဟာ ဖျားနာပျော့-က်ဟူးကြောန့် သူးနို့ဟို့ ဧည့်ဝတ်ပြုလေဟယ်။

32 နေဝမ်ဟူးဘီး ညဉ့်ခန်းဇာရော့-က်ဟူးခီမာ လူလေဟာ ဖျားနာသူလေန နတ်ဆိုးဝမ်ပူးသူလေ ဂူလောင်းဟို့ ယေရှုနားဟို့ ခေါ်လာဂေ့ဟယ်။

33 တမြို့လောင်းဟာ ခွဗော့-က်ဝမာ စုဝီးလာဂေ့ဟယ်။

34 ယေရှုဟာ ရောဂါဘောင်းဇောင်ရှိဟူ လူလေဘောင်ဂီးဟို့ ကျန်းမာစေဘီး နတ်ဆိုးဘောင်ဂီးဟို့ နှန်ထုဟယ်။ နတ်ဆိုးလေဟာ ကိုယ်တော့်ဟို့ သိဂေ့ဟူကြောန့် သူးနို့ဟို့ စကားပြောခွဲမဲ့ပေးဟယ်။

ယေရှုဟာ ဂါလိလဲပြည်မာ ဟောပြောဟူကြောင်း
(လုကာ ၄:၄၂-၄၄)

35 မိုးလန်းခန် စောစောဂီးမာ ယေရှုဟာ အိယာဟုထဘီးဟာ အိဟုထွပ်ဟူးဟယ်။ ကိုယ်တော်ဟာ မြို့ထဲဟုနေ လူ

မေ့သူမေ့ဘဲဟူ နေရာဟို့ ထွပ်ဟားဘီးဟာ ဆုတောင်းလေဟယ်။

³⁶ ရှိမှန်န သူရဲ့ ပေါင်းဖော်လေဟာ ကိုယ်တော့်ဟို့ လိုက်ရှာဂေဘီး

³⁷ ကိုယ်တော့်ဟို့ တွံဂေဟူ ခီမာ “လူတိုင်းဟာ ကိုယ်တော့်ဟို့ လိုက်ရှာနေဂေဟယ်” ဆိုဘီး လျှော့-က်ဂေဟယ်။

³⁸ ယေရှုဟ “နို့လေဟာ နီးနားမာရှိဟူ တခြား ဗြို့ဝါလေဟို့ သွားရမယ်။ ငါဟ သူးနို့ဟို့လည်း ဟောပြောရအူးမယ်။ ဖြားဖြစ်ကြောန့်နူးဆိုဟာ ငါဟာ အယ်တွပ်ဘဲကြွလာဟယ်” ဆိုဘီး မိန့်တော်မူလေဟယ်။

³⁹ အယ်ကြောန့် ကိုယ်တော်ဟာ ဂါလိလဲပြည် တပြည်လောင်းဟို့ ကြွတော်မူဘီး ဝါလယ်ဇရပ်လေမာ ဟောပြောဘီးဟာ နတ်ဆိုးလေဟို့ နှန်ထုလေဟယ်။

ယေရှုဟာ လူတယော့-က်ဟို့ ကျန်းမာစေဟူကြောင်း
(မသဲ ၈.၁-၄; လုကာ ၅.၁၂-၁၆)

⁴⁰ နူနာသယ် တယော့-က်ဟာ ယေရှုနားဟို့ ရော့-က်လာဟူ ခီမာ ဒူးထော့-က်ဘီးဟာ “ကိုယ်တော်လိုရှိဟယ် ဆိုဟာ ကျွန်တော့်ဟို့ သန်ရှင်းပေးပါ”[‡] ဆိုဘီး တောင်းဗန်လေဟယ်။

1:39 ၁.၃၉ မ ၄.၂၃; ၉.၃၅ **‡ 1:40 ၁.၄၀ ကျွန်တော့်ဟို့ သန်ရှင်းပေးပါ။**
အယ်ရောဂါဟာ လူတယော့-က်ဟို့ သန်ရှင်းဘဲအောန် လောက်ဟားဟယ်။

41 ယေရှုဟာ သနား နှိတ်တော်မူဟူးဘီး လတ်တော်ဟို့ ဆန့်ဘီးဟာ အယ်လူဟို့ ထိလိုက်ဟယ်။ “ငါလိုရှိဟယ်။ သန့်ရှင်းစေ!” ဆိုဘီး မိန့်တော်မူလေဟယ်။

42 ရှစ်ရှင်းဘွဲ နူနာရောဂါဟာ ပျော့-က်ဟူးဘီး သူဟာ သန့်ရှင်းဟူးလေဟယ်။

43 ယေရှုဟာ သူဟို့ ရှစ်ရှင်းလွတ်လိုက်ဘီး

44 “နန်ဟာ အယ်မူဇာဟို့ ဖယ်သူဟို့လည်း ပြောန။ အယ်ဘေမဲ့ ယဇ်ပုရောဟိတ်နားဟို့ သွားဘီး ကိုယ်ဟို့ပြ လိုက်ပါ။ စင်ကြယ်ကြောင်းဟူ လူလေရှေ့မာ သတ်သေ ဖြစ်ဟို့တွပ် မောရှေ ပညတ်ဟူးဟူတိုင်း ပူဇော်သကာဟို့ ဆစ်သပါ” ဆိုဘီး မိန့်တော်မူလေဟယ်။

45 အယ်ဘေမဲ့ အယ်လူဟု ထွပ်ဟူးဘီး အယ်ဒန်းဟို့ အားရပါးရ ဟောပြောဘီး ပုလုံနို့စေလေဟယ်။ အယ် ကြောန့် ယေရှုဟု မြို့ထဲဟို့ ထန်းထန်ရှားရှားဟူး ဝမ်နိုင် ဘဲန လူမွေ့သူမွေ့ဘဲဟူ မြို့ပုလန်နေရာမာဘွဲ နေရဟယ်။ အယ်ဘေမဲ့ နေရာတိုင်းဟုနေ လူလေဟု ကိုယ်တော်နားဟို့ ရော့-က်လာဂေ့ဟယ်။

2

ယေရှုဟာ လေဖြတ်ဟူလူဟို့ ကျန်းမာစေဟူကြောင်း
(မသဲ ၉.၁-၈; လုကာ ၅.၁၇-၂၆)

§ 1:41 ၁.၄၁ သနား၊ တချို့ မူရင်းလတ်ရေးမူလေမာ မျစ်ဒေါသ၊ ဆိုဘီး ပါရှိဟယ်။

၁ ရစ်နဲ့ကြာဘီးန ယေရှုဟာ ကပေရနောင်မြို့ဟို့ ပုလန်
ဝမ်ဟူးဘီး၊ ကိုယ်တော်ဟာ အီမာရှိနေဟယ် ဆိုဘီး ဒန်း
ဟို့ လူလေကြားဂေဟယ်။

၂ လူလေဘောင်ဂီးဟာ ရော့-က်လာဂေဟူကြောန့် ခွ
ဗော့-က်ဝပုလန်မာလည်း နေရာလွတ် မေ့ဟမ်း။ ယေရှု
ဟာ သူးနို့ဟို့ တရားစကားဟို့ ဟောပြောနေလေဟယ်။

၃ အယ်ခီမာ လူလေးယော့-က်ဟာ ရော့-က်လာဘီး
လေဖြတ်နေဟူ လူတယော့-က်ဟို့ ယေရှုနားဟို့ သယ်လာ
ဂေဟယ်။

၄ အယ်ဘေမဲ့လည်း လူအောက်ဂီးကြောန့် သူးနို့ဟာ
အယ်လူဟို့ ကိုယ်တော်နားဟို့ သယ်ဟို့တတ်နိုင်ဟမ်း။
အယ်ကြောန့် သူးနို့ဟာ ယေရှုရှိဟူ နေရာထတ်ဟာ ခေါန်
မိုးဟို့ ပေါ့-က်ဖော့-က်လိုက်ဟယ်။ သူးနို့ဟာ လေဖြတ်
နေဟူလူဟို့ ထမ်းစင်န လျှော့ခလဂေဟယ်။

၅ ယေရှုဟာ သူးနို့လေရဲ့ ယောင်ကြည်ရှင်းဟို့ မြင်ဟူး
ဟူ ခီမာ လေဖြတ်နေဟူလူဟို့ “ငါ့သား၊ နန့်ရဲ့ ပြစ်လေဟာ
ခွမ်လွတ်ဇာခံရဘီ” ဆိုဘီး မိန့်တော်မူလေဟယ်။

၆ အယ်နေရာမာ ထိုင်နေဟူ ကျမ်းတတ်ဆရာ တချို့ဟာ
သူးနို့ရဲ့ စိတ်မာ စဉ်းစားနေဇာဟာ

၇ “အယ်လူဟာ ဖြားဖြစ်ကြောန့် အယ်မျိုးပြောနူး! သူ
ဟာ ပြစ်မှားနေဇာ ဖြစ်ဟယ်! ဘုရားသခင် တပါးဒဲဘဲ့
ပြစ်လေဟို့ လွတ်ပိုင်နိုင်ဟယ်!”

၈ သူးနို့ရဲ့ စိတ်မာ အယ်မျိုး စဉ်းစားနေဇာဟို့ ယေရှုဟာ

ရှစ်ရှင်း သိဟူကြောန့် “နန်းနီလေဟု ဖြားဖြစ်ကြောန့် အယ်
ဇာလေဟို စဉ်းစားနေဂေနှူး။

⁹ လေဖြတ်နေဟူ လူဟို ‘နန့်ရဲ့ ပြစ်ဟို လွတ်ဟူးဘီ’
အယ်မျိုးမူဘဲနေဟာ ‘နန့်ထလိုက်၊ နန့်ထမ်းစင်ဟို ထမ်း
ဘီးသွားလိုက်’ ဆိုဘီး ဖယ်စကားဟု ပိုဘီး ပြောဟိုလွယ်
နှူး။

¹⁰ အယ်ကြောန့် လူရဲ့သားဟာ မလေဂီးထတ်မာ ပြစ်
လေလွတ်ဟို ခွမ်အာဏာရှိဟယ် ဆိုဇာ နန်းနီလေဟို ငါ
သတ်သေထူပြမယ်။” အယ်ကြောန့် ကိုယ်တော်ဟု လတ်
ခေသေနေဟူ လူဟို

¹¹ “နန့်ဟို ငါပြောမယ်။ ထဒန်။ နန့်ရဲ့ ထမ်းစင်ဟို
ကော့-က်ဘီးဟာ အီဟို ပုလန်ဟူးလိုက်!” ဆိုဘီး ပြော
လေဟယ်။

¹² လူလေ ဂူလောင်းဟာ စောန့်ကော့နေဒူးမာ အယ်လူ
ဟာ ထဘီး၊ သူရဲ့ ထမ်းစင်ဟို ယူဘီးဟာ ထွပ်ဟူးလေ
ဟယ်။ သူးနီလေ ဂူလောင်းဟာ ရရာတိုင်း အံ့ဩဟူးဘီး
ဟာ ဘုရားသခင်ဟို ချီးမွမ်းဂေဘီး “နီလေဟာ အယ်မျိုး
ဇာဟို လောင်းဝပြင်ဖူးဟု!” ဆိုဘီး ပြောဂေဟယ်။

ယေရှုဟာ လေဝိဟို ခေါ်ဟူကြောန့်
(မသဲ ၉.၉-၁၃; လုကာ ၅.၂၇-၃၂)

¹³ ယေရှုဟာ နော့-က်တခါ ဂါလိလဲအိုင်နားဟို ပုလန်
ဟူးလေဟယ်။ လူအောက်ဂီးဟု ကိုယ်တော်နားဟို လာ

ဂေဟူကြောင့် ကိုယ်တော်ဟာ သူးနှိဟို စဘီးဟာ သွန်သန် လေဟယ်။

14 ကိုယ်တော်ဟာ ဆစ်ဘီး ရှော့-က်သွားဟူ ခီမာ အာ လဖဲရဲသား၊ ခွန်ခံလေဝိဟာ သူရဲ ရောင်းမာ ထိုင်နေဇာဟို မြင်ဟူးလေဟယ်။ ယေရှုဟု “ငါ့နော့-က်ဟို လိုက်ပါ” ဆိုဘီး မိန့်တော်မူလေဟယ်။ လေဝိဟာ ထဘီး ကိုယ်တော် နော့-က်ဟို လိုက်ဟူးဟယ်။

15 အယ်ဘီးန ယေရှုဟာ လေဝိရဲအီမာ * ညဉ့်ခန်း ဇာ စားနေဂေဟယ်။ ခွန်ကော့-က်မားလေန ပြစ်သားလေ ဘောင်ဂီးဟာ ယေရှုနော့-က်ဟို လိုက်လာဂေဘီး သူးနှိ ထဲဟု တချို့ဟာ ကိုယ်တော်န တမဲ့တော်လေနတူးဒူ စား သော့-က်ဂေဟယ်။

16 ယေရှုဟာ ခွန်ကော့-က်မားလေ၊ ပြစ်သားလေနတူးဒူ စားသော့-က်နေဇာဟို ဖာရိရှဲလေ၊ ကျမ်းတတ်ဆရာလေ ဟာ မြင်ဟူးဘီး “ဖြားဖြစ်ကြောင့် သူဟု အယ်လူလေန စားသော့-က်နေရနူး” ဆိုဘီး တမဲ့တော်လေဟို မေးဂေဟယ်။

17 ယေရှုဟု ကြားဟူးဘီး သူးနှိဟို “ကျန်းမာဟူ လူ လေဟု ဆရာဝန်ဟို လိုဂေဟု၊ ဖျားနေဟူ လူလေဘဲ လိုရှင်ဟယ်။ ငါဟာ ဖြောင့်မတ်ဟူ လူလေဟို ခေါ်ဟိုလာဇာမူဟု။ ပြစ်သားလေဟို ခေါ်ဟိုလာဟယ်” ဆိုဘီး မိန့်တော်မူ လေဟယ်။

* 2:15 ၂.၁၅ လေဝိရဲအီမာ၊ အယ်မျိုးမှဘဲနေဟာ သူအီ၊ (ယေရှုရဲ) အီ။

စာရှောင်ဇာနည် ဆိုင်ဟူမေးခွန်း
(မသံ ၉.၁၄-၁၇: လုကာ ၅.၃၃-၃၉)

18 တနေ့မှာ ဗတုတိဇိယောဟန်ရဲ့ တမဲ့တော်လေန် ဖာရိရဲ့လေဟာ စာရှောင်နေဂေဟယ်။ လူတချို့ဟာ ယေရှုနားဟို့လာဘီး “ယောဟန်ရဲ့ တမဲ့လေန် ဖာရိရဲ့ရဲ့ တမဲ့လေဟာ စာရှောင်ဂေဘီး ကိုယ်တော်ရဲ့ တမဲ့လေဟာ ဖြားဖြစ်ကြောန့် စာရှောင်ဘဲန နေဂေနူး” ဆိုဘီး မေးလျှော့-က်ဂေဟယ်။

19 ယေရှုဟာ “အီတတ်မဲ့မှာ ဒို့သားနတူးဒူ ရှိနေဟူ ညဉ့်သည်လေဟာ ဒို့သားနတူးဒူ ရှိနေဒူးမှာ စာရှောင်မယ်ဆိုဘီး မျှော်လင့်နိုင်ဘဲလော။ သူးနို့ဟာ ဒို့သားနတူးဒူ ရှိနေဒူးမှာ စာရှောင်နိုင်ဂေဟယ်။

20 အယ်ဘေမဲ့ ဒို့သားဟို့ သူးနို့နားဟာနေ ယူဆောန်ဟားဟာ ဒီရော့-က်လာလေ့မယ်။ အယ်နေမှာ သူးနို့ဟာ စာရှောင်ဂေလေ့မယ်။

21 “ဖယ်သူလည်း အန်းဂီဟောန်းဟို့ ပိစသစ်နဖာလေ့မေ့ဟာ။ ဖြားဖြစ်ကြောန့်နူးဆိုဟာ ဖာဟားဟူ ပိစသစ်ဟာ အန်းဂီဟောန်းဟို့ စုဖလဲဘီးဟာ ပိုဆိုးဟားလေ့မယ်။

22 အယ်မျိုးဘဲ ဝိုင်သစ်ဟို့ သားရေဖူး ဟောန်းထဲမာထဲလေ့ မေ့ဟာ။ ထဲမယ် ဆိုဟာ ဝိုင်သစ်ဟာ သားရေဖူးဟောန်းဟို့ ပေါ့-က်ပုလဲစေဘီး ဝိုင်န သားရေဖူး နှေ့ခုလောင်းဟာ ပျစ်စီးဟားလေ့မယ်။ အယ်မျိုးလောက်မယ့်စား ဝိုင်သစ်ဟို့ သားရေဖူးသစ်ထဲမာ ထဲရမယ်” ဆိုဘီး မိန့်တော်မူလေဟယ်။

ဒန်းနေနု ဆိုင်ဟူ မေးခွန်း
(မဿဲ ၁၂.၁-၈; လုကာ ၆.၁-၅)

²³ ဒန်းနေနုမာ ယေရှုဟာ ဂျောင်စဗားလယ်ဂွမ်လေဟို့ ဖြတ်ရှော့-က်နေလေဟယ်။ ကိုယ်တော်ရဲ့ တဗွဲတော်လေနတူးဒု သွားနေဟူ ခီမာ သူးနို့ဟာ စဘီးဟာ ဂျောင်စဗားနို့လေဟို့ ဆွတ်ဂေဟယ်။

²⁴ ဖာရိရဲ့လေဟု “ဒန်းနေနုမာ လောက်အပ်ဘဲဟူ ဇာဟို့ ကိုယ်တော်ရဲ့ တဗွဲတော်လေဟု ဖြားဖြစ်ကြောန့် လောက်ဂေနူး” ဆိုဘီး ယေရှုဟို့ မေးဂေဟယ်။

²⁵ ယေရှုဟု “ဒါဝိဒ်ဟု စားဟို့ တခုခု လိုအပ်လာဟူ ခီမာ သူဟာ ဖယ်မျိုးလောက်ဟားဇာဟို့ နန်းနို့ လောင်းဝဖတ်ဖူးဂေဟလော။ သူနု သူရဲ့ လူလေဟာ မိုက်ဆာလာဟူကြောန့်

²⁶ သူဟာ ဘုရားသခင်ရဲ့ အီတော်ထဲဟို့ ဝမ်ဟားဘီး ဘုရားသခင်ဟို့ ဆစ်ကပ်ဟားဟူ မဟို့ စားဂေဟယ်။ အယ်ဇာဟာ ယဇ်ပုရောဟိတ်မန်း အဗျာသာလတ်ထတ်မာ ဖြစ်ပျစ်ဟားဟယ်။ နို့လေရဲ့ ပညတ်တရား တိုင်းဆိုဟာ အယ်မဟို့ ယဇ်ပုရောဟိတ်လေဘဲ စားခွမ်ရှိဟယ်။ အယ်ဘေမဲ့ ဒါဝိဒ်ဟာ အယ်မဟို့ စားဘီးဟာ သူရဲ့ လူလေဟို့လည်း ပေးလေဟယ်” ဆိုဘီး မိန့်တော်မူလေဟယ်။

²⁷ အယ်ဘီးနု ယေရှုဟာ “ဒန်းနေဟာ လူလေတွပ်ဘဲ ဖြစ်ဟယ်။ လူဟာ ဒန်းနေတွပ်ဖြစ်ဇာ မူဟု။

28 အယ်ကြောန့် လူ့ရဲ့သားဟာ ဒန်းနေရဲ့ သခင်ဖြစ်ဟယ်” ဆိုဘီး သူးနို့လေဟို့ မိန့်တော်မူလေဟယ်။

3

လတ်တဖတ်သေနေဟူ လူကြောန်း

(မသံ ၁၂.၉-၁၄; လုကာ ၆.၆-၁၁)

1 ယေရှုဟာ ဝါလယ်ဇရပ်ထဲဟို့ ပုလန်ဝမ်ဟားဘီးဟာ အယ်နေရာမာ လတ်တဖတ်သေနေဟူ လူတယော့-က်ရှိနေဟယ်။

2 လူလေဟာ ယေရှုဟို့ စွတ်စွဲဟို့တွပ် အယ်လူဟို့ ဒန်းနေမာ နာပျော့-က်စေမယ်၊ ပျော့-က်စေဟု ဆိုဇာဟို့ နီးကပ်စောန်ကော့နေဂေဟယ်။

3 ယေရှုဟာ အယ်လူဟို့ “လူလေ ဂူလောင်းရှေ့မာ ထဒ်လိုက်” ဆိုဘီး မိန့်တော်မူလေဟယ်။

4 အယ်ဘီးန ယေရှုဟာ “နို့လေရဲ့ ပညတ်တော်ဟု ဒန်းနေမာ ကောန်းဇာလောက်ဟို့လော။ ဆိုးဇာလောက်အပ်ဘဲ့လော။ လူသတ်ဟို့ ကယ်အပ်ဘဲ့လော။ သတ်အပ်ဘဲ့လော” ဆိုဘီး သူးနို့ဟို့ မေးတော်မူလေဟယ်။ အယ်ဘေမဲ့ သူးနို့ဟာ တိတိဟားဘဲ့ နေဂေဟယ်။

5 ယေရှုဟာ ဒေါသထွပ်ဘီးဟာ သူးနို့လေဟို့ လှည့်ပတ်ကော့ဘီး သူးနို့ရဲ့ စိန္တလောင်းမာကြောဟူကြောန့် ရရာတိုင်း ဝမ်းနဲဘီး လတ်သေနေလူဟို့ “နန့်လတ်ဟို့ ဆန်လိုက်” ဆိုဘီး မိန့်တော်မူလေဟယ်။ သူဟုလည်း လတ်ဟို့ ဆန်လို

က်ဟူ ခီမာ သူလတ်ဟာ ကောန်းတိုင်း ပုလန်ဖြစ်ဟူးလေဟယ်။

⁶ ဟရိရဲလေဟာ ဝါလယ်ဇရပ်ဟာ ထွပ်ဟူးဂေဘီး ယေရှုဟိုသတ်ဟို့ နည်းလမ်းလေဟို့ ဟေရုဒ်ဖွဲ့ဝမ်လေန ရှစ်ရှင်းဘွဲ တိုင်ဗန်ဂေဟယ်။

အိုင်နားမာရှိဟူ လူအောက်ဂီးကြောင်း

⁷ ယေရှုဟာ တမဲ့တော်လေနတူးဒူ ဂါလိလဲအိုင် ယုဒပြည်ဟို့ သွားလေဟယ်။ အယ်ဘီးန လူအောက်ဂီးဟာ ကိုယ်တော်နော-က်ဟို့ လိုက်ဂေဟယ်။ သူးနို့လေဟာ ဂါလိလဲပြည်၊ ယုဒပြည်၊

⁸ ယေရှုရှလင်မြို့၊ ကုကဒမဲပြည်၊ ယော်ဒန်မှလစ်ရဲ့ ဟို့ဖတ်ကမ်း၊ တုရနဇိဒန်မြို့ နီးနားရပ်ဝါလေဟာ လူလေဟာ ယေရှုလောက်ဟူးဟူ မှာလေဟို့ ကြားဟူ ခီမာ သူးနို့ဟာ ကိုယ်တော်နားဟို့ လာဂေဟယ်။

⁹ လူအောက်ဟာ ရရာတိုင်းကီးဟူကြောန့် ယေရှုဟာ သူဟို့လူလေ တိုက်မိဘဲနေအောန် လှေတစီးဟို့ သူ့တွပ်ဆင်သင့်လောက်ဟူးဟို့ တမဲ့တော်လေဟို့ မိန့်မှာဟူးဟယ်။

¹⁰ ကိုယ်တော်ဟာ လူနာဘောင်ဂီးဟို့ ကျန်းမာစေပီးဘိဖြစ်ဟူကြောန့်၊ ရောဂါရှိနေဟူ လူလေဟာ ကိုယ်တော်ဟို့ ထိရဟို့တွပ် တိုးဝမ်လာဂေဟယ်။

¹¹ ညစ်ညူးဟူ နတ်လေဟာ ကိုယ်တော်ဟို့ မြင်ဟူ ခီမာ ကိုယ်တော်ရှေ့မာ ပျပ်ဝပ်ဘီးဟာ “ကိုယ်တော်ဟာ

ဘုရားသခင်ရဲ့ သားတော်ဖြစ်ဟယ်!” ဆိုဘီး အော်ဟစ်
ဂေဟယ်။

¹² ယေရှုဟု သူဖယ်သူ ဖြစ်ဟယ် ဆိုဇာ ပြောဘဲနေတို့
တွပ် ညစ်ညူးဟူ နတ်လေတို့ မိန့်ပေးလေဟယ်။

ယေရှုဟု တမန်တော် ဆယ့်နှေ့ပါးတို့ ဝီးကော့-က်ဟူ
ကြောန်း

(မသံ ၁၀.၁-၄; လုကာ ၆.၁၂-၁၆)

¹³ အယ်ဘီးန ယေရှုဟု တောန်ထတ်တို့ ကြွဟူး
ဘီး လိုရှင်ဟူ လူလေတို့ ခေါ်လိုက်လေဟယ်။ သူးနှိဟု
ကိုယ်တော်နားတို့ လာဂေဟယ်။

¹⁴ ကိုယ်တော်ဟု ဆယ့်နှေ့ပါးတို့ ဝီးလိုက်ဘီး တမန်
တော်လေ ဆိုဘီး ခေါ်လေဟယ်။ ကိုယ်တော်ဟု “နန်းနှိ
လေတို့ ငါနတူးဒရိုတို့တွပ် ဝီးကော့-က်ဟူးဟယ်။ နန်းနှိ
လေတို့ ကြေညာတို့တွပ်လည်း ငါလွတ်မယ်။

¹⁵ နတ်ဆိုးလေတို့ နှန်ထုနိုင်ဟူ ခွမ်အာဏာတို့လည်း ငါ
ပေးမယ်” ဆိုဘီး မိန့်တော်မူလေဟယ်။

¹⁶ ကိုယ်တော် ဝီးကော့-က်ဟူးဟူ ဆယ့်နှေ့ပါးဟု ပေ
တရု ဆိုဘီး ယေရှုဟု နာမယ်ပေးဟူးဟူ ရှိမုန်၊

¹⁷ ဇေဗဒဲရဲ့ သားနှေ့ယော့က်ဖြစ်ဟူ ယာကုပ်န သူညီ
ယောဟန် (မိုးကြိုးရဲ့ သားလေ ဆိုဘီး ဓိပါယ်ရှိဟူ ဗော
နေရဂတ် ဆိုဘီး ယေရှုဟု နာမယ်ပေးဟူးဟယ်)၊

18 အနုဋြေ၊ ဖိလိပ္ပု၊ ဗာသောလမဲ၊ မဿဲ၊ သောမ၊ အာလဖဲရဲသား ယာကုပ်၊ သဒဒဲ၊ မျိုးရှစ်စိ အားထတ်သန်ဟူရှိမုန်နာ၊

19 ယေရှုဟို သစ်စာဖော့-က်ဟူ ယုဒရှုကာရုတ် ဖြစ်ဟယ်။

ယေရှုန ဗေလဇေဗုလကြောင်း

(မဿဲ ၁၂.၂၂-၃၂; လုကာ ၁၁.၁၄-၂၃; ၁၂.၁၀)

20 အယ်ဘီးန ယေရှုဟု အီဟို ပုလန်ဟားဟယ်။ လူအောက်ဂီးဟု ပုလန်ဘီးဟု စုလာဂေဟူကြောန့် ယေရှုန တမဲ့တော်လေဟု စာစားဟို့ခီ မေ့ဟုမ်း။

21 လူလေဟု “ကိုယ်တော်ဟု စိဖော့-က်ပုလန်ဟားဘီ” ဆိုဘီး ပြောနေဂေဟူကြောန့် ကိုယ်တော်ရဲ့ မိသားစုဟု အယ်ကြောင်းဟို ကြားဟူ ခီမာ သူးနို့ဟု ကိုယ်တော့်ဟို ထီးသီးဟို့တွပ် လိုက်လာဂေဟယ်။

22 ယေရှုရှလင်မြို့ဟုနေ ရော့-က်လာဟူ ကျမ်းတတ်ဆရာလေ တချို့ဟု “ကိုယ်တော်ဟု ဗေလဇေဗုလနတ်ပူးနေဟယ်! နတ်ဆိုးမန်းဟု ပေးဟားဟူ တဂိုးအားဖြင့် နတ်ဆိုးလေဟို နှန်ထုဟယ်” ဆိုဘီး ပြောဂေဟယ်။

23 အယ်ကြောန့် ယေရှုဟု သူးနို့လေဟို ခေါ်ဘီးဟု ဥပမာဆောန်ဘီး ပြောလိုက်ဇာဟု “စာတန်ဟု စာတန်ဟို ဖယ်မျိုး နှန်ထုနိုင်ဟို့နူး။

24 နိုင်ငံတနိုင်ငံဟာ အောက်စု တစုနတစု တိုက်ခိုက်
ဘီး ကွဲပြားနေမယ် ဆိုဟာ အယ်နိုင်ငံဟာ ဖယ်မျိုးလည်း
ရပ်တည်နိုင်တို့ မှဟု။

25 အီသူအီသားလေဟာလည်း အောက်စု တစုနတစု
တိုက်ခိုက်ဘီး ကွဲပြားနေမယ် ဆိုဟာ အယ်မိသားစုဟာ
ဖယ်မျိုးလည်း ရပ်တည်နိုင်တို့ မှဟု။

26 အယ်မျိုးဘဲ စာတန်ရဲ့ နိုင်ငံဟာ အောက်စုလေ
ကွဲပြားနေမယ် ဆိုဟာ အယ်နိုင်ငံဟာ ရပ်တည်နိုင်ဘဲန
ပျစ်စီးဟားလေ့မယ်။

27 “ခွန်အားကီးဟူ လူဟို့ ရင်ဦးဆောင်း တောက်ဘဲန
ဖယ်သူလည်း ခွန်အားကီးဟူ လူရဲ့ အီဟို့ ဝမ်ဘီးဟာ သူ
အောက်စလေဟို့ လုယူနိုင်တို့ မှဟု။ သူဟို့ တောက်ဘီးမှ
ဘဲ သူရဲ့ အီဟို့ လုယူနိုင်မယ်။

28 “နန်းနို့ဟို့ ငါ မှန်တိုင်းပြောမယ်၊ လူလေဟာ သူးနို့ရဲ့
ပြစ်ရှိမျှ* ဘုရားသခင်ဟို့ စော်ကားပြောဆိုဇာလေ အား
လောင်းတွပ် ခွမ်လွတ်ခံရမယ်။

29 အယ်ဘေမဲ့ ဖယ်သူဘဲဖြစ်ဖြစ် သန်ရှင်းဟူဝိညာဉ်
တော်ဟို့ ပြစ်မှားဘီး ပြောဆိုမယ် ဆိုဟာ လောင်းဝ ပြစ်
လွတ်လေ့မယ် မှဟု။ ဖြားဖြစ်ကြောန့်နူးဆိုဟာ သူဟာ
ထာဝရပြစ်ဟို့ ကျူးလွန်ဟူကြောန့် ဖြစ်ဟယ်။”

30 ယေရှု အယ်မျိုး ပြောလိုက်ဇာဟာ လူတချို့ဟ

* 3:28 ၃.၂၈ သူးနို့ရဲ့ ပြစ်ရှိမျှ၊ အယ်မျိုးမှဘဲနေဟာ
ကောန်းဘဲပြောနေဇာဟာ ဘုရားသခင်ဟို့ လွန်ကျူးဘီး ပြောဇာဖြစ်ဟယ်။

3:29 ၃.၂၉ လု ၁၂.၁၀

“ကိုယ်တော်ထဲမှာ ညစ်ညူးဟူ နတ်ရှိနေဟယ်” ဆိုဘီး ပြောနေဂေဟူကြောနဲ့ ဖြစ်ဟယ်။

ယေရှုရဲ့ မိန ညီလေကြောနဲ့

(မသံ ၁၂.၄၆-၅၀; လုကာ ၈.၁၉-၂၁)

³¹ ယေရှုရဲ့ မိန ညီလေဟာ ရော့-က်လာဂေဟယ်။ သူး နို့ဟာ အီပုလန်မာ ရပ်နေဘီးဟာ ကိုယ်တော့်ဟို့ ခေါ်ဟို့ တွပ် ယော့-က်ယော့-က်ဟို့ စေလွှတ်လေဟယ်။

³² လူအောက်ဂီးဟာ ယေရှုရဲ့ ဘေးပတ်ပတ်လည်မာ ထိုင်နေဂေဟယ်။ သူးနို့ဟာ “ကိုယ်တော်ရဲ့ မိ၊ ညီလေန ညီမလေဟာ ပုလန်မာရှိဟယ်။ သူးနို့ဟာ ကိုယ်တော့်ဟို့ တွံ ရှင်နေဂေဟယ်” ဆိုဘီး ကိုယ်တော့်ဟို့ လျှော့-က်ဂေလေ ဟယ်။

³³ ယေရှုဟာ “ငါ့မိဟာ ဖယ်သူနူး။ ငါ့ညီကိုလေဟာ ဖယ် သူနူး” ဆိုဘီး ပုလန်ဘီး မိန့်တော်မူလေဟယ်။

³⁴ ကိုယ်တော်ဟာ သူပတ်ပတ်လည်မာ ထိုင်နေဟူ လူ လေဟို့ ကော့ဘီးဟာ “အယ်လူလေဟာ ငါ့မိ၊ ငါ့ညီ၊ ငါ့ညီမ ဖြစ်ဟယ်!

³⁵ ဘုရားသခင်ရဲ့ လိုတော်ဟို့ ဆောန်ဟူလူဟာ ငါ့ညီ၊ ငါ့ညီမန ငါ့မိဘွဲ ဖြစ်ဟယ်” ဆိုဘီး မိန့်တော်မူလေဟယ်။

4

ပျိုးစေ့ကြဲမားရဲ့ ပေါင်ဥပမာ

(မသံ ၁၃.၁-၉; လုကာ ၈.၄-၈)

1 နှော့-က်တခါ ယေရှုဟု ဂါလိလဲအိုင်ဘေးမာ စဘီးဟာ သွန်သန်လေဟယ်။ ရရာတိုင်းများဟူ လူအောက်ဂီးဟာ ကိုယ်တော်နားမာ စုလာဂေဟူကြောန့် ကိုယ်တော်ဟာ အိုင်ထဲမာရှိဟူ လေ့တစင်းထတ်မာ တတ်ထိုင်လိုက်ဟယ်။ လေ့ဟာ ရေပုလန်မာ ရှိနေဟူကြောန့် လူအောက်ဂီးဟာ ကမ်းခြေရေစပ်မာ ရှိနေဂေဟယ်။

2 ကိုယ်တော်ဟု ပေါင်ဥပမာဆောန်ဘီးဟာ ကြောန်းရာလေဘောင်ဂီးဟို့ သွန်သန်ဘီး ပြောနေဇာဟု။

3 “နားထောန်ဂေ! မျိုးစေ့ကြဲမား တယော့-က်ဟာ မျိုးစေ့ကြဲဟို့ ထွပ်ဟားလေဟယ်။

4 မျိုးစေ့ကြဲလိုက်ဟူ ခီမာ တချို့ စေ့လေဟု လမ်းမာ ကုလဘီး ငှတ်လေဟာ လာကော့-က်စားလေဟယ်။

5 တချို့ စေ့လေဟု မုလေဆီလွှာနဲဘီး ကုလော့-က်ခဲများဟူ နေရာမာကုလလေဟယ်။ မျိုးစေ့လေဟာ မုလေသားနဲဟူကြောန့် ဗြန်းဗြန်ဟား ပန်ပေါ့-က်လာဟယ်။

6 အယ်ဘေမဲ့ နေပူဟူ ခီမာ ပြစ်စွဲဘဲကြောန့် ညှိုးဘီးဟာ ခြော့-က်ဟားလေဟယ်။

7 တချို့ မျိုးစေ့လေဟု ဆူးချောင်ထဲမာ ကုလဟားဘီး ဆူးဗန်လေဟု ကီးလာဘီးဟာ ပန်လေဟို့ အောက်လိုက်ဟူကြောန့် သီးလေဟု သီးနိုင်ဟမ်း။

8 တချို့ စေ့လေဟု ကောန်းဟူမုလေမာ ကုလဟူကြောန့် ပန်လေပေါ့-က်လာဘီး ကီးလာဘီးဟာ သီးန့်လေဟာ

တချို့ဟု ဆသောင်းဆယ်၊ တချို့ဟု ဆခြေ-က်ဆယ်၊
တချို့ဟု ဆတရာသီးလေဟယ်” ဆိုဘီး မိန့်တော်မူလေ
ဟယ်။

⁹ အယ်ဘီးန ယေရှုဟု “နန်းနို့မာ နားရှိဟယ် ဆိုဟာ
ကြားဂေ!” ဆိုဘီး မိန့်တော်မူလေဟယ်။

ပေါင်ဥပမာလေရဲ့ ရည်ရွယ်ချစ်
(မသံ ၁၃.၁၀-၁၇; လုကာ ၈.၉-၁၀)

¹⁰ ယေရှုတယော့-က်ဒဲဘဲ့ ရှိဟူ ခီမာ တမဲ့တော် ဆယ်
နှေ့ပါးနတူးဒု လိုက်လာဟူလူလေဟု ပေါင်ဥပမာရဲ့ ဓိပါ
ယ်ဟို့ မေးဂေဟယ်။

¹¹ ယေရှုဟု “နန်းနို့လေဟု ဘုရားသခင်ရဲ့ နိုင်ငံတော်န
ဆိုင်ဟူ နတ်နဲဟူ ကြောန်းရာလေဟို့ သိခွမ်ရှိဟယ်။ အယ်
ဘေမဲ့ ပုလန်လူလေတွပ် ကြောန်းရာလေဟို့ ပေါင်ဥပမာ
လေနဘဲ့ ဖော်ပြဂေဟယ်”

¹² ဖြားဖြစ်ကြောန်းနူးဆိုဟာ
“သူးနို့လေဟု မြင်းမြင်ဟီးန
မြင်ဟု။

သူးနို့လေဟာ နားလည်းလည်ဟီးန
နားလည်ဂေဟု။

သူးနို့ဟာ တကယ်မြင်ဘီးဟာ နားလည်ဟားမယ် ဆိုဟာ
သူးနို့ဟာ ဘုရားသခင်ဖတ်ဟို့ လှည့်ဟားဟူကြော
န့်

ကိုယ်တော်ဟု သူးနှိုဟို့ ခွမ်လွတ်လေ့မယ်” ဆိုဘီး
မိန့်တော်မူလေဟယ်။

မျိုးစေ့ကြဲမားရဲ့ ပေါင်ဥပမာဟို့ ရှင်းပြဟူကြောန်း
(မသံ ၁၃.၁၈-၂၃; လုကာ ၈.၁၁-၁၅)

¹³ ယေရှုဟု “နန်းနှိုဟု အယ်ပေါင်ဥပမာဟို့ နားလည်ဟု
လော။ အယ်ဆိုဟု တခြားပေါင်ဥပမာလေဟို့ ဖယ်မျိုး
နားလည်နိုင်ဟို့နူး။

¹⁴ မျိုးစေ့ကြဲမားဟု ဘုရားသခင်ရဲ့ စကားတော်ဟို့ ကြဲ
လေဟယ်။

¹⁵ လူတချို့ဟု လမ်းထတ်မာကုလဟူ မျိုးစေ့နတူဘီး
သူးနှိုဟု တရားစကားဟို့ ကြားဟူ ခီမာ စာတန်ဟု လာ
ဘီးဟု အယ်မူတရားစကားဟို့ နှုယူလေဟယ်။

¹⁶ တချို့ လူလေဟု ကုလော့-က်ခဲပေါဟူ မုလေမာကု
လဟူ မျိုးစေ့နတူဟယ်။ သူးနှိုလေဟု တရားစကားဟို့
ကြားဟူ ခီမာ သူးနှိုဟု ဝန်းသာအားရ လတ်ခံဂေဟယ်။

¹⁷ အယ်ဘေမဲ့ တရားစကားဟု သူးနှိုထဲမာ ပြစ်စွဲဘဲ
န ရှစ်ဟားဘဲ ခံလေဟယ်။ အယ်မူတရားစကားကြောန်
ဒေါက်ခန နှိစစ်ညဉ်းဆဲဇာလေ တွံရဟူ ခီမာ သူးနှိုလေဟု
ရှစ်ရှင်းဘဲ ဖော့-က်ပုလန်ဟားဂေဟယ်။

¹⁸ တခြားလူလေဟု ဆူးချောင်မာကုလဟူ မျိုးစေ့နတူ
ဟယ်။ သူးနှိုလေဟု တရားစကားဟို့ ကြားရဟယ်။

¹⁹ အယ်ဘေမဲ့ ဘဝရဲ့ စိုးရိမ်ရှင်းလေ၊ စည်းငိမ်အောက်
စာရဲ့ လှည့်ဇားရှင်းလေန တခြားတပ်မတ်ရှင်းလေ ဝမ်

လာဘီး အယ်မူတရားစကားဟို့ လွှမ်းမိုးလိုက်ဟူကြောန်
တရားစကားဟာ ဖယ်မျိုးလည်း သီးဟို့ သီးနိုင်ဟွမ်း။

²⁰ တချို့ လူလေဟု ကောင်းဟူမလေမာကုလဟူ မျိုးစေ့
နတူဟယ်။ သူးနို့ဟု တရားစကားဟို့ ကြားဘီး လတ်ခံဟူ
ကြောန် တချို့ဟု ဆသောင်းဆယ်၊ တချို့ဟု ဆခြေ-က်
ဆယ်၊ တချို့ဟု ဆတရာ သီးသီးလာဟယ်” ဆိုဘီး ပြော
လေဟယ်။

တောင်းအော့-က်မာရှိဟူ မီးအီကြောန်း
(လုကာ ၈:၁၆-၁၈)

²¹ ယေရှုဟု “ဖယ်လူဟု ဆီမီးအီဟို့ ယူလာဘီးဟာ
တောင်းအော့-က်မာ ထားဟွားမယ်နူး။ ကဒန်အော့-က်
မာ ထားဟွားမယ်နူး။ အယ်မျိုးထားမယ့်စား အယ်ဇာဟို့
ဆီမီးခေါင်ထတ်မာ ထားဟွားရမယ် မူဟုလော။

²² ဝှပ်ဟွားဟူဇာလေ ဂူလောင်း ပေါ်လာလေ့မယ်။ ဖော
င်းဟွားဟူဇာလေ ဂူလောင်းဟာလည်း ပွမ့်လာလေ့မယ်။

²³ နန်းနို့မာ နားရှိဟယ် ဆိုဟာ ကြားဂေ့!” ဆိုဘီး သူးနို့
ဟို့ မိန့်တော်မူလေဟယ်။

²⁴ အယ်ခီမာ ယေရှုဟာ “နန်းနို့ ကြားရဇာလေဟို့
ဂရုစိုက်ဘီးဟာ နားထောန်ဂေ့! နန်းနို့ဟာ သူများလေဟို့
ပေးဟူ ပမာဏတိုင်း ဘုရားသခင်ဟု နန်းနို့ဟို့ ပေးလေ့
မယ်။ ပိုဘီး ဟာ ပေးလေ့မယ်။

4:21 ၄.၂၁ မ ၅.၁၅: လု ၁၁.၃၃

4:22 ၄.၂၂ မ ၁၀.၂၆: လု ၁၂.၂

4:24 ၄.၂၄ မ ၇.၂: လု ၆.၃၈

၂၅ ရှိဟူလူဟို ထပ်ပေးဘီး သူ့ဟို ကြွယ်ဝစေလေ့မယ်။ မှော့ဘဲဟူ လူနားဟု ရှိဟူမျှဟို နှလုံးမယ်” ဆိုဘီး မိန့်တော် မူလေဟယ်။

ကီးလာဟူ မျိုးစေ့ရဲ့ ပေါင်ဥပမာကြောန်း

၂၆ ယေရှုဟု ဆစ်ဘီးဟာပြောဇာဟု “ဘုရားသခင်ရဲ့ နိုင်ငံတော်ဟာ သူ့ရဲ့ လယ်ထဲမှာ မျိုးစေ့ကြဲဟူ လူတ ယော့-က်နတူဟယ်။

၂၇ သူဟု ညဉ့်ခါ အိလိုက်၊ နေ့ခါမှာ နိုးနေဒူးမှာ၊ မျိုးစေ့ လေ ဂူလောင်းဟာ ပန်ပေါ့-က်လာဘီး ကီးလာဟယ်။ အယ်ဘောမဲ့ အယ်ဇာ ဖယ်မျိုးဖြစ်လာဟယ် ဆိုဇာဟို အယ် လူဟာ သိဟယ်။

၂၈ မှလေဂီးဟု သူ့လိုလို ပန်လေဟို ကီးစေဘီး သီးသီး လာဇာဟု ဦးဆောင်းမှာ ညွန့်ထွပ်လာဟယ်။ အယ်ဘီးန ဗားန့် နော့-က်ဆောင်းမှာ နံ့ထဲမှာ အောန်ဟူဆန်။

၂၉ ဗားန့်လေ မှည့်ဟူ ခီမှာ ဗားရီခီ ရော့-က်လာဟူကြော န့် အယ်လူဟု ဗားဟို စဘီးဟာ ဇင်နရီဟယ်” ဆိုဘီး မိန့် တော်မူလေဟယ်။

မုညင်းစေ့ရဲ့ ပေါင်ဥပမာကြောန်း

(မသံ ၁၃.၃၁, ၃၂, ၃၄; လုကာ ၁၃.၁၈-၁၉)

၃၀ ယေရှုဟု “ဘုရားသခင်ရဲ့ နိုင်ငံတော်ဟာ ဖြားဇာနတူ ဟယ် ဆိုဘီး နို့လေဟု ပြောရမယ်နဲ့။ ဖယ်မျိုးပေါင်ဥပ မာဟို သောင်းပြုဘီး အယ်ဇာဟို နို့လေဟု ရှင်းပြရဟိုနဲ့။

31 အယ်ဇာဟု မုညင်းစေ့တူဟယ်။ လူတယော့-က်ဟာ ကမ္ဘာမာ ငယ်ဆောင်းစေ့ဟို ယူဘီးဟာ မုလေဂီးမာ စိုက်လေဟယ်။

32 အယ်ဘေမဲ့ အယ်ပန်ဟာ ကီးလာဟူ ခီမာ သီးနှံပန်လေ ဂူလောင်းထဲမာ ကီးဆောင်းဖြစ်လာဟယ်။ ကိုင်းခတ်ကီးလေလည်း ထွပ်လာဘီး ကောန်းဂန်ဟု ငှတ်လေဟာ လာဘီး အယ်ပန်ရဲ့ရိမာ သူးနှိရဲ့သိုက်ဟို လောက်ဂေဟယ်” ဆိုဘီး မိန့်တော်မူလေဟယ်။

33 ယေရှုဟာ အယ်မျိုး တခြား ပေါင်ဥပမာ ဘောင်ဂီးဟို သောင်းပြုဘီး သူးနှိဟို တရားစကားဟို ဟောလေဟယ်။ အယ်လူလေ နားလည်နိုင်အောန် ပြောလေဟယ်။

34 ကိုယ်တော်ဟာ ပေါင်ဥပမာလေ သောင်းဘဲန သူးနှိဟို ဟောတော်မူဟု။ အယ်ဘေမဲ့ ကိုယ်တော်ဟာ တမဲ့တော်လေနတူးဒု သီးသန်ရှိနေဟူ ခီမာ ကိုယ်တော်ဟာ ဂူလောင်းဟို သူးနှိဟို ရှင်းပြလေဟယ်။

ယေရှုဟာ လေမောန်တိုင်းဟို ငြီးစေဟူကြောန်း

(မသံ ၈.၂၃-၂၇; လုကာ ၈.၂၂-၂၅)

35 အယ်နေ့ နေဒန်ဇာမာ ယေရှုဟု “အိုင်ရဲ့ ဟို့ဖတ်ကမ်းဟို ကူးဂေဇို” ဆိုဘီး တမဲ့တော်လေဟို မိန့်တော်မူလေဟယ်။

36 အယ်ကြောန် သူးနှိဟာ လူအောက်ဂီးဟို ထားရစ်ဘီးဟာ တမဲ့တော်လေဟာ လှေထတ်မာထိုင်နေဟူ ယေရှုဟို

သူးနှိန်တူးဒူ ခေါ်ဟူးဂေဟယ်။ အယ်နေရာမာ တခြားလေ့
လေလည်း ကိုယ်တော်နတူးဒူ လိုက်ဟူးဂေဟယ်။

37 ရောက်တရစ် ပြင်းထန်ဟူ လေမှောန်တိုင်းကုလလာ
ဘီး လှိုင်းလေဟာ လေ့ဟို စဘီးဟာ ရှိုက်လေဟယ်။ အယ်
ကြောန် လေ့ဟာ ရေနပုလဲခါနီးနီး ဖြစ်ဟူးဟယ်။

38 ယေရှုဟု လေ့ရဲ့ပဲ့မာ ခေါင်းအောင်း အောင်းဘီး
အိနေဟယ်။ တဗဲ့တော်လေဟု ကိုယ်တော့်ဟို နှိုးဂေ
ဘီး “ဆရာ၊ ကျွန်တော့်ဟူးလေ သေဟိုဖြစ်နေဂေဇာဟို
ကိုယ်တော် ဂရုစိုက်ဘဲနနေဟိုလော” ဆိုဘီး လျှော့-က်ဂေ
လေဟယ်။

39 ယေရှုဟု ထလာဘီးန လေနလှိုင်းဟို မိန်မှာဟူ ခီမာ
လေနလှိုင်းလည်း ငြီဟူးဘီး သာယာဟူးလေဟယ်။

40 အယ်ဘီးန ယေရှုဟု တဗဲ့တော်လေဟို “ဖြားဖြစ်
ကြောန် နန်းနှိလေ ကြော့-က်နေဂေနှူး။ ခုထတ်ထိ နန်း
နှိလေဟု ယောင်ကြည်ရှင်း မေ့သေးဟုလော” ဆိုဘီး
မေးမြန်းလေဟယ်။

41 အယ်ဘေမဲ့ သူးနှိလေဟု ရရာတိုင်း ကြော့-က်နေဂေ
ဘီး “အယ်လူဟု ဖယ်သူနှူး။ လေနလှိုင်းလေတောန်မှ သူ
ဟို နားထောန်ဂေဟယ်!” ဆိုဘီး သူးနှိရှင်းရှင်း စဘီးဟာ
ပြောနေဂေဟယ်။

ယေရှုဟာ ညစ်ညူးဟူနတ်လေဟို့ နှိပ်ထုဟူကြောင်း
(မသံ ၈.၂၈-၃၄; လုကာ ၈.၂၆-၃၉)

¹ ယေရှုန တမဲ့တော်လေဟာ ဂါလိလဲအိုင်ရဲ့ ဟို့ဖတ်
ကမ်းမာရှိဟူ ဂါဒရဒေသဟို့ ရော့-က်လာဂေဟယ်။

² ယေရှုဟု လှေထဲဟု ထွပ်လာဟူ ခီမာ လူတယော့-က်
ဟာ သန်းခဲလိုင်းထဲဟုနေ ထွပ်လာဘီး ကိုယ်တော့ဟို့ တို့
ဆောင်လေဟယ်။ အယ်လူဟာ ညစ်ညူးဟူနတ် ဝမ်ပူးနေ
ဘီး

³ သန်းခဲလိုင်းဂူလေ ကြားမာနေဟယ်။ ဖယ်သူလဲ သူ
ဟို့ တောက်နိုင်ဂေဟု။ သံကြိုးနဟို့မှ ခယ်ဟားနိုင်ဂေဟု။

⁴ သူရဲ့ ခေလေနလတ်လေဟို့ ခါဘီးခါ ခယ်ဖူးဂေဟု
ယ်။ အယ်ဘေမဲ့ သူဟာ ခီတိုင်း သံကြိုးလေဟို့ ဆွဲဖြတ်
ဘီး ခေရှင်းလေဟို့လည်း ဆွဲဖုလဲလေဟယ်။ သူဟာ ရရာ
တိုင်း ခွန်အားကီးဟူကြောန့် ဖယ်သူလည်း ထီးချောက်နိုင်
ဂေဟု။

⁵ နေ့ရောညဉ့်ရော သူဟာ သန်းခဲလိုင်းဂူကြားလေန
တောန်ဂူးထပ်လေမာ ရော့-က်သွားနေဘီး၊ အော်ဘီးဟာ
သူ့ကိုယ်သူ ထတ်ဟူကုလော့-က်တောင်းလေန လှီးဖြတ်
နေဟယ်။

⁶ သူဟာ ယေရှုဟို့ ဝီးဟုနေ မြင်ဟူ ခီမာ ပုလေးလာဘီး
ဟာ ကိုယ်တော်ရဲ့ ခေတော်ရင်းမာ ပုလားပုလားပျပ်ဝပ်
ဘီး

⁷ “မြစ်ဆောင်းဖြစ်ဟူ ဘုရားသခင်ရဲ့ သားတော်ယေရှု!
ကိုယ်တော်ဟာ ကျွန်တော့်နု ဖြားဆိုင်ကြောန့်နူး။ ကျွန်

တော့်ဟို့ ညဉ်းခဲပါန ဘုရားသခင်ဟို့ အားကိုးဘီးဟာ ကိုယ်တော့်ဟို့ ကျွန်တော်တောန်းဗန်ဟယ်!” ဆိုဘီး သံကုလယ်ဂီးန လျှော့-က်လေဟယ်။

⁸ သူအယ်မျိုးပြောဇာဟာ ယေရှုဟ “ညဉ်ညဉ်းဟူနတ်၊ အယ်လူထဲဟုနေ ထွပ်ဟား!” ဆိုဘီး ပြောဟားဟူကြောန် ဖြစ်ဟယ်။

⁹ ယေရှုဟ “နန်းနီနာမယ် ဖြားမျိုးခေါ်နူး” ဆိုဘီး မေးလိုက်ဟယ်။

အယ်လူဟ “ကျွန်တော့်လေဟ ဘောင်ဂီးဖြစ်ဟူကြောန် ‘လေဂေါင်၊’ ‘လူအောက်ဂီး’ ဆိုဘီး ခေါ်ဂေဟယ်!” ဆိုဘီး ယေရှုဟို ပုလန်ပြောလိုက်ဟယ်။

¹⁰ ညဉ်ညဉ်းဟူနတ် ပူးနေဟူသူဟာ နတ်ဆိုးလေဟို အယ်နယ်ဟုနေဘီးဟာ နှန်ထုဘဲနေဟို့ထွပ် ယေရှုဟို တောန်းဗန်လေဟယ်။

¹¹ အယ်ခီမာ တောန်ဂူးထတ်မာ ဝပ်အောက်ဂီးဟာ စာစားနေဂေဟယ်။

¹² နတ်ဆိုးလေဟုလည်း “ကျွန်တော့်လေဟို အယ်ဝပ်လေထဲဟို့ စေလွတ်ပေးပါ။ သူးနီထဲဟို့ ဝမ်ခွမ်ပေးပါ” ဆိုဘီး ယေရှုဟို တောန်းဗန်ဂေဟယ်။

¹³ ယေရှုဟ ခွမ်ပေးလိုက်ဟူကြောန် ညဉ်ညဉ်းဟူ နတ်လေဟ ထွပ်ဟားဘီး ဝပ်လေထဲဟို့ ဝမ်ဂေလေဟယ်။ ၂,၀၀၀ လော့-က်ရှိဟူ ဝပ်အောက်ဂီးဟာ အိုင်ကမ်းနား

ဟို့ ပုလေးဆင်းဟူးဘီး ရေမှလောက်ဘီးဟာ သေဟူး
လေဟယ်။

14 ဝပ်ထီးမားလေဟာ ထွပ်ပုလေးဟူးဘီး မြို့န တောဝါ
လေန့် အယ်ဒန်းဟို့ လိုက်ပြောဂေဟယ်။ လူလေဟာ ဖြား
ဇာလေ ဖြစ်ဟူးဟယ် ဆိုဇာဟို့ ကေဟို့ ထွပ်လာဂေဟ
ယ်။

15 သူးနို့လေဟာ ယေရှုနားဟို့ ရော့-က်လာဟူ ခီမာ သူး
နို့လေဟာ လေဂေါင်နတ်ဆိုးလေ ပူးခံရဟူလူဟို့ တို့ဟူး
လေဟယ်။ အယ်လူဟာ ဝတ်ဟို့ ဝတ်ဟူးဘီး ပေါင်မှန်စိ
န အယ်နေရာမာ ထိုင်နေဟူကြောန့် သူးနို့လေ ဂူလောင်း
ဟာ ကြော့-က်နေဂေဟယ်။

16 အယ်ဇာဟို့ မြင်ဟူးဘီးဟူ လူလေဟာ နတ်ဆိုးပူး
နေဟူ လူမာ ဖြားမျိုးဖြစ်ဟူးဇာန ဝပ်လေရဲ့ ကြောန်းဟို့
အယ်လူလေဟို့ ပြောပြဂေဟယ်။

17 အယ်ကြောန့် သူးနို့ဟာ သူးနို့ရဲ့ နယ်ဟုနေ ထွပ်ဟူး
ဟို့တွပ် ယေရှုဟို့ တောန်းဗန်ဂေဟယ်။

18 ယေရှုဟာ လှေထတ်ဟို့ တတ်နေဒူးမာ နတ်ဆိုးပူးဖူး
ဟူ လူဟာ “ကျွန်တော့်ဟို့ ကိုယ်တော်နတူးဒု သွားခွမ်ပေး
ပါ!” ဆိုဘီး ကိုယ်တော်ဟို့ တောန်းဗန်လေဟယ်။

19 အယ်ဘေမဲ့ ယေရှုဟာ သူဟို့ လိုက်ခွမ်ပေးဟူ။ အယ်
မျိုးလိုက်ခွမ်ပေးမယ့်စား ကိုယ်တော်ဟာ “နန့်ရဲ့ မိသားစု
နားဟို့ ပုလန်သွားဘီး ဘုရားသခင်ဟာ နန့်တွပ် ဖယ်
မျှလော့-က် လောက်ဆောန်ပေးဟူးဇာန နန့်ဟို့ ဖယ်မျှ

သနားတော်မူကြောင်းကို သူးနှိမ့်လေ့ရှိ ပြောပြပါ” ဆိုဘီး သူ့ကို မိန့်တော်မူလေဟန်။

²⁰ အယ်ကြောန့် အယ်လူဟု ထွပ်ဟူးဘီး ယေရှုဟု သူ့ ထွပ် ဖြားဇာလေ လောက်ပေးဟူးဟယ် ဆိုဇာဟို ဒေကာ ပေါလိနယ်မာ စဘီးဟောပြောလေဟန်။ အယ်ကြောန့် ဟို ကြားရဟူလူလေ ဂူလောင်းဟာ အံ့သြဂေဟန်။

ယာကူရုရဲ့ သမီးနု ယေရှုရဲ့ ဝတ်လောင်ဟို တို့ဟူမီးမ ကြောန့်

(မဿဲ ၉:၁၈-၂၆; လုကာ ၈:၄၀-၅၆)

²¹ ယေရှုဟု အိုင်ရဲ့ ဟိုဖတ်ကမ်းဟို လှေနု ပုလန် ကူးဟူးလေဟန်။ အိုင်ဘေးနားမာ လူအောက်ဂီးဟာ ကိုယ်တော်ပတ်လည်မာ စုလာဂေဟန်။

²² ယာကူရု နာမယ်ရှိဟူ ဝါလယ်ဇရပ်မူး တယော့-က် ဟု ရော့-က်လာဘီးဟာ ယေရှုဟို ဗြင်ဟူ ခီမာ သူဟာ ကို ယ်တော့ခေရင်းမာ ဒူးထော့-က်ဘီး၊

²³ “ကျွန်တော့်သမီးငယ်ဟု သေခါနီး ဖြစ်နေဟန်။ ကြွလာဘီးဟာ သူ့ထတ်မာ ကိုယ်တော်ရဲ့ လတ်ဟို တန် တော်မူပါ။ အယ်ဆိုဟာ သူဟာ ကျန်းမာဘီး သတ်ရှင်လေ့ မယ်!” ဆိုဘီး နူးညွတ် တောန်းဗန်လေဟန်။

²⁴ အယ်ဆိုနု ယေရှုဟု သူ့နတူးဒု လိုက်ဟူးဟန်။ လူ လေဘောင်ဂီးဟု ယေရှုနတူးဒု လိုက်လာဟူကြောန့် သူးနှိမ့် ဟာ ဘေးပတ်ပတ်လည်ဟုနေ ကိုယ်တော့်ဟို တိုးဝှေ့နေ ဂေဟန်။

25 အယ်နေရာမာ ဆယ့်နှေ့နှစ် လောင်းလောင်း သွီး သွန်ရောဂါဟို့ ပြင်းပြင်းထန်ထန် ခံစားနေရဟူ မီးမတယော့-က်ရှိဟယ်။

26 သူဟာ ဆရာဝန်လေ ဘောင်ဂီးနလည်း ကုသဟားပီး ဘီ။ သူ့ရဲ့ကပ်လေ ဂူလောင်းလည်း ကူဟားဘေမဲ့ သတ်သာလာဟို့ နေနေသာသာ ရောဂါဟု ပိုဘီး ဆိုးလာဟယ်။

27 အယ်မီးမဟာ ယေရှုကြောန်းဟို့ ကြားဟားလေဟယ်။ အယ်ကြောန် ဝတ်ဟို့ တို့ဟို့တွပ် ကိုယ်တော်နော့-က်ဟု လူအောက်ဂီးထဲဟို့ ရော့-က်လာဘီး

28 “ငါဟာ ကိုယ်တော့်ဝတ်ဟို့ တို့လိုက်မယ် ဆိုဟာ ငါဟာ ကျန်းမာဟားလေမယ်။” ဆိုဘီး သူ့ကိုယ်သူ ပြောနေလေဟယ်။

29 သူဟာ ကိုယ်တော်ရဲ့ ဝတ်လောင်ဟို့ တို့လေဟယ်။ တို့လိုက်ဟူန သူ့ရဲ့ သွီးသွန်နေဇာလေဟာ ရှစ်ရှင်းဘွဲ ရပ်ဟားဘီး၊ သူဟာ ရောဂါပျော့-က်ဟားဘီ ဆိုဇာဟို့ သူ့ကိုယ်ထဲမာ ခံစားရနေဟယ်။

30 ရှစ်ရှင်းဘွဲ ယေရှုဟာ သူ့ကိုယ်ဟု တဂိုးထွပ်ဟားဇာဟို့ သိဟားကြောန် လူအောက်ဂီးဖတ်ဟို့ လှည့်ဘီးဟာ “ငါဝတ်ဟို့ ဖယ်သူတို့နွဲ့” ဆိုဘီး မေးလေဟယ်။

31 တမဲ့တော်လေဟု “လူလေဟု ကိုယ်တော့်ဟို့ တိုးဝှေ့နေဇာဟို့ မြင်းမြင်ဟို့န၊ ‘ငါဟို့ ဖယ်သူတို့ဟယ်နွဲ့’ ဆိုဘီး ခုထိ ကိုယ်တော်ဟာ မေးနိုင်သေးဟယ်” ဆိုဘီး ပုလန်လျော့-က်လေဟယ်။

32 အယ်ဘေမဲ့ ယေရှုဟာ အယ်ဇာဟို့ ဖယ်သူလောက် ဟယ် ဆိုဇာဟို့ မြင်ဟို့တွပ် ပတ်ပတ်လည်ဟို့ ကေ့နေလေ ဟယ်။

33 အယ်မီးမဟု သူ့မာ ဖြားမျိုးဖြစ်ဟူးဇာဟို့ သိနားလည်ဟူးဟယ်။ အယ်ကြောန့် သူဟာ ကြော-က်ကြော-က် လန့်လန့် ကိုယ်တော့ခေရင်းမာ ဒူးထော့-က်ဘီးဟာ မှန်တိုင်းပြောလေဟယ်။

34 ယေရှုဟု “ငါ့သမီး၊ နန့်ရဲ့ ယောင်ကြည်ရှင်းဟာ နန့်ဟို့ ကျန်းမာစေဘီ။ ငြိသတ်ဘီးသွားပါ။ နန့်ရဲ့ ဝေဒနာဟု နေ လွှတ်မြော့-က်စေ” ဆိုဘီး သူဟို့ မိန့်တော်မူလေဟယ်။

35 အယ်မျိုးပြောနေဒူးမာ ဝါလယ်ဇရပ်မူးရဲ့ အီဟု တမန်တချို့ဟာ ရော့-က်လာဘီး “ကိုယ်တော်ရဲ့ သမီးဟာ သေဟူးဘီ။ ဖြားဖြစ်ကြောန့် ဆရာဟို့ နှော့-က်ယှစ်နေသေးနူး” ဆိုဘီး သူးနို့ဟု ပြောလေဟယ်။

36 ယေရှုဟု သူးနို့ဖြားဇာဘဲပြောပြော ဂရုစိုက်ဟု။* အယ်ဘေမဲ့ “ကြော့-က်န။ ယောင်ကြည်ပါ” ဆိုဘီး ဝါလယ်ဇရပ်မူးဟို့ ပြောလိုက်ဟယ်။

37 အယ်ဘီးန ပေတရု၊ ယာကုပ်န သူညီ ယောဟန်ဟို့ဘဲ ခေါ်ဘီးဟာ တခြားဖယ်သူဟို့လည်း လိုက်ခိုင်းဟု။

38 သူးနို့ဟာ ဝါလယ်ဇရပ်မူးရဲ့ အီဟို့ ရော့-က်ဟူ ခီမာ ယေရှုဟာ အောက်အောက်သဲသဲ ဖြစ်နေဇာလေဟို့ မြင်

* 5:36 ၅.၃၆ ဂရုစိုက်ဟု၊ အယ်မျိုးမူဘဲနေဟာ ရရာတိုင်း ကြားနေရဟယ်။

ဟူးဘီး သူးနို့လေ ဂူလောင်းဟာ သံကုလယ်ဟီး အော်ဘီး ငိုနေဇာလေဟို့ ကြားရလေဟယ်။

39 ကိုယ်တော်ဟာ အီထဲဟို့ ဝမ်ဟူးဘီး “ဖြားဖြစ်ကြောန့် နန်းနို့လေဟု အယ်မျိုး အောက်အောက်သဲသဲ လောက်နေဂေနှူး။ ဖြားဖြစ်ကြောန့်နန်းနို့လေဟာ ငိုနေရဟယ်နှူး။ အယ်မီးမဂန်းဟူး သေနေဇာ မူဟု။ သူမဟာ အိမ့်နေဇာ ဖြစ်ဟယ်။” ဆိုဘီး သူးနို့ဟို့ မိန့်တော်မူလေဟယ်။

40 အယ်လူလေဟု ကိုယ်တော့်ဟို့ ရယ်ဇားဂေဟယ်။ အယ်ကြောန့် ကိုယ်တော်ဟာ သူးနို့လေ ဂူလောင်းဟို့ ပုလန်ဟို့ ထွပ်ခိုင်းဘီးဟာ မီးမဂန်းဟူးရဲ့ မိဖလေန ကိုယ်တော်နတူးဒု ပါလာဟူ တမဲ့တော် သောင်းပါးဟို့ ခေါ်ဘီး မီးမဂန်းဟူး ထားဟူးဟူ နေရာဟို့ သွားလေဟယ်။

41 ကိုယ်တော်ဟာ သူ့ရဲ့လတ်ဟို့ ကိုင်ဘီးဟာ “တလိသကုမိ” ဆိုဘီး သူ့ဟို့ ပြောလေဟယ် “မီးမငယ်၊ နန့်ဟို့ ငါပြောမယ်၊ ထလိုက်!” ဆိုဘီး ခံပါယ်ရဟယ်။

42 ရှစ်ရှင်းဘဲ သူဟု ထဘီးဟာ စဘီး ပတ်ပတ်လည်လမ်းရှော့-က်လေဟယ်။ (သူဟု သတ် ဆယ့်နှေ့နှစ်ရှိဟယ်။) အယ်မျိုး ဖြစ်ပျစ်ဟူးဟူ ခီမာ သူးနို့လေ ဂူလောင်းဟာ ရရာတိုင်း အံ့ဩဟူးဂေဟယ်။

43 အယ်ဘေမဲ့ ယေရှုဟာ ဖယ်သူ့ဟို့လည်း ပြောဘဲဟို့ တွပ် သူးနို့ဟို့ တင်းတင်းကျပ်ကျပ်ဟူး မိန့်ပေးလိုက်ဟယ်။ အယ်ဘီးဟာ “သူ့ဟို့ စားဟို့တွပ် တခုခုပေးလိုက်ပါ” ဆိုဘီး မိန့်တော်မူလေဟယ်။

6

ယေရှုဟာ နာဇရက်မြို့မှာ ငြင်းပယ်ခံယူကြောင်း
(မသေ ၁၃.၅၃-၅၈; လုကာ ၄.၁၆-၃၀)

¹ ယေရှုဟု အယ်နေရာဟုနေ ထွပ်ဟူးဘီးနု သူမြို့ဟို့
ပုလန်ဟူးလေဟယ်။ ကိုယ်တော်ရဲ့ တမဲ့တော်လေလည်း
လိုက်ဟူးလေဟယ်။

² ဒန်းနေမှာ ကိုယ်တော်ဟာ ဝါလယ်ဇရပ်မှာ စဘီးဟာ
သွန်သန်လေဟယ်။ အယ်နေရာမှာ လူလေဘောင်ဂီး ရှိနေ
ဘီး ကိုယ်တော် သွန်သန်ဇာလေဟို့ လူလေဟုကြားရခီမှာ
ရရာတိုင်း အံ့ဩဂေဟယ်။ “အယ်ဇာလေ ဂူလောင်းဟို့ သူ
ဟာ ဖယ်နေရာဟု ရဟူးနူး” ဆိုဘီး သူးနို့ဟာ မေးလေ
ဟယ်။ “သူဟို့ ပေးဟူးဟူပညာဟု ဖယ်မျိုးပညာနူး။ သူ
ဟာ အယ်နိမိတ်လတ်ခဏာလေဟို့ ဖယ်မျိုးလောက်နူး။

³ သူဟာ လတ်သမား မှဟုလော။ မာရီရဲ့သား၊ ယာကုပ်၊
ယောသေ၊ ယုဒန ရှိမုန်လေရဲ့နောက် မှဟုလော။ သူညီမ
လေဟု အယ်နားမာဘဲ့ နေဂေဟယ် မှဟုလော။” အယ်
ကြောန့် သူးနို့လေဟာ ကိုယ်တော်ဟို့ ငြင်းပယ်ဂေလေဟ
ယ်။

⁴ ယေရှုဟုလည်း သူးနို့ဟို့ “ပရောဖက်လေဟာ သူးနို့ရဲ့
မြို့၊ သူးနို့ရဲ့ ရွှေမျိုးလေန သူးနို့ရဲ့ အီသူအီသားလေဟု
လွဲဘီး နေရာတိုင်းမှာ လေးစားခံရဟယ်” ဆိုဘီး မိန့်တော်
မူလေဟယ်။

⁵ ကိုယ်တော်ဟု အယ်မြို့မာ ကျန်းမာဘဲဟူ လူတချို့ ထတ်မာ ကိုယ်တော်ရဲ့ လတ်လေဟို့ တန်ဘီးဟာ သူးနို့ဟို့ ကျန်းမာစေဇာဟုလွဲဘီး ဖြာနိမိတ်လတ်ခဏာလေလည်း လောက်နိုင်ဟူ။

⁶ ကိုယ်တော်ဟု ရရာတိုင်း အံ့ဩဟားဟယ်။ ဖြားဖြစ် ကြောနဲ့နဲ့ဆိုဟာ အယ်လူလေဟာ ယောင်ကြည်ဘဲကြော နဲ့ ဖြစ်ဟယ်။

ယေရှုဟာ တမဲ့တော်ဆယ့်နှေ့ပါးဟို့ စေလွှတ်ဟူကြော န်း

(မဿဲ ၁၀.၅-၁၅; လုကာ ၉.၁-၆)

အယ်ဘီးန ယေရှုဟာ အယ်နေရာဟု ဝါလေဟို့ လှည့်လည်သွားဘီးဟာ လူလေဟို့ သွန်သန်လေဟယ်။

⁷ ကိုယ်တော်ဟု တမဲ့တော် ဆယ့်နှေ့ပါးဟို့ တူးဒူခေါ် ဘီးဟာ နှေ့ယော့-က်စီ တွဲခိုင်းဘီး သူးနို့ဟို့ စေလွှတ်လေ ဟယ်။ ကိုယ်တော်ဟု သူးနို့ဟို့ ညစ်ညူးဟူနတ်လေဟို့ နိုင်ရဟူ ခွမ့်အာဏာဟို့လည်း ပေးဘီး

⁸ “ခရီးတွပ် နန်းနို့နတူးဒူ တောန်အူးတခုဟုလွဲဘီး တခြားဇာလေ ယူဂေန။ စားဇာ၊ လွယ်အံ၊ နန်းနို့ရဲ့ ခါး ဗတ်လေထဲမာ ကပ်လေဟို့ ထဲ့ဆောန်ဂေန။

⁹ ခေနပ်လေဟို့ စီးဂေပါ၊ အယ်ဘီးဟာ အန်းဂီပိုတထ ည်ဟို့လည်း ယူဆောန်ဂေန။”

10 ကိုယ်တော်ဟု “ဖယ်နေရာမဆို နန်းနို့လေဟို့ လတ်ခံ
ဟူအီမာ နန်းနို့လေဟူ အယ်နေရာဟု ထွပ်ခန်ထံ အယ်အီ
မာဘဲ တည်းနေဂေ။

11 နန်းနို့လေဟူ မြို့တမြို့ဟို့ ရော့-က်လာဘီး အယ်
မြို့ဟု လူလေဟူ နန်းနို့လေဟို့ လတ်ခံဟု အယ်မျိုးမှုဘဲ
နေဟူ နန်းနို့လေဟို့ နားထောန်ဂေဟုဆိုဟူ၊ နန်းနို့ခေဖွား
ဟု မှလေမဟို့ ခါခလဘီးဟူ ထွပ်ဟူးဂေ။ အယ်ဇာဟူ
သူးနို့တွပ် သတ်သေတခု ဖြစ်ဟယ်!” ဆိုဘီး သူးနို့ဟို့ မိန်
ပေးလေဟယ်။

12 အယ်ကြောန် သူးနို့ဟူ ထွပ်ဟူးဘီး လူလေ နောန်ဒ
ရဟို့ကြောန်းဟို့ ဟောပြောဂေဟယ်။

13 သူးနို့ဟူ နတ်ဆိုးလေဘောင်ဂီးဟို့ နှန်ထုဂေဟယ်။
အယ်ဘီးဟူ ကျန်းမာဘဲဟူ လူလေဘောင်ဂီးဟို့ ဆိန် လူး
ဘီးဟူ သူးနို့ဟို့ ကျန်းမာစေဟယ်။

ဗတုတိဇိယောဟန် သေဟူးဟူကြောန်း

(မသံ ၁၄.၁-၁၂: လုကာ ၉.၇-၉)

14 အယ်ခီမာ အယ်ကြောန်း ဂူလောင်းဟို့ ဟေရုဒ်မန်း
ဂီး*ဟူ ကြားဟူးဘီ။ ဖြားဖြစ်ကြောန်းနူးဆိုဟူ ယေရှုရဲ့
နာမယ်ဟု နေရာတိုင်းဟို့ ပုလုံန့်ဟူးလေဟယ်။ လူတချို့
ပြောနေဇာဟု “ဗတုတိဇိယောဟန်ဟူ သေရာဟုနေ ထ

6:11 ၆.၁၁ တ ၁၃.၅၁ 6:13 ၆.၁၃ ယာ ၅.၁၄ 6:14 ၆.၁၄, ၁၅

မ ၁၆.၁၄: မာ ၈.၂၈: လု ၉.၁၉ * 6:14 ၆.၁၄ ဟေရုဒ်မန်းဂီး၊
ဂါလိလဲပြည်ရဲ့ခေါင်းဆောင် ဟေရုဒ်အန္တီပ။

မြေ-က်ဟူးဘီ! အယ်ကြောန့် သူဟာ နိမိတ်လတ်ခဏာ
လေ ပြဟွံတွပ် အယ်မျိုးတဂိုး ရှိနေဟယ်။”

15 အယ်ဘေမဲ့လည်း တခြားလူလေ ပြောဇာဟု “သူဟာ
ဇေလိယဖြစ်ဟယ်။”

တခြားလူလေ ပြောဇာဟု “သူဟာ ရှေးဟု ပရောဖက်
လေ တပါးပါးမျိုးဘွဲ ပရောဖက်တပါးဖြစ်ဟယ်။”

16 ဟေရုဒ်ဟု ကြားရဟူ ခီမာ သူဟု “အယ်လူဟာ ဗ
တုတိဇိယောဟန် ဖြစ်ဟယ်! ငါဟာ အယ်လူရဲ့ ခေါင်းဟွံ
ဖြတ်လိုက်ပီးဘီဘွဲ။ အယ်ဘေမဲ့ အယ်လူဟာ သေရာဟု
နေ ထမြေ-က်ဟူးဘီ!” ဆိုဘီး ပြောလေဟယ်။

17 ဟေရုဒ် ကိုယ်တိုင်ဘွဲ ယောဟန်ဟွံ ဖမ်းဆီးဟွံ မိန့်ထု
ဟူးကြောန့် သူဟွံ တောက်နှောင်ဘီး ထောန်ထဲမာ ထား
ဟူးလေဟယ်။ ဟေရုဒ်ဟာ အယ်မျိုးလောက်ဇာဟု သူ
ညီ ဖိလိပ္ပုရဲ့ မယား၊ ဟေရောဒိဟွံ ယူဟူးဟူကြောန့် ဖြစ်
ဟယ်။

18 ဖြားဖြစ်ကြောန့်နူးဆိုဟာ ဗတုတိဇိယောဟန်ဟု ဟေ
ရုဒ်ဟွံ “နန်ဟာ နန်ညီရဲ့ မယားဟွံ ယူဇာဟာ ပညတ်တော်
န ညီဟု!” ဆိုဘီး ပြောဟူးကြောန့် ဖြစ်ဟယ်။

19 အယ် ကြောန့် ဟေ ရော ဒိ ဟာ ယော ဟန် ဟွံ
ရန်ငြိုးထားဘီးဟာ သတ်ဟွံတွပ် လိုရှင်ဟယ်။ အယ်ဘေ
မဲ့ ဟေရုဒ်ကြောန့် သူဟာ ခွမ်ရဟု။

20 ဟေရုဒ်ဟာ ယောဟန်ဟို ကြော့-က်ဟယ်။ ဖြားဖြစ် ကြော့နဲ့နဲ့ဆိုဟာ ယောဟန်ဟာ ဖြော့နဲ့မတ်ဘီး သန့်ရှင်း ဟူလူ ဖြစ်ဟယ် ဆိုဇာဟို သူသိဟူးဟယ်။ အယ်ကြော့ နဲ့ သူဟာ သူဟို လောင်းလောင်ခြောင်းခြောင်ဟူး ထား ဟူးလေဟယ်။ သူဟောပြောဇာလေဟို ကြားရဟူ ခီတိုင်း ရရာတိုင်း စီနှောင့်ယှစ် ဖြစ်ဘေမဲ့လည်း သူဟာ သူ့ရဲ့ ဟောပြောဇာဟို နှစ်သက်ဘီး နားထောန်တတ်ဟယ်။

21 နော့-က်ဆောင်းမာ ဟေရောဒိဟာ ခွမ်ရေး ရဟူးဟယ်။ အယ်ခွမ်ရေးဟာ ဟေရုဒ် မွေးနေ့မာ ဖြစ်ဟယ်။ အယ် နေ့မာ ဟေရုဒ်ဟု ထိတန်းစိုးရ ရာရှိဂီးလေ၊ တပ်မတော် ရာ ရှိဂီးလေ၊ ဂါလိလဲနယ်ရဲ့ ခေါင်းဆာန်ဂီးလေ အားလောင်း တွပ် စားသော့-က်မွဲဂီး ကျင်းပပေးလေဟယ်။

22 ဟေရောဒိရဲ့ မီးဟူး†ဟု လာဘီးဟာ ကပြလေဟယ်။ အယ်ခီမာ ဟေရုဒ်နု သူ့ရဲ့ ဧည့်သည်လေဟာ ကျေနပ်ဟူးလေဟယ်။ အယ်ကြော့နဲ့ မန်းဂီးဟု မီးမငယ်ဟို “နန်ဖြားဇာလိုရှင်နူး။ နန်လိုရှင်ဇာလေဟို ငါပေးမယ်” ဆိုဘီး ပြောလေဟယ်။

23 “ငါ့နှိုင်ငံတဝပ်ဟို နန်တောန်းမယ် ဆိုဟာ ငါတကယ် ပေးမယ်!” ဆိုဘီးဟာ ဒီပေးဘီး ပြောလေဟယ်။

24 အယ်ကြော့နဲ့ မီးမငယ်ဟူးဟု ထွပ်ဟူးဘီးဟာ သူ့ရဲ့ မိဟို မေးလိုက်ဇာဟု “ကျွန်မဟု ဖြားဇာတောန်းရဟို

† 6:22 ၆.၂၂ ဟေရောဒိရဲ့ မီးဟူး၊ တချို့ မူရင်းလတ်ရေးမူလမာ သူ့သမီးဟူး ဟေရောဒိ၊ ဆိုဘီး ရှိဟယ်။

နှုံး!” သူ့ရဲ့ မိဟု “ဗတုတိဇိယောဟန်ရဲ့ ခေါင်းဟို့ တောန်းပါ” ဆိုဘီး ပြောလေဟယ်။

25 မီးမငယ်ဟု ရှစ်ရှင်းဘဲ ဟေရုဒ် မန်းဂီးနားဟို့ မြန်းမြန်ဟူး ပုလန်ဟူးဘီးဟာ “ဗတုတိဇိယောဟန်ရဲ့ ခေါင်းဟို့ လန်းဗန်းထတ်မာ တန်ဘီးဟာ ခုပေးပါ” ဆိုဘီး တောန်းဆိုလေဟယ်။

26 အယ်မျိုး တောန်းဆိုဟူကြောန့် မန်းဂီးဟာ ရရာတိုင်း ဝန်းနဲဟူးဟယ်။ အယ်ဘေမဲ့ ဧည့်သည်လေရှေ့မာ သူ့ကိုယ်သူ ကီဆိုဟူးဟူကြောန့် သူဟာ ငြင်းနိုင်ဟုမ်း။

27 အယ်ကြောန့် မန်းဂီးဟု ယောဟန်ရဲ့ ခေါင်းဟို့ ယူလာဟို့တွပ် မိန်ပေးဘီးဟာ စောန့်တယော-က်ဟို့ ရှင်းရှင်းလွတ်လေဟယ်။ အယ်လူဟု ထောန်ထဲဟို့ သွားဘီးဟာ ယောဟန်ရဲ့ ခေါင်းဟို့ ဖြတ်လေဟယ်။

28 အယ်ခေါင်းဟို့ လန်းဗန်းထတ်မာ တန်ဘီးဟာ ယူဆောန်လာဘီး မီးမငယ်ဟူးဟို့ ပေးလေဟယ်။ သူဟု လည်း သူ့ရဲ့ မိဟို့ ပုလန်ပေးလေဟယ်။

29 ယောဟန်ရဲ့ တမဲ့တော်လေဟု အယ်ဒန်းဟို့ ကြားဟူခီမာ လာဘီး ယောဟန်ရဲ့ လောန်းဟို့ ယူဘီးဟာ ဂူထဲမာ ထားလိုက်ဂေဟယ်။

ယေရှုဟာ လူအောက်ဂီးဟို့ စားဇာကျေးဟူကြောန်း
(မဿဲ ၁၄.၁၃-၂၁; လုကာ ၉.၁၀-၁၇; ယောဟန် ၆.၁-၁၄)

30 တမန်တော်လေဟာ ယေရှုနားမာ စုဂေဘီးဟာ သူးနို့ လောက်ဆောန်ဘီး သွန်သန်ဟူးဟူဇာ ဂူလောင်းဟို့ ကိုယ် တော့်ဟို့ လျော့-က်လေဟယ်။

31 အယ်နေရာဟို့ လူလေဘောင်ဂီးဟာ သွားလိုက်လာ လိုက် လောက်နေဟူကြောန့် ယေရှုန တမဲ့တော်လေဟာ စားဟို့ ခီဟို့မှ မေ့ဟုမ်း။ အယ်ကြောန့် သူဟ “ငါနတူးဒု တံဆိဟူ နေရာဟို့ သွားဘီးဟာ ရှစ်ဟူးနားယူ ဂေဇို” ဆို ဘီး သူးနို့ဟို့ မိန့်တော်မူလေဟယ်။

32 အယ်ကြောန့် ယေရှုန တမဲ့တော်လေဟာ တံဆိဟူ နေရာတခုနားဟို့ လှေန ထွပ်ဟူးဂေဟယ်။

33 သွားလိုက်ဇာဟို့ လူလေဟာမြင်ဟူ ခီမာ ကိုယ်တော် န တမဲ့တော်လေဘဲ ဆိုဘီး သိဟူးဟူကြောန့် မြို့လေဝါ လေဟာ လူလေဟာ ယေရှုသွားလိုက်ဟူ နေရာဟို့ မြန်းမြန် ဟူး ကူးကြောင်းရှော့-က်ဘီးဟာ ယေရှုန တမဲ့တော်လေ ရော့-က်ခန် အယ်နေရာဟို့ ရင်ရော့-က်နေဂေဟယ်။

34 ယေရှုဟာ လှေဟုနေ ထွပ်ဟူ ခီမာ ကိုယ်တော်ဟာ လူအောက်ဂီးဟို့ မြင်ဟူးဘီး ကိုယ်တော်ဟာ သူးနို့တွပ် သနားဟူစိ ဖြစ်ဟူးလေဟယ်။ ဖြားဖြစ်ကြောန့်နူးဆိုဟာ သူးနို့ဟာ သိုးထီးမားမော့ဘဲဟူ သိုးလေမျိုး ဖြစ်နေဟယ်။ အယ်ကြောန့် ကိုယ်တော်ဟာ သူးနို့ဟို့ ကြောင်းရာလေ ဘောင်ဂီးဟို့ စဘီးဟာ သွန်သန်ဟယ်။

35 ညဉ့်မိုက်ခါနီး ရော့-က်လာဟူ ခီမာ တမဲ့တော်လေဟာ

ယေရှုနားဟို့ လာဘီးဟာ “အယ်နေရာဟာ တောဖြစ်နေဟူ
ကြောန့် လူလေလည်း နေဘဲဟူ နေရာဖြစ်ဟယ်။ နေ့-က်
ကလဟားဘီ။

³⁶ စားဇာသွားဝယ်ဘီး စားနိုင်ဟို့တွပ် လူလေဟို့ နီးနား
မာရှိဟူ တောဝါလေဟို့ လွတ်လိုက်ပါ” ဆိုဘီး လျှော့-က်
ဂေဟယ်။

³⁷ ယေရှုဟာ “နန်းနို့လေဘဲ သူးနို့ဟို့ စားဇာတခုခု ကျွေး
လိုက်” ဆိုဘီး မိန့်တော်မူလေဟယ်။

အယ်ခီမာ တမဲ့တော်လေဟာ “ကျွန်တော့်လေဟာ ငွေဒန်း
ဂါး[‡] ၂၀၀ ဖိုးန စားဇာဝယ်ဘီး အယ်လူလေဟို့ ကျွေးရဟို့
လော” ဆိုဘီး လျှော့-က်လေဟယ်။

³⁸ ယေရှုဟာ “နန်းနို့လေမာ မုဖယ်မျှလော့-က်ရှိနူး။ သွား
ဘီးဟာ ကေ့ကေ့” ဆိုဘီး မိန့်တော်မူလေဟယ်။

သူးနို့လေဟာ ကေ့ဟူ ခီမာ “မုငါးလောင်းန ငါးနေ့ကော
န်ရှိဟယ်” ဆိုဘီး လျှော့-က်လေဟယ်။

³⁹ အယ်ဘီးန ယေရှုဟာ လူလေ ဂူလောင်းဟို့ အောက်စု
ခွဲဘီးဟာ ဖြစ်ပန်လေထတ်မာ ထိုင်ခိုင်းလိုက် ဆိုဘီး တမဲ့
တော်လေဟို့ လောက်ဟို့တွပ် ပြောလေဟယ်။

⁴⁰ အယ်ကြောန့် လူလေဟာ တရာတဖွဲ့န ငါးဆယ်တဖွဲ့
တန်းလိုက်ထိုင်ဂေဟယ်။

[‡] 6:37 **၆.၃၇ ငွေဒန်းဂါး၊** ငွေဒန်းဂါးတယွှားဟာ တရစ်ဇာလောက်ဟူ
လောက်အားခဖြစ်ဟယ် (ရှု မ ၂၀.၂)။

41 အယ်ဘီးန ယေရှုဟု မုငါးလောင်းန ငါးနှေ့ကောန်
 ဟို့ ယူဘီးဟာ ကောန်းဂန်ဟို့ မျှော်ကောဘီး ဘုရားသခင်
 ဟို့ ကျေးဇူးတော် ချီးမွမ်းလိုက်ဟယ်။ ကိုယ်တော်ဟာ မု
 လေဟို့ ဖဲဘီးဟာ လူလေဟို့ ဝီပေးဟို့တွပ် တမဲ့တော်လေ
 ဟို့ မုလေ ပေးလိုက်ဟယ်။ ကိုယ်တော်ဟာ ငါးနှေ့ကောန်
 ဟို့လည်း သူးနို့လေ ဂူလောင်း ကြားထဲမာ ခွဲဝီပေးလိုက်
 ဟယ်။

42 လူတိုင်းဟာ စားဘီး မိုက်ပုလဲဟားဂေဟယ်။

43 အယ်ဘီးန တမဲ့တော်လေဟု စားဘီး ကျန်နေဟူ မုန
 ငါးလေရဲ့ ကုလိုးပဲလေဟို့ လိုက်ကော့-က်ဟူ ခီမာ ဆယ်
 နှေ့တောန်းပုလဲ ရဂေဟယ်။

44 မုစားဟူ ယော့-က်ကျား ရေတွပ်ဟာ ၅,၀၀၀ ရှိလေ
 ဟယ်။

ယေရှုဟာ ရေထတ်မာ လမ်းရှော့-က်ဟူကြောင်း
 (မသဲ ၁၄.၂၂-၃၃; ယောဟန် ၆.၁၅-၂၁)

45 ယေရှုဟာ လူအောက်ဂီးဟို့ ပုလန်လွတ်နေဒူးမာ ရှစ်
 ရှင်းဘဲ တမဲ့တော်လေဟို့ လှေထတ်ဟို့ တတ်ခိုင်းဘီး အိုင်
 ရဲ့ ဟို့ဖတ်ကမ်းဟု ဗက်ဇဲဒမြို့ဟို့ ရင်ဦးဆောင်း သွားခိုင်း
 လိုက်ဟယ်။

46 ယေရှုဟု လူလေဟို့ နှောက်ဆစ်ဘီးန ဆုတောန်းဟို့
 တွပ် တောန်ထတ်ဟို့ တတ်ဟားဟယ်။

47 ညဉ့်မိုက်လာ ဟူ ခီမာ တမဲ့တော်လေရဲ့ လှေဟု
 ရေအိုင်ရဲ့ လယ်မာရှော့-က်နေဘီး ယေရှုဟု တယော့-က်

ဒဲ ကူးထတ်မာ ရှိလေဟယ်။

48 လေဆန်ဟို့ လှေလှော်နေဟူကြောန့် ရရာတိုင်း ပန်းနေဟူ တမဲ့တော်လေဟို့ ကိုယ်တော်ဟု မြင်ဟူးလေဟယ်။ အယ်ကြောန့် မိုးလန်းသောင်းနာရီန ခြော-က်နာရီ ကြားမာ ကိုယ်တော်ဟု ရေထတ်မာ လမ်းရှော-က်ဘီးဟုာ် သူးနို့နားဟို့ ရော-က်လာလေဟယ်။ ကိုယ်တော်ဟု သူးနို့ဟို့ ကျော်ဖြတ်ဟို့ လောက်လေဟယ်။

49 အယ်ဘေမဲ့ တမဲ့တော်လေဟု ရေထတ်မာ ကိုယ်တော်ဟု လမ်းရှော-က်နေဇာဟို့ မြင်ဟူးဟူ ခီမာ “ဖုကသေ ဖြစ်ဟယ်!” ဆိုဇာဟို့ ထန်ဘီးဟု အော်ဟစ်ဂေဟယ်။

50 သူးနို့လေ ဂူလောင်းဟု ယေရှုဟို့ မြင်ဟူ ခီမာ ထိလန်နေဂေဟယ်။

ယေရှုဟု ရှစ်ရှင်းဘဲ့ “သတ်တိရှိဂေ!” ဆိုဘီး ပြောလေဟယ်။ “ငါဘဲ့ဖြစ်ဟယ်။ ကြော-က်ဂေန!”

51 အယ်ဘီးန သူးနို့ရှိနေဟူ လှေထတ်ဟို့ တတ်ဟူးဟူ ခီမာ လေဟု ငြိဟူးလေဟယ်။ တမဲ့တော်လေဟု ရရာတိုင်း အံ့ဩဂေဟယ်။

52 ပြားဖြစ်ကြောန့်နူးဆိုဟု သူးနို့ဟု လူ ၅,၀၀၀ ဟို့ မုကျေးဟူ ဓိပါယ်ဟို့ နားလည်ဂေဘဲန သူးနို့ရဲ့ စိန်လောင်းဟု မာကျောဂေဟယ်။

ယေရှုဟု ဂင်နေသရက်မာ လူနာလေဟို့ ကျန်းမာစေ

§ 6:48 6.၄၈ လမ်းရှော-က်ဘီးဟု၊ အယ်မျိုးမှုဘဲ့နေဟု သူးနို့လေန ပူးပေါင်းလေဟယ်။

ဟူကြောန်း

(မဿဲ ၁၄.၃၄-၃၆)

⁵³ သူ့နှို့ဟာ အိုင်ဟို့ ကူးဟားဂေဘီး ဂင်နေသရက်မြို့ဟို့ ရှေ့-က်လာဂေ လေဟယ်။ အယ်နေရာမာ လေဟို့ ခယ်လိုက် လေဟယ်။

⁵⁴ သူ့နှို့လေဟာ လေထတ်ဟုနေ ဆင်းလိုက်ဟူ ခီမာ ရှစ်ရှင်းဘဲ လူလေဟု ယေရှုဟို့ မှတ်မိဂေဟယ်။

⁵⁵ အယ်ကြောန်း သူ့နှို့လေဟာ ဒေသတခုလောင်းဟို့ ပုလုံနဲ့အောန် ပုလေးဟားဂေဘီးဟာ ကိုယ်တော်ရှိဟယ် ဆိုဘီး ကြားဟားဟူ နေရာဟို့ လူနာလေဟို့ ထမ်းစင်လေန ကိုယ်တော်နားဟို့ ခေါ်လာဂေဟယ်။

⁵⁶ ယေရှုသွားဟူ ဝါလေ၊ မြို့လေ၊ နေရာတိုင်းဟု လူလေဟု လူနာလေဟို့ ဆေးလေမာ ခုလဟားဂေဘီး ကိုယ်တော်ရဲ့ ဝတ်လောင် ပန်းဗွားဟို့ဘဲ ထိခွမ်းပေးဟို့တွပ် လူလေဟု တောင်းဗန်ဂေဟယ်။ အယ်ဘီးန ဝတ်လောင်ဟို့ တို့ထိဟူ လူလေဂူလောင်းဟာ ကျန်းမာဟားဂေဟယ်။

7

ရှေးလူဂီးလေရဲ့ သွန်သန်ကြောန်း

(မဿဲ ၁၅.၁-၉)

¹ တချို့ ဖာရိရှဲလေန ယေရုရှလင်မြို့ဟုနေ လာဂေဟူ ကျမ်းတတ်ဆရာလေဟာ ယေရှုပတ်ပတ်လည်မာ စုနေဂေဟယ်။

² ကိုယ်တော်ရဲ့ တဗွဲတော်လေ တချို့ဟု စင်ကြယ်ဘဲ ဟူ လတ်လေန စာစားနေဇာဟို့ သူးနို့လေဟု ဒိထားမိဟွား ဟွယ်။

³ ဖြားဖြစ်ကြောန့်နူးဆိုဟာ ကျန်နေဟူ ယုဒလူမျိုးလေန ဖာရိရှဲလေဟာလည်း သူးနို့ရဲ့ ရှေးလူဂီးလေဟုနေ လတ်ခံ ဟွားဟူ သွန်သန်မှု နှော-က်ဟို့ လိုက်ဘီး သူးနို့လေဟု မှ န်ဟူ နည်းလမ်းအားဖြင့် သူးနို့ရဲ့ လတ်လေဟို့ ဆေးဘဲန စာစားဂေဟု။

⁴ ဆေးဟုနေ ရလာဟူ ဖယ်ဇာဘဲဖြစ်ဖြစ် ရေန ရင်ဆေး ဘဲန စားဂေဟု။* အယ်ဘီးဟာ သူးနို့လေ လတ်ခံဟွားဟူ တခြားထောင်းဒန်းလေ နှော-က်ဟို့ လိုက်ဟွယ်။ ဥပမာ အိုးလေ၊ ခွပ်လေ၊ ကြေးဖလားခွပ်လေန ကဒန်လေဟို့† မှ န်ဟူနည်းလမ်းအားဖြင့် ဆေးဂေဟွယ်။

⁵ အယ်ကြောန့် ဖာရိရှဲလေန ကျမ်းတတ်ဆရာလေဟု “ဖြားဖြစ်ကြောန့် အယ်မျိုးသတ်ရှင်နူး။ ကိုယ်တော်ရဲ့ တဗွဲတော်လေဟု ရှေးလူဂီးလေရဲ့ လတ်ဆစ်ကမ်းဟွားဟူ သွန်သန်မှု နှော-က်ဟို့ လိုက်ဂေဟု။ အယ်မျိုးလိုက်ဟို့စား စင်ကြယ်ဘဲဟူ လတ်န စားဂေနူး” ဆိုဘီး ယေရှုဟို့ မေး ဂေဟွယ်။

⁶ ယေရှုဟု “ဟေရှာယဟု နန်းနို့လေ ကြောန်းဟို့ ပရော ဖက်ပြုဟွားဇာဟာ ရရာတိုင်း မှန်ဟွယ်! နန်းနို့လေဟာ

* 7:4 ၇.၄ ဆေးဟုနေ ရလာဟူ ဖယ်ဇာဘဲဖြစ်ဖြစ် ရေန ရင်ဆေးဘဲန စားဂေဟု၊ အယ်မျိုးမှုဘဲနေဟာ သူးနို့ဟာ ဆေးဟုနေ ရလာဇာလေဟို့ ရင်ဦးဆောင်း ရေန ဆေးဘီးမှ စားဟွယ်။ † 7:4 ၇.၄ တချို့ မူရင်းလတ်ရေးမူလေမာ ကဒန်လေ၊ ဆိုဇာ မေ့ဟု။

ကြောန်သူတော်လေ ဖြစ်ဟူကြောန် သူဟု အယ်မျိုးရေး
ဟားဟယ်။”

“ဘုရားသခင် မိန့်တော်မူဇာဟု အယ်လူလေဟာ ငါ့ဟို့
နှောက်န ရှိသေဟယ်။
အယ်ဘေမဲ့ သူးနို့ရဲ့ စိန်လောင်းဟု ငါ့န တကယ်ဘဲ
ရရာတိုင်း ဝီးနေဂေဟယ်။

7 ငါ့ဟို့ အလဂါး ကိုးကွယ်နေဟယ်။

ဖြားဖြစ်ကြောန်နူးဆိုဟာ သူးနို့ဟာ ဘုရားသခင်ရဲ့
ပညတ်တရားလေ ဖြစ်ဟယ် ဆိုဘေမဲ့
လူရဲ့ စည်းမျဉ်းလေဟို့ သန်ပေးလေဟယ်!”

8 “နန်းနို့လေဟု ဘုရားသခင်ရဲ့ ပညတ်တော်ဟို့ ဖယ်
ဟားဘီးဟာ လူလေရဲ့ သွန်သန်မှုလေဟို့ လိုက်နာဂေဟ
ယ်” ဆိုဘီး သူးနို့ဟို့ ပုလန်ဖြေတော်မူလေဟယ်။

9 အယ်ဘီးဟာ ယေ ရှုဟု ဆစ်ဘီး “နန်းနို့လေရဲ့
ကိုယ်ပိုင်သွန်သန်မှုဟို့ ကျင့်သောင်းနိုင်ဟို့တွပ် နန်းနို့လေ
ဟာ ဘုရားသခင်ရဲ့ ပညတ်တော်ဟို့ ပယ်ဟူဇာဟု ကျမ်း
ကျင်ဂေဟယ်။

10 ဖြားဖြစ်ကြောန်နူးဆိုဟာ မောရှေပညတ်ဟားဇာဟု
‘နန်းနို့မိဖဟို့ ရှိသေဂေ။ အယ်ဘီးဟာ ဖယ်သူဘဲဖြစ်ဖြစ်
ကိုယ်မိဖဟို့ ကီဆဲမယ် ဆိုဟာ သေဒန်ခံရမယ်။’

11 အယ်ဘေမဲ့ နန်းနို့ဟု အယ်မျိုးသွန်သန်ဘီး လူလေ
မာ သူးနို့ရဲ့ မိဖဟို့ ကူညီဟို့ တခုခုရှိဟယ် ဆိုဟာ ‘အယ်

ဇာဟာ ကော်ဘန်ဖြစ်ဟယ်' ဆိုဘီး ပြောဟယ် (အယ်ဓိပါယ်ဟု ဘုရားသခင်ဟို လူဘီးဟူ အောက်စာဖြစ်ဟယ်)၊

¹² အယ်မျိုးဆိုဟာ နန်းနို့ဟု အယ်အောက်စာလေဟို သောင်းပြုဘီးဟာ သူရဲ့ မိဖဟို ကူညီဟိုတွပ် ခွမ်းပေးဟယ်။

¹³ အယ်မျိုးဘဲ နန်းနို့လေဟု တခြားလူလေဟို လတ်ဆစ်ကမ်းလိုက်ဟူ သွန်သန်မှုဟာ ဘုရားသခင်ရဲ့ စကားတော်ဟို ဖျစ်ပစ်ဂေဟယ်။ အယ်ဆိုဟာ အယ်မျိုးဇာလေဘောင်ဂီးဟို နန်းနို့လေ လောက်ဂေဟယ်။”

လူဟို ညစ်ညူးစေဟူ ဇာလေကြောန်း
(မသဲ ၁၅.၁၀-၂၀)

¹⁴ အယ်ဘီးနု ယေရှုဟု လူအောက်ဂီးဟို သူနားဟို ပုလန်ခေါ်ဘီးဟာ “နန်းနို့အားလောင်း ငါ့စကားဟို နားထောန်ဘီးဟာ နားလည်ဂေ။

¹⁵ ပုလန်ဟုနေ လူထဲဟိုဝမ်ဘီး လူဟို ညစ်ညူးစေနိုင်ဟူဇာ ခုလည်း မေ့ဟူ။ လူထဲဟုနေ ထွပ်လာဟူဇာလေဟုဘဲ လူဟို ညစ်ညူးနိုင်ဟယ်။”

¹⁶ ‡

¹⁷ ကိုယ်တော်ဟာ လူအောက်ဂီးနားဟု ထွပ်ဟားဘီးဟာ အီထဲဟို ဝမ်ဟားဟူ ခီမာ တမဲ့တော်လေဟု အယ်ပေါင်ဥပမာကြောန်းဟို ကိုယ်တော့်ဟို မေးဂေဟယ်။

‡ 7:16 ၇.၁၆ တချို့ မူရင်းလတ်ရေးမူလေမာ ခန်းငယ် ၁၆ ဟို၊ နန်းနို့မာ နားရှိဟယ် ဆိုဟာ ကြားဂေ! ဆိုဘီး ထပ်ပေါင်းထဲဟားဟယ် (ရှု ၄.၂၃)။

18 ယေရှုဟု “နန်းနီလေဟု အယ်မျှလော့-က် သိဉာဏ် နဲရလော” ဆိုဘီး သူးနီဟို ပြောလေဟယ်။ “နန်းနီ နားလည်ဂေ့ ဟုလော။ ပုလန်ဟုနေ လူထဲဟို ဝမ်လာဟူ ဇာဟု လူဟို လောင်းဝ ညစ်ညူးစေနိုင်ဟု။

19 ဖြားဖြစ်ကြောနန်းဆိုဟာ အယ်ဇာလေဟု စိနလောင်းထဲဟို ဝမ်ဇာမူဟု။ စာအီထဲဟို ဝမ်ဟားဘီးန နော့-က်ဖေးအီထဲဟို ဆင်းဟားလေဟယ်။” (အယ်မျိုး မိန့်တော်မူဇာဟု စာဂူလောင်းဟာ သန်ရှင်းဟယ် ဆိုဘီး ယေရှု ကြေညာလိုက်ဟယ်။)

20 ကိုယ်တော်ဟု ဆစ်ဘီးဟာ “လူရဲ့ထဲဟု ထွပ်လာဇာလော့ လူဟို ညစ်ညူးစေဟယ်။

21 ဖြားဖြစ်ကြောနန်းဆိုဟာ လူရဲ့ စိနလောင်းထဲဟုနေ မှားယွင်းဟူ ကြံစည်လေဟု ထွပ်လာဘီး တရားဘဲဟူ မေထုန်ပြုရှင်း၊ ခိုးရှင်း၊ လူသတ်ရှင်း၊

22 အီထောန်ရေးဖော့-က်ပုလန်ရှင်း၊ လောဖကီးရှင်း၊ ကောန်းဘဲဟူဇာ ဘောန်းဇောင်လောက်ရှင်း၊ လှည့်ဇားရှင်း၊ ပျော်ပါးလိုက်စားရှင်း၊ နာလိုရှင်း၊ ကဲ့ရဲ့ပြစ်တန်ရှင်း၊ မာနကီးရှင်း၊ လျှပ်ပေါ်ရှင်း၊

23 အယ်ကောန်းဘဲဟူ ဇာလေ ဂူလောင်းဟာ လူရဲ့ ထဲဟုနေ ထွပ်လာဘီးဟာ လူဟို ညစ်ညူးစေဟယ်။”

မီးမဂီးတယော့-က်ရဲ့ ယောင်ကြည်ရှင်းကြောန်း
(မဿဲ ၁၅.၂၁-၂၈)

24 အယ်ဘီးန ယေရှုဟု အယ်နေရာဟုနေ ထွပ်ဟားဘီးဟာ တုရုမြို့တော်န နီးဟူ ဒေသဟို့ သွားလိုက်ဟယ်။ ကိုယ်တော်ဟာ အီတအီထဲဟို့ ဝမ်ဟားဘီး အယ်နေရာမာ ကိုယ်တော် ရှိနေဟယ် ဆိုဇာဟို့ ဖယ်သူဟို့လဲ သိစေရှင်ဟူ။ အယ်ဘေမဲ့ ကိုယ်တော်ဟာ ပူးဘီးနေနိုင်ဟူ။

25 ညစ်ညူးဟူ နတ် ဝမ်ပူးနေဟူ သမီးငယ်ရဲ့ မိဟု ယေရှုကြောန်းဟို့ ကြားဟူ ခီမာ ကိုယ်တော်နားဟို့ ရှစ်ရှင်းရော-က်လာဘီးဟာ ခေရင်းမာ ဒူးထော့-က်လေဟယ်။

26 အယ်မီးမဂီးဟာ ရှုရိဖိနိတ်နယ်သူ လူမျိုးခြားဖြစ်ဟယ်။ သူ့ရဲ့ သမီးထဲဟု နတ်ဆိုးဟို့ နှန်ထုဟို့တွပ် ယေရှုဟို့ တောန်းလျှော့-က်ဟယ်။

27 အယ်ဘေမဲ့ ယေရှုဟု “သားမီးလေဟို့ ရင်ဦးဆောင်းကျွေးခွံပေးပါ။ သားမီးလေရဲ့ စားဇာဟို့ ယူဘီးဟာ ခွီးလေဟို့ ပစ်ပေးဇာဟာ မှန်ဟု” ဆိုဘီး ပုလန်ဖြေလေဟယ်။

28 အယ်မီးမဂီးဟု “သခင်၊ ဗွဲအော့-က်ဟု ခွီးလေဟို့မှ သားမီးလေရဲ့ စားကြွင်းစားကျန်လေဟို့ စားရဂေဟယ်!” ဆိုဘီး ပုလန်လျှော့-က်လေဟယ်။

29 အယ်ကြောန် ယေရှုဟု “အယ်မျိုး ပုလန်လျှော့-က်ဟူကြောန် အီဟို့ ပုလန်ဟားလိုက်။ နတ်ဆိုးဟာ နန့်သမီးထဲဟုနေ ထွပ်ဟားဘီ ဆိုဇာဟို့ နန့်တို့ရလေမယ်!” ဆိုဘီး သူ့ဟို့ မိန့်တော်မူလေဟယ်။

30 အယ်မီးမဂီးဟု အီဟို့ ပုလန်ရော့-က်ဟားဟူ ခီမာ

သူ့ရဲ့ သမီးဟာ အိယာထဲမှာ လဲလျောင်းနေတာကို တွေ့ရတာ
ဟု သူ့နားဟု နတ်ဆိုး ထွပ်ဟူးပီးဘီ ဆိုတာကို သိရလေ
ဟုယ်။

ယေရှုဟု ဆွဲအနားပန်းနေတာကို ပျော့-က်စေကြောင်း

³¹ အယ်ဘီးန ယေရှုဟု တုရုမြို့တော်ရဲ့ နီးနားဝန်းကျ
င်ဟု ထွပ်ဟူးဘီး ဇိဒန်မြို့တော်ကို ဖြတ်ဘီး ဒေကာပေါ
လိနယ် ဟုတဆင့် ဂါလိလဲအိုင်ကို ဆစ်သွားလိုက်ဟုယ်။

³² လူတချို့ဟု ဆွဲအနားပန်းနေဟူ လူတယော့-က်ကို
ကိုယ်တော်နားကို ခေါ်လာဟုယ်။ အယ်ဘီးဟု သူးနို့ဟု
သူ့ထတ်မှာ လတ်တန်ပေးဟို့တွပ် ယေရှုဟို့ တောင်းဗန်
လေဟုယ်။

³³ အယ်ကြောန့် ယေရှုဟု သူ့တယော့-က်ထဲဟို့ဘဲ လူ
အောက်ဂီးထဲဟုနေ ခေါ်ဟူးဘီးဟု အယ်လူရဲ့ နားလေ
ထဲဟို့ လတ်ညှိုးဟို့ ထိုးသွမ်းလိုက်ဘီး၊ ထိုးရယ်န ထိုးဘီး
အယ်လူရဲ့ လျှာဟို့ တို့လိုက်ဟုယ်။

³⁴ အယ်ဘီးန ယေရှုဟု ကောင်းဂန်ဟို့ မျှော်ကော့ဘီး
သတ်ပြင်းခုလဘီးဟု “ဖေသ” ဆိုဘီး အယ်လူဟို့ မိန့်
တော်မူလေဟုယ်။ အယ်ဓိပါယ်ဟု “ပွမ့်စေ!” ဆိုဘီး ဖြစ်
ဟုယ်။

³⁵ ရှစ်ရှင်းဘဲ အယ်လူရဲ့ နားဟု ပွပ်လာဘီးဟု ခယ်
ဟူးဇာခံရဟူ သူ့လျှာလေဟု လွတ်ဟူးဘီး ပီးပီသသ
ဟူး စကားပြောနိုင်ဟူးဟုယ်။

³⁶ ယေရှုဟု အယ်မျိုး ဖြစ်ပျစ်ကြောင်းကို ဖယ်သူ့ကို လည်း ပြောဘဲတို့တွင် လူလေဟု တားလိုက်ဟယ်။ အယ် ဘေမဲ့ ယေရှုဟု တားလေလေ သူးနှိုလေဟု အယ်ကြောင်း ကို ပိုဘီး ဟာ ဟောပြောနေဂေဟယ်။

³⁷ အယ်မျိုး ဖြစ်ပျစ်ကြောင်းကို ကြားရဟူလူလေဟု ရရာတိုင်း အံ့သြဂေဟယ်။ “ကိုယ်တော်ဟာ ရှိမျှဂူလော င်းဟို လျောက်ပတ်အော်န် လောက်ဟယ်! နားပန်းဟူ လူ လေဟို နားကြားစေဟယ်။ ဆွံ့အနေဟူ လူလေဟိုလည်း စကားပြောစေဟယ်!” ဆိုဘီး တအံ့တသြ ပြောဂေဟယ်။

8

ယေရှုဟု လူ ၄,၀၀၀ ဟို စားဇာကျွေးဟူကြောင်း
(မသံ ၁၅.၃၂-၃၉)

¹ ကြာခန်မာဘဲ နှော-က်ထပ် ရရာတိုင်းများဟူ လူအော က်ဂီးဟာ စုလာဂေဟယ်။ သူးနှိုလေမာ စားဟို ဖြားလည်း မှောဘဲဟူကြောန်၊ ယေရှုဟု တမဲ့တော်လေဟို သူနားဟိုခေါ် ဘီး ပြောလိုက်ဇာဟု၊

² “အယ်လူလေဟို ငါသနားဟယ်။ ဖြားဖြစ်ကြောန်နူး ဆိုဟာ သူးနှိုဟာ ငါနတူးဒူ သောင်းရစ်လောင်းလောင်း ရှိ နေဂေဘီး ခုစားဟို ဖြားလည်းမှောဘီး။

³ သူးနှိုထဲဟု တချို့ဟာ ဝီးဟုနေလာရဟူကြောန် သူးနှို ဟို ငါဟု ကျွေးဘဲန အီပုလန်ခိုင်းမယ် ဆိုဟာ သူးနှိုလေ ဟု လမ်းမာ အားပြတ်ဂူလေ့မယ်။”

4 တမဲ့တော်လေဟု “လူမွှော့ဘဲဟု နေရာမာ ဖယ်သူဟု အယ်လူလေ ဂူလောင်းဟို့ လော့-က်အောန်ကျွေးဟို့ မဟို့ ဖယ်ဟု ရနိုင်ဟို့နူး” ဆိုဘီး ယေရှုဟို့ ပုလန်လျော့-က်ဂေ့ဟယ်။

5 ယေရှုဟု “နန်းနို့မာ မုဖယ်မျှလော့-က်ရှိနူး” ဆိုဘီး မေးလေဟယ်။

တမဲ့တော်လေဟု “မုခွန်နစ်လောင်းရှိဟယ်” ဆိုဘီး ပုလန်လျော့-က်လေဟယ်။

6 ကိုယ်တော်ဟု လူအောက်ဂီးဟို့ မုလေမာ ထိုင်ခိုင်းလိုက်ဟယ်။ အယ်ဘီးန မုခွန်နစ်လောင်းဟို့ ယူဘီးဟု ဘုရားသခင်ဟို့ ကျေးဇူးတော် ချီးမွမ်းလိုက်ဘီး၊ မုလေဟို့ ဖဲလေဟယ်။ အယ်ဘီးမု လူအောက်ဂီးဟို့ ဝီပေးဟို့ တွပ် တမဲ့တော်လေဟို့ ပေးလိုက်ဘီး၊ တမဲ့တော်လေဟု လူအောက်ဂီးဟို့ ဝီပေးလေဟယ်။

7 သူးနို့မာလည်း ငါးဂန်းဟူးလေ နဲနဲရှိလေဟယ်။ ယေရှုဟု အယ်ဇာလေတွပ် ကျေးဇူးတော် ချီးမွမ်းဘီးန ငါးလေဟို့လည်း ဝီပေးဟို့တွပ် တမဲ့တော်လေဟို့ ပြောလေဟယ်။

8 လူတိုင်းဟု ဗိုက်ပုလဲအောန်စားရဂေ့ဇာဟု။ အယ်ဘီးန တမဲ့တော်လေဟု စားဘီးကျန်နေဟူ ကုလိုးပဲလေဟို့ ပုလန်ကော့-က်သီးဟူ ခီမာ ခွန်နစ်တောန်းပုလဲရဟယ်။

9 လူ ၄,၀၀၀ လော့-က် ရှိဟယ်။ ယေရှုဟု လူလေဟို့ ပုလန်လွှတ်လိုက်ဘီး၊

¹⁰ ရှစ်ရှင်းဘုံ တမဲ့တော်လေနတူးဒု လှေထတ်ဟို့ တတ်ဟူးဘီး ဒါလမနုသဒေသဟို့ ကြွဟူးလေဟယ်။

ဖာရိရှဲလေဟ နိမိတ်လတ်ခဏာ တောန်းဂေဟူကြောန်း

(မသံ ၁၆.၁-၄)

¹¹ တချို့ ဖာရိရှဲလေဟာ ယေရှုနားဟို့ ရော့-က်လာဘီး ကိုယ်တော်န စဘီးဟာ ဂြင်းခူဂေဟယ်။ သူးနို့ဟ ကိုယ်တော်ဟို့ စမ်းသပ်ရှင်ဂေဟူကြောန်း ကောင်းဂန်ဘောင်ဟ နိမိတ်လတ်ခဏာတခုဟို့ လောက်ပြဟို့ ကိုယ်တော်ဟို့ တောန်းဆိုဂေဟယ်။

¹² အယ်ဘေမဲ့ ယေရှုဟ သူ့ရဲ့စိထဲမာ သတ်ပြင်းခလဘီးဟာ “အယ်ခေတ်လူလေဟ ဖြားဖြစ်ကြောန်း နိမိတ်လတ်ခဏာဟို့ တောန်းဂေဟူး။ နန်းနို့ဟို့ ငါ မှန်တိုင်းပြောမယ်! အယ်လူလေဟို့ ဖြားသတ်သေလည်း ပေးလေ့မယ်မူဟ!” ဆိုဘီး မိန့်တော်မူလေဟယ်။

¹³ ကိုယ်တော်ဟာ သူးနို့ဟို့ ထားရစ်ဘီး လှေထတ်ဟို့ ပုလန်တတ်ဘီးဟာ အိုင်ရဲ့ဟို့ဖတ်ကမ်းဟို့ စဘီးဟာ ကူးလေဟယ်။

ဖာရိရှဲလေဟ ဟေရုဒ်ရဲ့တဆေးကြောန်း

(မသံ ၁၆.၅-၁၂)

14 တမဲ့တော်လေဟာ မုယူလာဟို့ မေဟူးဟူကြောန် လှေထတ်မာ သူးနို့တွပ် မုတလောင်းဘဲရှိဟယ်။

15 ယေရှုဟု “ဖာရိရှဲလေရဲ တဆေးနု ဟေရုဒဲရဲ တဆေး ဟို့ ဒိထားဂေ” ဆိုဘီး သူးနို့ဟို့ ဒိပေးလေဟယ်။

16 တမဲ့တော်လေဟု သူးနို့ရှင်းရှင်းထဲမာ စဘီးဟာ ဆွေးနွေးနေဇာဟု “ကိုယ်တော်ဟာ အယ်မျိုးပြောဇာဟု နို့လေမာ ဖြားမုလည်း ပါလာဘဲကြောန်ဖြစ်ဟယ်။”

17 သူးနို့လေပြောနေဇာဟို့ ယေရှုဟာ သိနေလေဟယ်။ အယ်ကြောန် ကိုယ်တော်ဟု “ဖြားမုလည်း မှော့ဟူကြော န်းဟို့ နန်းနို့လေ ဖြားဖြစ်ကြောန် ဆွေးနွေးနေဂေနှူး။ နန်း နို့လေဟာ ခုထိ နားလည်ဂေသေးဟုလော။ နန်းနို့ သိဂေ သေးဟုလော။ နန်းနို့ရဲ စိန်လောင်းလေဟု မာကျောနေဟု ယ်လော။

18 နန်းနို့မာမျှစ်စိရှိဟယ် နန်းနို့ ဗြင်ဂေဟုလော။ နန်းနို့ မာနားရှိဟယ် ဆိုဟာ နန်းနို့ ကြားဂေဟုလော။

19 ငါဟု လူ ၅,၀၀၀ ဟို့ ကျွေးဟို့တွပ် မုငါးလောင်းဟို့ ငါ့ခလိုးဖဲဟူခိဟို့ နန်းနို့ ဒိရဂေဟုလော။ စားဘီးကျန်နေဟူ ကုလိုးပဲလေဟို့ ပုလန်ကော့-က်ဇာဟု ဖယ်မျှရနူး” ဆိုဘီး ဟာ မေးလေဟယ်။

တမဲ့တော်လေဟု “ဆယ့်နှေ့တောန်းရပါဟယ်” ဆိုဘီး ပုလန်ဖြေလေဟယ်။

20 ယေရှုဟု “အယ်ဘီးဟာ ငါဟာ လူ ၄,၀၀၀ တွပ် မု

ခွန်နစ်လောင်းဟို့ ဖဲဟူ ခီမာ စားဘီးကျန်နေဟူ ကုလိုးပဲ
လေဟို့ ဖယ်မျှတောန်းပုလဲ နန်းနို့လေ ပုလန်ကော့-က်ရ
ဂေ့နူး” ဆိုဘီး မေးလေဟယ်။

တမဲ့တော်လေဟ “ခွန်နစ်တောန်းရပါဟယ်” ဆိုဘီး ပု
လန်ဖြေလေဟယ်။

²¹ ကိုယ်တော်ဟ “အယ်ဆိုဟာ နန်းနို့ နားလည်ဂေ့သေး
ဟုလော” ဆိုဘီး သူးနို့ဟို့ မေးလေဟယ်။

ယေရှုဟာ ဗက်ဒဲဒဝါမာ မျစ်ကန်းတယော့-က်ဟို့ မြင်
စေဟူကြောန်း

²² သူးနို့လေဟာ ဗက်ဒဲဒဝါဟို့ ရော့-က်လာဂေ့ဟ
ယ်။ အယ်နေရာမာ လူတချို့ဟ မျစ်ကန်းတယော့-က်
ဟို့ ယေရှုနားဟို့ ခေါ်လာဘီးဟာ အယ်လူဟို့ တို့ထိဟို့တွပ်
တောန်းဗန်ဂေ့ဟယ်။

²³ ယေရှုဟာ မျစ်ကန်းဟို့ လတ်ဆွဲဘီးဟာ ဝါပုလန်ဟို့
ခေါ်ဟားလိုက်ဟယ်။ အယ်လူရဲ့ မျစ်စိဟို့ ထွီးရယ်နထွီး
ဘီးန ယေရှုဟာ သူထတ်မာ လတ်လေဟို့ တန်လိုက်ဘီး
ဟာ “နန် တခုဟို့ မြင်ရဘဲလော” ဆိုဘီး မေးလေဟယ်။

²⁴ အယ်လူဟာ မော့ကေ့လိုက်ဘီး “ကျွန်တော်ဟာ လူ
လေဟို့ မြင်ရဟယ်။ အယ်ဘေမဲ့ သူးနို့လေဟာ သစ်ပန်
လေမျိုး လမ်းရှော့-က်နေဂေ့ဟယ်” ဆိုဘီး ပြောလေဟ
ယ်။

²⁵ ယေရှုဟာ အယ်လူရဲ့ မျစ်စိထတ်မာ လတ်လေ
ဟို့ ပုလန်ဘီး တန်လိုက်ဟယ်။ အယ်ခီမာ အယ်လူဟာ

အားစိုက်ဘီး ကေ့လိုက်ဇာ သူ့ရဲ့ မျစ်စိလန်းရောန် ပုလန်ရဟွားဘီး သူဟာ ဂူလောင်းဟို့ ရှင်းရှင်းလန်းလန်းဟွား ဗြင်ဟွားဟယ်။

²⁶ ယေရှုဟု သူ့ဟို့ “ဝါထဲဟို့ ပုလန်ဝမ်န” ဆိုဘီးဟာ မိန့်ပေးဘီး အီဟို့ ပုလန်ခိုင်းလိုက်လေဟယ်။

ယေရှုကြောင်းဟို့ ပေတရုရဲ့ ကြေညာရှင်းကြောင်း
(မသံ ၁၆.၁၃-၂၀; လုကာ ၉.၁၈-၂၁)

²⁷ အယ်ဘီးန ယေရှုန တဗဲ့တော်လေဟု ကဲသရိဖိလိပုပုနားဟု ကျေးဝါလေဟို့ သွားဂေ့ဟယ်။ လမ်းခရီးမာ ကိုယ်တော်ဟု “လူလေဟု ငါ့ဟို့ ဖယ်သူဖြစ်ဟယ် ဆိုဘီး ပြောနေဂေ့နူး” ဆိုဘီးဟာ သူးနို့ဟို့ မေးလေဟယ်။

²⁸ “တချို့ဟု ဗတုတိဇိယောဟန် ဖြစ်ဟယ်။ တချို့ဟု လေိယ ဖြစ်ဟယ်။ တချို့ဟု ပရောဖက်တပါး ဖြစ်ဟယ်။ ဆိုဘီး ပြောနေဂေ့ဟယ်” ဆိုဘီး သူးနို့ဟု ပုလန်လျှော့-က်လေဟယ်။

²⁹ “နန်းနို့လေဟုမား ငါ့ဟို့ ဖယ်သူဖြစ်ဟယ် ဆိုဘီး ထန်ဂေ့နူး” ဆိုဘီး ကိုယ်တော်ဟု သူးနို့လေဟို့ မေးလိုက်ဟယ်။

ပေတရုဟု “ကိုယ်တော်ဟု ခရစ်တော် ဖြစ်ဟယ်” ဆိုဘီး ပုလန်လျှော့-က်လေဟယ်။

³⁰ ယေရှုဟု “ငါ့ကြောင်းဟို့ ဖယ်သူဟို့လည်း ပြောဂေ့န” ဆိုဘီး သူးနို့လေဟို့ မိန့်ပေးလေဟယ်။

ယေရှုဟု မိမိရဲ့ဝေဒနာခံဇာနည် သေခံဇာတို့ ပြောဟူ
ကြောန်း

(မဿဲ ၁၆.၂၁-၂၈; လုကာ ၉.၂၂-၂၇)

³¹ အယ်ဘီးန ယေရှုဟု “လူ့ရဲ့သားဟာ ဝေဒနာဘောင်
ဂီး ခံရဘီး သတ်ကီးဝါဂီးလေ၊ ယဇ်ပုရောဟိတ်ဂီးလေ၊
ကျမ်းတတ်ဆရာလေအားဖြင့် ငြင်းပယ်ခံရမယ်။ သူဟာ
သတ်ခံရမယ်၊ အယ်ဘေမဲ့ သောင်းရစ်ကြာဘီးန သူဟာ ပု
လန်ထမြော့-က်လေ့မယ်” ဆိုဘီး တမဲ့တော်လေဟူ စဘီး
သွန်သန်လေဟယ်။

³² ကိုယ်တော်ဟာ အယ်ကြောန်းဟူ ပွမ့်ပွမ့်လန်းလန်း
ဟား ပြောလိုက်ဟယ်။ အယ်ကြောန့် ပေတရုဟု ကိုယ်
တော့်ဟူ ဘေးနားဟူ ခေါ်ဘီးဟာ စဘီး ပြစ်တန်လေဟု
ယ်။

³³ အယ်ဘေမဲ့ ယေရှုဟု ပုလန်လှည့်ဘီး တမဲ့တော်လေ
ဟူ ကော့ဘီးဟာ ပေတရုဟူ ဆောင်းမလေဟယ်။ “စာတန်၊
ငါ့နားဟုနေ ထွပ်ဟား။ ဖြားဖြစ်ကြောန်းနူးဆိုဟာ နန်ဟာ
ဘုရားသခင်န ဆိုင်ဟူဇာလေဟူ စိစွဲလန်းဘဲန လူလေန
ဆိုင်ဟူ ဇာလေဟူဘဲ စွဲလန်းဟယ်!” ဆိုဘီး ပြောလေဟု
ယ်။

³⁴ အယ်ဘီးန ယေရှုဟာ လူအောက်ဂီးန တမဲ့တော်လေ
ဟူ သူနားဟူ ခေါ်လေဟယ်။ ကိုယ်တော်ဟု “ဖယ်လူဘဲ
ဖြစ်ဖြစ် ငါ့နော့-က်ဟူ လိုက်ရှင်ဟယ် ဆိုဟာ ကိုယ့်ကိုယ်

ကိုယ် ငြင်းပယ်ရမယ် အယ်ဘီးဟာ ကိုယ့်ရဲ့ လတ်ဝါးကပ် တိုင်ဟို့ ထမ်းဘီး ငါ့နော့-က်ဟို့ လိုက်ရမယ်။

³⁵ ဖြားဖြစ်ကြောန့်နူးဆိုဟာ ကိုယ့်သတ်ဟို့ ကယ်ရှင်ဟူ လူဟာ သတ်ဆောင်းရှောင်းလေ့မယ်။ အယ်ဘောမဲ့ ငါ့တွပ် န် ဒန်းကောန်းတွပ် သတ်ဆောင်းရှောင်းရဟူ လူဟာ ကိုယ့် သတ်ဟို့ ကယ်ဆယ်လေ့မယ်။

³⁶ လူတယော့-က်ဟာ လောက တခုလောင်းဟို့ ရဘောမဲ့ သူ့ရဲ့ သတ်ဝိညာဉ် ဆောင်းရှောင်းဟားမယ် ဆိုဟာ ဖြား ကျိုးရှိမယ်နူး။ ဖြားကျိုးလည်း မေ့ဟု!

³⁷ လူတယော့-က်ဟာ သူ့ရဲ့ သတ်ဝိညာဉ်ဟို့ ပုလန်ဝီး ဟို့တွပ် ဖြားဇာပေးနိုင်ဟို့နူး။

³⁸ ဖော့-က်ပုလန်ဘီး ပြစ်န ပုလဲနေဟူ အယ်မျိုးဆစ်မာ ဖယ်သူမဆို ငါ့န ငါ့စကားလေဟို့ ယှစ်ကြော့-က်မယ် ဆို ဟာ၊ လူ့ရဲ့သားဟာ သူ့ဖရဲ့ ဖောင်းတတ်ဟို့ ဆောန်ဘီး သန် ရှင်းဟူ ကောန်းဂန်တမန်လေနတူးဒု လာဟူ ခီမာ အယ်လူ ဟာ ယှစ်ကြော့-က်ခံရလေ့မယ်” ဆိုဘီး သူးနို့ဟို့ မိန့်တော် မူလေဟယ်။

9

¹ အယ်ဘီးဟာ ကိုယ်တော်ဟု “ငါ မှန်တိုင်းပြောမယ်၊ ဘုရားသခင်ရဲ့ နိုင်ငံတော်ဟု တဂိုးန တည်ဟယ် ဆိုဇာဟို့ မြင်ရဘဲန အယ်နေရာမာ ရှိနေဟူ လူတချို့ဟာ သေရဟို့ မဟု” ဆိုဘီး သူးနို့ဟို့ မိန့်တော်မူလေဟယ်။

သဏ္ဌာန်ပုလောန်းလဲဟူကြောင်း
(မဿဲ ၁၇.၁-၁၃; လုကာ ၉.၂၈-၃၆)

² ခြော့-က်ရစ်ကြာဘီးန ယေရှုဟာ ပေတရု၊ ယာကုပ်၊
ယောဟန်လေဟို့ သူနတူးဒ ခေါ်ဟွားဘီး ဗြဲဟူတောန်
ထတ်ဟို့ တတ်ဟွားဟယ်။ အယ်နေရာမာ သူးနို့လေဘဲ ရှိ
လေဟယ်။ အယ်ခီမာ သူးနို့ရှေ့မာ ယေရှုဟာ သဏ္ဌာန်
ပုလောန်းလဲဟွားဟယ်။

³ အယ်ဘီးဟာ ကိုယ်တော်ရဲ့ ဝတ်ဟု ဖုလူဆွတ်ဆွတ်
ဖြစ်လာဟယ် ကမ္ဘာမာ ဖယ်လူလည်း လျှော်ဟို့ တတ်နိုင်
ဘဲအောန် ရရာတိုင်း ဖုလူဟယ်။

⁴ အယ်ဘီးဟာ တဗွဲတော်သောင်းပါးရှေ့မာ ဧလိယန
မောရှေဟု ပေါ်လာဘီး ယေရှုန စကားပြောနေဂေဟယ်။

⁵ ပေတရုဟု “ဆရာ၊ အယ်နေရာမာ ကျွန်တော့်ဟွားလေ
ရှိနေဇာ ရရာတိုင်း ကောင်းဟယ်၊ ကိုယ်တော်တွပ် တ
ဆောန်၊ မောရှေတွပ် တဆောန်၊ ဧလိယတွပ် တဆောန်၊
တဲသောင်းဆောန်ဟို့ ကျွန်တော့်ဟွားလေ ဆော့-က်ပေး
မယ်” ဆိုဘီး ယေရှုဟို့ ပြောလေဟယ်။

⁶ သူးနို့ဟာ ရရာတိုင်း ကြော့-က်လန်နေဂေဘီး၊ သူဟာ
ဖယ်မျိုးပြောရဟို့ ဆိုဇာ သိဟယ်။

⁷ အယ်ဘီးန မိုးတီတခုဟု ပေါ်လာဘီးဟာ သူးနို့လေဟို့
အောက်ခလလိုက်ဟယ် “အယ်သူဟု ငါ့ရဲ့ ရှစ်သား ဖြစ်

ဟယ်။ သူ့စကားဟို့ နားထောန်ဂေ့!” ဆိုဘီး မိုးတီထဲဟုနေ သံတော်ဟု ထွပ်လာဟယ်။

⁸ ရှစ်ရှင်းဘဲ သူးနို့လေဟာ ပတ်စိမ္မိဘီး ကေ့လိုက်ဟယ် အယ်ဘေမဲ့ ယေရှုတပါးဘဲ သူးနို့နတူးဒူ ရှိနေဘီး တခြား ဖယ်သူလည်း တွဲရဂေ့ဟယ်။

⁹ သူးနို့လေဟု တောန်ထတ်ဟုနေ ဆင်းလာဂေ့ဟူ ခီမာ ယေရှုဟု “လူရဲ့သားဟု သေရာဟုနေ ထမြော-က်ခန်ထိ နန်းနို့မြင်ဟူးဇာဟို့ ဖယ်သူဟို့လည်း ပြောဂေ့န” ဆိုဘီး သူးနို့ဟို့ မိန့်မာလေဟယ်။

¹⁰ သူးနို့လေဟု ကိုယ်တော်ရဲ့ မိန့်ဟို့ နာခံဂေ့ဟယ် အယ် ဘေမဲ့လည်း “‘သေရာဟုနေ ထမြော-က်ဟယ်’ ဆိုဇာဟု ဖြားခိပါယ်မျိုးနူး” ဆိုဘီး အယ်ကြောန်းဟို့ သူးနို့ရှင်းရှင်း ထဲမာ စဘီး ဆွေးနွေးနေဂေ့ဟယ်။

¹¹ အယ်ဘီးဟာ သူးနို့ဟု ယေရှုဟို့ “ဧလိယဟာ ရင် ဦးဆောင်း လာမယ် ဆိုဘီး ကျမ်းတတ်ဆရာလေဟု ဖြား ဖြစ်ကြောန့် ပြောဂေ့နူး” ဆိုဘီး မေးဂေ့ဟယ်။

¹² ယေရှုဟု “ဧလိယဟာ ရင်ဦးဆောင်း လာဘီး ဂူလော င်းဟို့ သစ်ပုလန်လောက်မယ် ဆိုဇာဟု မှန်ဟယ်။ အယ် ဘေမဲ့ လူရဲ့သားဟု ဝေဒနာဘောင်ဂီး ခံဘီးဟာ ငြင်းပယ် ခံရမယ် ဆိုဘီး ကျမ်းစာမာ ဖြားဖြစ်ကြောန့် ရေးဟူးနူး။

¹³ အယ်ဘေမဲ့လည်း နန်းနို့ဟို့ ငါပြောမယ်။ ဧလိယဟာ ရော့-က်လာပီးဘီ။ သူ့ကြောန်းဟို့ ကျမ်းစာမာ ရေးဟူး

တိုင်း လူလေဟု သူးနို့လောက်ရှင်ဟူတိုင်း သူ့ဟို့ လောက်
ဂေဟယ်” ဆိုဘီး ပုလန်ဖြေလေဟယ်။

ယေရှုဟာ ညစ်ညူးဟူ နတ်ရှိနေဟူ ကောင်းသားတ
ယော့-က်ဟို့ ကျန်းမာစေဟူကြောင်း

(မသေ ၁၇.၁၄-၂၁: လုကာ ၉.၃၇-၄၃က)

14 သူးနို့ဟာ တခြားတမဲ့တော်လေနားဟို့ ရော့-က်လာ
ဟူ ခီမာ ရရာတိုင်း ကီးမားဟူ လူအောက်ဂီးဟာ သူးနို့လေ
ဟို့ ဝိုင်းရံဟားဘီး ကျမ်းတတ်ဆရာ တချို့ဟာ သူးနို့န ဂြ
င်းခုနေဇာဟို့ မြင်ဟားလေဟယ်။

15 ရှစ်ရှင်းဘဲ လူလေဟု ယေရှုဟို့ မြင်ဟူ ခီမာ သူးနို့
ဟာ ရရာတိုင်း အံ့ဩဂေဘီးဟာ ကိုယ်တော်နားဟို့ ပုလေး
လာဘီး နောက်ဆစ်ဂေဟယ်။

16 ယေရှုဟု တမဲ့တော်လေဟို့ “နန်းနို့လေဟာ သူးနို့လေ
န ဖြားကြောင်းရာဟို့ ဂြင်းခုနေဂေနှူး” ဆိုဘီး မေးလေဟ
ယ်။

17 လူအောက်ဂီးထဲဟုနေ တယော့-က်ဟု “ဆရာ၊ ညစ်
ညူးဟူနတ် ဝမ်ပူးနေဟူကြောန့် စကားပြောနိုင်ဘဲဟူ ကျွန်
တော့သားဟို့ ဆရာနားဟို့ ခေါ်လာဟယ်။

18 နတ်ဆိုးဟာ သူ့ဟို့ ဖမ်းစားဟူခိုတိုင်း သူ့ဟို့ မုလေဂီး
မာ လဲခုလတတ်ဘီး၊ ဇပ်ပေါ့-က်ဟု ဖြုပ်ထွပ်ဘီး၊ အံ့သွား
လေ ကုလိတတ်ဟယ်။ အယ်ဘီးန တော့-က်မာ လာဟ
ယ်။ ကျွန်တော်ဟာ ကိုယ်တော်ရဲ့ တမဲ့တော်လေဟို့ အယ်

နတ်ဆိုးဟို့ နှိန်ထုဟို့ ပြောဟယ် အယ်ဘေမဲ့ သူးနို့လေဟု တတ်နိုင်ဂေဟု” ဆိုဘီး ပုလန်ဖြေလေဟယ်။

19 ယေရှုဟု “နန်းနို့ဟာ လောင်းဝ ယောင်ကြည်ဘဲဟူ လူလေ ဖြစ်ဟယ်! ငါဟာ ဖယ်လော့-က်ကြာအေန် နန်း နို့တူးဒု နေရဟို့နူး။ ဖယ်မျှလော့-က်ကြာအေန် နန်းနို့ဟို့ သီးခံရဟို့နူး။ ကောင်းသားဟားဟို့ ငါနားဟို့ ခေါ်လာဂေ!” ဆိုဘီး သူးနို့ဟို့ ပြောလေဟယ်။

20 အယ်ကြောန် သူးနို့လေဟု သူဟို့ ယေရှုနားဟို့ ခေါ် ဟားဂေဟယ်။

နတ်ဆိုးဟာ ယေရှုဟို့ မြင်ဟူ ခီမာ ရှစ်ရှင်းဘဲ ကောင်း သားဟားဟို့ လဲခဲလဘီး တူတတ်စေဟယ်။ အယ်ကြောန် သူဟာ မုလေမာ လဲခဲလဘီး လူးလိနေဘီးဟာ ဇပ်ပေါ့-က် ဟု ဖြုပြလေ ထွပ်နေလေဟယ်။

21 ယေရှုဟု “အယ်မျိုးဖြစ်နေဇာ ကြာဘီလော” ဆိုဘီး ကောန်သားရဲ့ ဖဟို့ မေးလေဟယ်။

သူဟု “သားဂန်းဟား ဂဒဲဟု ဖြစ်နေဟယ်။”

22 “သူဟို့ မီးထဲမာရော၊ ရေထဲမာရော လဲကုလစေဘီး ဟာ သတ်ဟို့ ခါဘီးခါ ကြိုးစားဟယ်။ အယ်ဘေမဲ့ ကိုယ် တော်ဟာ တခုခု တတ်နိုင်မယ် ဆိုဟာ ကျွန်တော့်ဟို့ သနား ဘီးဟာ ကူညီပေးပါ!” ဆိုဘီး ပုလန်ဖြေလေဟယ်။

23 ယေရှုဟု “နန်ကိုယ်တိုင်လည်း တတ်နိုင်ဟယ် မူ ဟုလော။ ယောင်ကြည်ရှင်းရှိဟူ လူတယော့-က်တွပ် ဂူ လောင်း ဖြစ်နိုင်ဟယ်” ဆိုဘီး မိန့်တော်မူလေဟယ်။

24 ရှစ်ရှင်းဘဲ ကောန်သားဟူးရဲ့ ဖဟာ “ကျွန်တော် တကယ် ယောင်ကြည်ပါဟယ်။ ကျွန်တော်ဟာ ယောင် ကြည်ဘဲကြောနဲ့ ကျွန်တော့်ဟို့ မစပေးပါ!” ဆိုဘီး အော် ဘီးပြောလေဟယ်။

25 လူအောက်ဂီးဟာ သူးနို့ရိုဟူ နေရာဟို့ ပုလေးလာဂေ ဇာဟို့ ယေရှု မြင်ဟူးဟယ်။ အယ်ကြောနဲ့ ကိုယ်တော်ဟု ညစ်ညူးဟူ နတ်ဟို့ မိန့်ပေးလိုက်ဟယ်။ “ဆွံ့အဘီး နား ပန်းဟူ နတ် ကောန်သားထဲဟုနေ ထွပ်ဟူးဘီး နှော-က် ထပ် သူထဲဟို့ လောင်းဝ ဝမ်န ငါမိန့်ပေးဟယ်!” ဆိုဘီး ပြောလေဟယ်။

26 နတ်ဆိုးဟု အော်ဘီးဟာ ကောန်သားဟို့ ရုရာတိုင်း တူတတ်ခိုင်းဘီးန ထွပ်ဟူးလေဟယ်။ ကောန်သားဟု သေကောန်မျိုး ဖြစ်ဟူးကြောနဲ့ “သူသေဟူးဘီး!” ဆို ဘီး လူတိုင်းပြောဂေဟယ်။

27 အယ်ဘေမဲ့ ယေရှုဟု ကောန်သားရဲ့ လတ်ဟို့ ကိုင် ဘီး ထဒန်ဟို့ ဆွဲဒန်လိုက်ဟူ ခီမာ သူဟာ ထလာဟယ်။

28 ယေရှုဟု အီထဲဟို့ ဝမ်ဟူးဘီးန တမဲ့တော်လေဟု “ကျွန်တော့်ဟူးလေဟု ဖြားဖြစ်ကြောနဲ့ အယ်နတ်ဆိုးဟို့ နှန်ထုနိုင်ဟူး” ဆိုဘီး ကိုယ်တော့်ဟို့ တိတိဟူး မေးဂေ ဟယ်။

29 ယေရှုဟု “အယ်နတ်မျိုးဟို့ ဆုတောင်းဇာအားဖြင့်ဘဲ နှန်ထုနိုင်ဟယ်” ဆိုဘီး ပုလန်ဖြေလေဟယ်။

ယေရှုဟာ သေခံမယ့်ကြောန်းဟို့ ထပ်ဘီးပြောဟူ
ကြောန်း

(မဿဲ ၁၇.၂၂,၂၃; လုကာ ၉.၄၃ခ-၄၅)

³⁰ ယေရှုန တမဲ့တော်လေဟု အယ်နေရာဟုနေ ထွပ်ဟား
ဘီး ဂါလိလဲနယ်ဟို့ ဖြတ်ဘီး ဆစ်သွားလေဟယ်။ သူးနို့
လေ အယ်နေရာမာ ရှိနေဟယ် ဆိုဇာဟို့ ယေရှုဟု ဖယ်သူ
ဟို့လည်း သိခိုင်းရှင်ဟု၊

³¹ ဖြားဖြစ်ကြောန်းဆိုဟာ ကိုယ်တော်ဟာ သူ့ရဲ့ တ
မဲ့တော်လေဟို့ “လူ့ရဲ့သားဟာ သူ့ဟို့ သတ်မယ့်လူလေရဲ့
လတ်ထဲဟို့ အပ်ခံရလေ့မယ်။ အယ်ဘေမဲ့လည်း သောင်း
ရစ်ကြာဘီးန သူဟာ ထမြော့-က်လေ့မယ်” ဆိုဘီး သွန်
သန်နေကြောန်း ဖြစ်ဟယ်။

³² အယ်ဘေမဲ့ ကိုယ်တော်ပြောနေဇာဟာ ဖြားမိပါယ်ရှိ
ဟယ် ဆိုဇာဟို့ သူးနို့လေ နားလည်ဂေဟု။ အယ်ဘီးဟာ
ကိုယ်တော်ဟို့ မေးဟို့လည်း သူးနို့ဟာ ကြော့-က်နေဂေဟု
ယ်။

ဖယ်သူဟု ကီးမြတ်ဆောင်းနူး။

(မဿဲ ၁၈.၁-၅; လုကာ ၉.၄၆-၄၈)

³³ သူးနို့လေဟာ ကပေရနောင်မြို့ဟို့ ရော့-က်ဟားဂေ
ဘီး အီထဲဟို့ ဝမ်ဟားဘီးန ယေရှုဟု “နန်းနို့ဟု လမ်းမာ
ဖြားကြောန်းဟို့ ဂြင်းခူနေဂေနူး” ဆိုဘီး တမဲ့တော်လေဟို့
မေးလေဟယ်။

34 အယ်ဘေမဲ့ သူးနို့လေဟာ ကိုယ်တော့်ဟို့ ဖြေဂေဟု။
 ဖြားဖြစ်ကြောန့်နူးဆိုဟာ လမ်းမာ ဖယ်သူဟု ကီးမြတ်
 ဆောင်းဖြစ်ဟယ် ဆိုဘီး သူးနို့ရှင်းရှင်းထဲမာ ဂြင်းခူနေ
 ကြောန့် ဖြစ်ဟယ်။

35 ယေရှုဟာ ထိုင်ခလဘီးန တမဲ့တော် ဆယ့်နှေပါးဟို့
 ခေါ်လိုက်ဘီး “ဖယ်လူဘဲဖြစ်ဖြစ် ဦးဆောင်းဖြစ်ရှင်ဟယ်
 ဆိုဟာ အယ်လူဟာ ဂူလောင်းရဲ့ နော့-က်ဆောင်းဖြစ်ရ
 မယ်။ ဂူလောင်းရဲ့ စေခံလည်း ဖြစ်ရမယ်” ဆိုဘီး သူးနို့
 ဟို့ မိန့်တော်မူလေဟယ်။

36 အယ်ဘီးန ကိုယ်တော်ဟု သားဂန်းတယော့-က်ဟို့
 ခေါ်ဘီးဟာ သူးနို့ ရှေ့မာ ရပ်ခိုင်းလေဟယ်။ ကိုယ်တော်
 ဟာ သူဟို့ ပိုက်ဘီးဟာ သူးနို့ဟို့ ပြောလိုက်ဇာဟု။

37 “ဖယ်လူဘဲဖြစ်ဖြစ် အယ်သားဂန်းလေထဲဟု တ
 ယော့-က်ဟို့ ငါ့နာမဟို့ ထော့-က်ဘီးဟာ လတ်ခံဟယ် ဆို
 ဟာ ငါ့ဟို့ လတ်ခံဟယ်။ ဖယ်သူဘဲဖြစ်ဖြစ် ငါ့ဟို့ လတ်ခံ
 ဟယ် ဆိုဟာ ငါ့ဟို့ဘဲ လတ်ခံဇာ မူဟု ငါ့ဟို့ စေလွှတ်လို
 က်ဟု သူဟို့လည်း လတ်ခံဟယ်။”

ဖယ်သူဘဲဖြစ်ဖြစ် နို့လေဟို့ ဆန့်ကျင်ဟု ဆိုဟာ နို့လေ
 ဖတ်ဟုဘဲ ဖြစ်ဟူကြောန့်
 (လုကာ ၉:၄၉-၅၀)

38 ယောဟန်ဟု “ဆရာ၊ ကိုယ်တော်ရဲ့ နာမနာ နတ်ဆိုးလေဟို့ နှိပ်ထုနေဟူ လူတယော့-က်ဟို့ ကျွန်တော်လေ တို့ မြင်လာဟယ်။ သူဟာ ကျွန်တော့်ဟူးလေရဲ့ အောက်စုထဲ ဟု မှတ်ဟူကြောန့် သူဟို့ လောက်ဘဲဟို့တွပ် ပြောရစ်ဟယ်” ဆိုဘီး ကိုယ်တော်ဟို့ ပြောလေဟယ်။

39 ယေရုဟု “သူဟို့ တားဂေ့န။ ဖြားဖြစ်ကြောန့်နူးဆိုဟာ ငါ့နာမနာ နိမိတ်လတ်ခဏာပြဘီးဟာ ကြာခန်မာ ငါ့ကြောန့်ဟို့ ကဲ့ရဲ့နိုင်ဟူလူ ယော့-က်လည်း မေ့ဟူ။

40 ဖြားဖြစ်ကြောန့်နူးဆိုဟာ ဖယ်လူဘဲဖြစ်ဖြစ် နို့လေဟို့ ဆန်ကျင်ဟုဆိုဟာ နို့လေဖတ်ဟုဘဲ ဖြစ်ဟယ်။

41 ငါ မှန်တိုင်းပြောမယ်၊ နန်းနို့ဟာ ခရစ်တော်ရဲ့ တမဲ့တော်လေဖြစ်ဟူကြောန့် ငါ့နာမဟို့ ထော့-က်ဘီး နန်းနို့လေဟို့ ရေတခွပ် ပေးသော့-က်ဟူ လူတိုင်းဟာ တကယ်ဘဲ ကျိုးဟို့ လတ်ခံရလေ့မယ်။

ပြစ်သွီးဆောန်ဇာလေကြောန့်

(မဿဲ ၁၈.၆-၉; လုကာ ၁၇.၁-၂)

42 “ဖယ်လူဘဲဖြစ်ဖြစ် ငါ့ဟို့ ယောင်ကြည်ဟူ အယ်သားဂန်းလေထဲဟု တယော့-က်ဟို့ မှားယွင်းစေမယ် ဆိုဟာ သူရဲ့ လည်ဘန်းမာ ကီးမားဟူ ကုလော့-က်ကုလိဆောင်ဟို့ ခယ်ဘီး ပန်လယ်ထဲဟို့ ပစ်ခွလခံရဇာဟု အယ်လူတွပ်ပိုကောန်းဟယ်။

43 နန့်လတ်ဟု နန့်ဟို မှားယွင်းစေဟယ် ဆိုဟာ အယ်လတ်ဟို ဖြတ်ပစ်လိုက်! လတ်နေ့ဖတ်န မီးသေဘဲဟူ ငရဲထဲဟို သွားရဇာထတ် လတ်တဖတ်မော့ဘဲန သတ်ရှင်ဇာဟို ဝမ်ရဇာဟာ ပိုကောန်းဟယ်။

44 *

45 နန့်ခေဟု နန့်ဟို မှားယွင်းစေဟယ် ဆိုဟာ အယ်ခေဟို ဖြတ်ပစ်လိုက်! ငရဲထဲဟို ခေနေ့ဖတ်န ပစ်ခလခံရဇာထတ် ခေတဖတ်မော့ဘဲန သတ်ရှင်ဇာဟို ဝမ်ရဇာဟာ ပိုကောန်းလေဟယ်။

46 †

47 နန့်မျစ်စိဟု နန့်ဟို မှားယွင်းစေဟယ် ဆိုဟာ အယ်မျစ်စိဟို ထုပစ်လိုက်! မျစ်စိနေ့ဖတ်န ငရဲထဲဟို ပစ်ခလခံရဇာထတ် မျစ်စိတဖတ်န ဘုရားသခင်ရဲ့ နိုင်ငံတော်ဟို ဝမ်ရဇာဟု ပိုကောန်းဟယ်။

48 ‘အယ်နေရာမာ သူးနို့ဟို စားဟူပိုးကောန်လေဟု လောင်းဝသေဟု။ အယ်ဘီးဟာ သူးနို့ဟို လောန်နေဟူမီးဟုလည်း လောင်းဝသေဟု။’”

49 “ယဇ်ကောန်ဟာ ဆားအားဖြင့် စင်ကြယ်ဟားမျိုးဘဲ လူတိုင်းဟာ မီးအားဖြင့် စင်ကြယ်ဟားလေ့မယ်။”

9:43 ဇ.၄၃ မ ၅.၃၀ * 9:44 ဇ.၄၄ တချို့ မူရင်းလတ်ရေးမူလေမာ အယ်နေရာမာ သူးနို့ဟို စားဟူ လော့-က်ကောန်လေဟု လောက်ဝသေဟု အယ်ဘီးဟာ သူးနို့ဟို လောန်နေဟူမီးဟုလည်း လောက်ဝသေဟု၊ ဆိုဘီး ခန်းငယ် ၄၄ ဟို ထပ်ပေါင်းထဲဟားဟယ် (ရှု ခန်းငယ် ၄၈)။
 † 9:46 ဇ.၄၆ တချို့ မူရင်းလတ်ရေးမူလေမာ အယ်နေရာမာ သူးနို့ဟို စားဟူ လော့-က်ကောန်လေဟု လောင်းဝသေဟု။ အယ်ဘီးဟာ သူးနို့ဟို လောန်နေဟူ မီးဟုလည်း လောင်းဝသေဟု၊ ဆိုဘီး ခန်းငယ် ၄၆ ဟို ထပ်ပေါင်းထဲဟားဟယ် (ရှု ခန်းငယ် ၄၈)။ 9:47 ဇ.၄၇ မ ၅.၂၉

50 “ဆားဟု သောင်းဝမ်ဟုယ်။ အယ်ဘေမဲ့ သူ့ရဲ့ ငန်ဟူ ရသာ ပျော့-က်ဟားမယ် ဆိုဟာ ငန်ဟူရသာဟို့ ဖယ်မျိုး ပုလန်ရနိုင်ဟို့နူး။

“နန်းနို့ ကိုယ်တိုင်မလည်း ဆားရဲ့ ဂေါင်သတ်တိမျိုးရှိ ဂေ့။ အယ်ဘီးဟာ ရှင်းရှင်း သင့်မြတ်အော်န်နေဂေ့” ဆို ဘီး သူးနို့ဟို့ မိန့်တော်မူလေဟယ်။

10

ယေရှုဟာ လန်မယားကွာရှင်းမှုဟို့ သွန်သန်ဟူကြာ န်း

(မသံ ၁၉.၁-၁၂; လုကာ ၁၆.၁၈)

1 အယ်ဘီးန ယေရှုဟု အယ်နေရာဟု ထွပ်ဟားဘီး၊ ယုဒနယ်ဟို့ သွားလေဟယ်။ အယ်ဘီးဟာ ယော်ဒန်မှလစ် ဟို့ ကူးဟားလေဟယ်။ လူအောက်ဂီးဟု ကိုယ်တော်နားဟို့ ပုလန်ဘီး စုလာဂေ့ဟယ်။ ကိုယ်တော်ဟာ လောက်နေကျ တိုင်း သူးနို့ဟို့ သွန်သန်လေဟယ်။

2 ဖာရိုရဲ့လေ တချို့ဟာ ကိုယ်တော်နားဟို့ လာဘီးဟာ ထောန်ချော့-က်ဆင်ဟို့ ကြိုးစာဟယ်။ သူးနို့ဟု “ကျွန် တော့်လေဟို့ ပြောပြပါ။ ကျွန်တော့်လေရဲ့ ပညတ်တရား ဟု လူတယော့-က်ဟို့ သူမယားန ကွာရှင်းဟို့ ခွမ်ပြုဘဲ လော” ဆိုဘီး မေးဂေ့ဟယ်။

3 ယေရှုဟု “မောရှေဟာ နန်းနို့ဟို့ ဖြားမျိုး ပညတ်ပေး ဟားနူး” ဆိုဘီး မေးခွန်းန ပုလန်မေးလေဟယ်။

4 သူးနို့ရဲ့ ဖြေဟု “လူတယော့-က်ဟာ သူးမယားဟို ကွာရှင်းစာချောက်ဟို ပေးဘီး ကွာရှင်းဟိုတွပ် မောရှေ ဟု ခွမ်ပြဟားဟယ်” ဆိုဘီး ဖြစ်ဟယ်။

5 ယေရှုဟု “မောရှေဟာ အယ်မျိုးပညတ်ချစ်ဟို နန်းနို့ လေတွပ် ရေးဟားဟယ် ဖြားဖြစ်ကြောန်းနို့ဆိုဟာ နန်းနို့ရဲ့ စိန်လောင်းမာကျောဟူကြောန်း ဖြစ်ဟယ်။

6 အယ်ဘေမဲ့ ကျမ်းစာမာ ပြောဟားတိုင်းဘဲ ဖန်ဆင်းစ ဇူးဟု ‘ဘုရားသခင်ဟာ ယော့-က်ကျားန မီးမဟို ဖန်ဆင်း ဟားဟယ်။

7 အယ်ကြောန်းကြောန်း ယော့-က်ကျားဟု သူးမိဖဟို စွန် ဘီး သူးမီးမန ပေါန်းသင်းလေဟယ်။*

8 အယ်ဘီးဟာ အယ်နွေယော့-က်ဟာ တသားတကိုယ် ဒဲ ဖြစ်လာလေမယ်။’ အယ်ကြောန်း သူးနို့ဟာ နွေယော့-က် မူဟု။ အယ်ဘေမဲ့ တယော့-က်ဒဲဘဲ ဖြစ်ဟယ်။

9 အယ်ကြောန်း ဘုရားသခင် ပေါန်းစပ်ပေးဟားဇာဟို လူခွဲခွာစေန” ဆိုဘီး သူးနို့ဟို မိန်တော်မူလေဟယ်။

10 သူးနို့လေဟာ အီဟို ပုလန်ရော့-က်ဟူ ခီမာ တမဲ့ တော်လေဟာ အယ်ကြောန်းဟို ယေရှုဟို မေးလျှော့-က် ဂေဟယ်။

11 ကိုယ်တော်ဟု “ကိုယ့်မယားဟို ကွာရှင်းဘီး တခြား မီးမဟို ကိုယ့်မယားဟို ပြစ်မှားဘီး အီထောန်ရေးဖော့-က်

10:4 ၁၀.၄ မ ၅.၃၁ * 10:7 ၁၀.၇ တချို့ မူရင်းလတ်ရေးမူလေမာ အယ်ဘီးဟာ သူးမီးမနတူးဒု ပေါန်းသင်းလေဟယ်၊ ဆိုဇာဟာ မှေဟု။

10:11 ၁၀.၁၁,၁၂ မ ၅.၃၂: ၁ ကော ၇.၁၀,၁၁

ပုလန်ရှင်းတို့ ကျူးလွန်သူ ဖြစ်ဟုယ်။

¹² အယ် မျိုးဘဲ ကိုယ့်လန်တို့ ကွာရှင်းဘီး တခြား ယော့-က်ကျားတို့ ပေါန်းသင်းဟူ မီးမဟာ ကိုယ့်လန်တို့ ပြစ်မှားဘီး အီထောန်ရေးဖော့-က်ပုလန်ရှင်းတို့ ကျူးလွန် သူ ဖြစ်ဟုယ်” ဆိုဘီး သူးနို့တို့ မိန့်တော်မူလေဟုယ်။

ယေရှုဟာ သားဂန်းဟားလေဟူ ကောင်းဂျီးပေးဟူ ကြော်န်း

(မသံ ၁၉.၁၃-၁၅; လုကာ ၁၈.၁၅-၁၇)

¹³ လူလေ တချို့ ဟာ သားဂန်းလေရဲ့ ထတ်မာ ကိုယ်တော်ရဲ့ လတ်လေဟူ တန်ခိုင်းတို့တွပ် ယေရှုနားတို့ ခေါ်လာဂေဟုယ်။ အယ်ဘေမဲ့ တမဲ့တော်လေဟာ အယ်လူ လေဟူ ပြစ်တန်ဂေဟုယ်။

¹⁴ ယေရှုဟာ အယ်ဇာတို့ မြင်ဟားခီမာ ကိုယ်တော်ဟာ စီဆိုးဟားဘီး “သားဂန်းလေဟူ ငါနားတို့ လာဂေပါစေ၊ သူးနို့တို့ တားဂေန။ ဖြားဖြစ်ကြောန်းနူးဆိုဟာ အယ်မျိုးလူ လေဘဲ ဘုရားသခင် နိုင်ငံတော်မာ နေရလေ့မယ်။

¹⁵ ငါ မှန်တိုင်းပြောမယ်၊ ဘုရားသခင်ရဲ့ နိုင်ငံတော်ဟူ သားဂန်းတယော့-က်မျိုး လတ်ခံဘဲဟူလူဟာ နိုင်ငံတော် ဟူ လောင်းဝ ဝမ်ရလေ့ဟူ မဟာ” ဆိုဘီး တမဲ့တော်လေဟူ မိန့်တော်မူလေဟုယ်။

¹⁶ အယ်ဘီးန ကိုယ်တော်ဟာ သားဂန်းလေဟူ ခီလိုက် ဘီး သူးနို့ထတ်မာ သူးရဲ့ လတ်လေဟူ တန်ဟုယ်။ အယ်

ဘီးဟာ သူးနို့ဟို့ ကောန်းဂျီးပေးလေဟယ်။

ကပ်ပေါဟူလူကြောန်း

(မသဲ ၁၉.၁၆-၃၀; လုကာ ၁၈.၁၈-၃၀)

17 ယေရှုဟု ခရီးစပြုနေဟူ ခီမာ လူတယော့-က်ဟု ပုလေးလာဘီး၊ ကိုယ်တော်ရှေ့မာ ဒူးထော့-က်ဘီး “ကောန်းမြတ်ဟူဆရာ၊ ထာဝရသတ်ဟို့ လတ်ခံရဟို့တွပ် ကျွန်တော့်ဟု ဖြားဇာလောက်ရဟို့နူး” ဆိုဘီး မေးလျှော့-က်လေဟယ်။

18 ယေရှုဟု “နန်ဟာ ဖြားဖြစ်ကြောန့် ငါ့ဟို့ ကောန်းမြတ်ဟယ် ဆိုဘီး ခေါ်နေရနူး။ ဘုရားသခင် တပါးဟုလွဲဘီး ဖယ်သူလည်း ကောန်းမြတ်ဟု။

19 ‘လူသတ်ဟို့သတ်န၊ အီထောန်ရေးဖော့-က်ပုလန်န၊ ခိုးန၊ ဖယ်သူဟို့ဘဲဖြစ်ဖြစ် မှားမှားဟီးန စွပ်စွဲန၊ လီညာန၊ နန်ရဲ့မိဖဟို့ ရိုသေဂေ့’ ဆိုဘီး ပညတ်ဟားဇာလေဟို့ နန်သိဟယ်” ဆိုဘီး ပုလန်ဖြေလေဟယ်။

20 အယ်လူဟု “ဆရာ၊ အယ်ပညတ်ချစ်လေ ဂူလောင်းဟို့ ကျွန်တော် ငဲငယ်ဂဲဟု ကျွန်တော်ဟာ စောန့်ထီးလာဟယ်” ဆိုဘီး ပြောလေဟယ်။

21 ယေရှုဟု အယ်လူဟို့ ရှစ်ဟူစိန် စေ့စေ့ကော့ဘီး “နန်မာ တခုဘဲ လိုနေဟယ်။ သွားဘီး နန်မာရှိဇာလေ ဂူလောင်းဟို့ ရောန်းလိုက်ဘီးဟာ ဆင်းရဲသားလေဟို့ ပေးလိုက်။ အယ်ဆိုဟာ နန်ဟာ ကောန်းဂန်ဘောင်မာ ဘဏ္ဍာရလေ

မယ်။ အယ်ဘီးမှ လာဘီးဟာ ငါ့နော့-က်ဟို့ လိုက်ပါ” ဆိုဘီး မိန့်တော်မူလေဟယ်။

22 အယ်လူဟာ အယ်စကားဟို့ ကြားရဟူ ခီမာ။ သူ့ရဲ့ မျစ်နာဟာ ညှိုးငယ်ဟွားဟယ်။ အယ်ဘီးန သူဟာ ဝန်းနဲ ပန်းနဲန ထွပ်ဟွားလေဟယ်။ ဖြားဖြစ်ကြောန့်နဲ့ဆိုဟာ သူဟာ ရရာတိုင်း ကပ်ပေါဟူကြောန့် ဖြစ်ဟယ်။

23 ယေရှုဟာ တမဲ့တော်လေဟို့ လှည့်ပတ်ကော့ဘီးန “ကပ်ပေါဟူ လူလေတွပ် ဘုရားသခင်ရဲ့ နိုင်ငံတော်ဟို့ ဝမ်ရဟို့ ရရာတိုင်း ခတ်လေ့မယ်!” ဆိုဘီး သူးနို့ဟို့ မိန့်တော်မူလေဟယ်။

24 တမဲ့တော်လေဟု အယ်စကားလေဟို့ အံ့ဩဂေဟယ်။ အယ်ဘောမဲ့ ယေရှုဟု ဆစ်ဘီး ပြောလိုက်ဇာဟု “ငါ့သားမီးလေ၊ ဘုရားသခင်ရဲ့ နိုင်ငံတော်ဟို့ ဝမ်ဟို့တွပ် ရရာတိုင်း ခတ်လေဟယ်!

25 ကပ်ပေါဟူ လူတယော့-က်ဟာ ဘုရားသခင်ရဲ့ နိုင်ငံတော်ဟို့ ဝမ်ဟို့ထတ် ကုလားအုတ် တကောန်ဟာ အပ်ပေါ့-က်ထဲဟို့ ဝမ်ဟို့ ပိုဘီး လွယ်ဟယ်။”

26 တမဲ့တော်လေဟာ ပိုဘီး အံ့ဩဟွားဘီး “အယ်မျိုးဆို ဖယ်သူဟု ကယ်တန်ရှင်း ခံရနိုင်ဟို့နဲ့” ဆိုဘီး ရှင်းရှင်း မေးဂေဟယ်။

27 ယေရှုဟာ သူးနို့လေဟို့ စေ့စေ့ကော့ဘီးဟာ “အယ်မူဟာ လူလေတွပ် ဖြစ်နိုင်ဟယ်။ အယ်ဘောမဲ့ ဘုရားသခင်တွပ် ဂူလောင်း ဖြစ်နိုင်ဟယ်” ဆိုဘီး ပုလန်ဖြေလေဟယ်။

28 ပေတရုဟု “ကျွန်တော့်လေဟာ ကိုယ်တော်နောက်
 ဟို့ လိုက်ဟို့ ဂူလောင်းဟို့ ထားရစ်ဂေဟယ်” ဆိုဘီး
 လျှော့-က်လေဟယ်။

29 ယေရှုဟု “ငါ မှန်းမှန်ကန်းကန် ပြောမယ်။ ငါ့တွပ်န
 ဧဝံဂေလိတွပ် အီ၊ ညီကိုလေ၊ မောန်နှမလေ၊ မိဖ၊ သားမီး
 လေ၊ လယ်မှလေလေဟို့ စွန်ဟူ လူဟာ၊

30 ခုဘဝမာ ဆတရာထတ်ပိုဟူ အီလေ၊ ညီကိုလေ၊
 ညီမလေ၊ မိဖလေ၊ သားမီးလေ၊ လယ်မှလေလေတူးဒု
 ညှဉ်းဆဲဇာဟို့ လတ်ခံရရှိလေ့မယ်။ အယ်ဘီးဟာ နှော့-က်
 ဘဝမာလည်း ထာဝရသတ်ဟို့ လတ်ခံရရှိလေ့မယ်။

31 အယ်ဘေမဲ့ ရင်ဦးဆောင်း ကုလဟူ သူဘောင်ဂီးဟု
 နှော့-က်ဆောင်းကုလလေ့မယ်၊ နှော့-က်ဆောင်း ကုလဟူ
 သူဘောင်ဂီးဟု ရင်ဦးဆောင်း ကုလလေ့မယ်” ဆိုဘီး သူး
 နို့ဟို့ မိန့်တော်မူလေဟယ်။

ယေရှုဟု သူ့ရဲ့ သေခံရမယ့်ကြောန်းဟို့ သောင်းခါ
 မြှော့-က် ပြောဟူကြောန်း

(မသဲ ၂၀.၁၇-၁၉; လုကာ ၁၈.၃၁-၃၄)

32 ယေရှုန တမဲ့တော်လေဟာ ယေရှုရှလင်မြို့ဟို့ သွား
 နေဂေဟယ်။ လမ်းမာယေရှုဟာ သူးနို့ရှေ့ဟုနေ သွားဟူ
 ကြောန့် တမဲ့တော်လေဟာ အံ့ဩနေဂေဟယ်။ နှော့-က်
 ဟု လိုက်လာဟူ လူလေဟာလည်း ကြော့-က်နေဂေဟယ်။
 ယေရှုဟာ တမဲ့တော် ဆယ့်နှေ့ယော့-က်ဟို့ သူ့ဘေးနားဟို့

တခါ ထပ်ခေါ်ဘီးဟာ သူ့မာ တို့ကြောင်လာရဟို့ ဇာလေ
ဟို့ ပြောပြလေဟယ်။

³³ ကိုယ်တော်ဟု “နားထောန်ဂေ့။ နို့လေဟာ ခု ယေ
ရုရှလင်မြို့ဟို့ သွားနေဂေ့ဘီး အယ်နေရာမာ လူ့ရဲ့သား
ဟာ ယဇ်ပုရောဟိတ်ဂီးလေန ကျမ်းတတ်ဆရာလေနားဟို့
အပ်ဇာဟို့ ခံရလေ့မယ်။ သူးနို့ဟာ သူ့ဟို့ သေဒန်စီရင်ဘီး
န လူမျိုးခြားလေနားဟို့ အပ်ဂေ့လေ့မယ်။

³⁴ လူမျိုးခြားလေဟာ သူ့ဟို့ ပြစ်ရယ်ပြုဘီး သူ့ဟို့ ထွီး
ရယ်န ထွီးဘီး၊ သူ့ဟို့ ကိဒန်ပေးဘီး သေသတ်ဂေ့လေ့
မယ်။ သောင်းရစ်ကြာဘီးန လူ့ရဲ့သားဟာ သေရာဟုနေ
ထမြော့-က်လေ့မယ်” ဆိုဘီး မိန့်တော်မူလေဟယ်။

ယာကုပ်န ယောဟန်ရဲ့ တောန်းဆိုဇာ

(မသ် ၂၀.၂၀-၂၈)

³⁵ အယ်ဘီးန ဇေဗေဒဲရဲ့ သားလေဖြစ်ဟူ ယာကုပ်
န ယောဟန်လေဟာ ယေရှုနားဟို့ လာဟယ်။ သူးနို့ဟု
“ဆရာ၊ ကျွန်တော့်ဟားလေတွပ် လောက်ပေးစေရှင်ဇာ တ
ခုရှိပါဟယ်” ဆိုဘီး လျှော့-က်လေဟယ်။

³⁶ ယေရှုဟု “နန်းနို့တွပ် ပြားဇာဟို့ ငါလောက်ပေးရဟို့
နူး” ဆိုဘီး မေးလေဟယ်။

³⁷ သူးနို့ဟု “ကျွန်တော့် ဟားလေဟို့ ကိုယ်တော်ရဲ့
ဖောင်းသရေတော်ထဲမာ ညာဖတ်မာ တယော့-က်န ဘယ်
ဖတ်မာ တယော့-က် ထိုင်ခွဲမ့်ပေးပါ” ဆိုဘီး ပုလန်
လျှော့-က်လေဟယ်။

38 ယေရှုဟု “နန်းနို့ဟု ဖြားဇာလေ တောန်းနေဟယ် ဆိုဇာဟို့ နန်းနို့လေ သိဂေဟု။ ငါသော့-က်ရမယ့် ဝေဒနာခွပ်ဟို့ နန်းနို့ သော့-က်နိုင်ဘဲ့လော။ ငါခံရမယ့် ဗတုတိဇ်ဟို့ နန်းနို့ ခံနိုင်ဘဲ့လော” ဆိုဘီး မိန့်တော်မူလေဟယ်။

39 သူးနို့ဟု “ကျွန်တော့်လေဟာ တတ်စွမ်းနိုင်ဟယ်” ဆိုဘီး ပုလန်ဖြေဂေဟယ်။

ယေရှုဟု “နန်းနို့ဟာ ငါသော့-က်ရမယ့် ခွပ်ဟို့ သော့-က်ရလေ့မယ်။ အယ်ဘီးဟာ ငါခံရမယ့် ဗတုတိဇ်ဟို့လည်း ခံရလေ့မယ်။

40 အယ်ဘေမဲ့ ဖယ်လူဟာ ငါ့ရဲ့ ညာဖတ်န ဘယ်ဖတ်မာ ထိုင်ရလေ့မယ် ဆိုဇာဟို့ ဝီးကော့-က်ဟို့ခွမ် ငါ့မာ မှေဟု။ ဘုရားသခင် ပြင်ဆင်ဟူးဟူ လူလေတွပ် အယ်နေရာလေဟို့ ကိုယ်တော်ဟာ ပေးလေ့မယ်” ဆိုဘီး သူးနို့ဟို့ မိန့်တော်မူလေဟယ်။

41 အယ်ကြောန်းဟို့ တမဲ့တော်ဆယ်ပါး ကြားဂေဟူ ခီမာ သူးနို့ဟာ ယာကုပ်န ယောဟန်ဟို့ စီဆိုးဂေဟယ်။

42 အယ်ကြောန် ယေရှုဟာ သူးနို့လေ ဂူလောင်းဟို့ တူးဒူခေါ်ဘီးဟာ “နန်းနို့လေ သိဟူးမျိုးဘဲ့ မန်းစိုးရာဇာလေဟာ လူမျိုးခြားလေထတ်မာ အောက်ချောက်ဂေဟယ်။ ကဲမူးလေဟုလည်း ခွမ်အာဏာ ထားဂေဟယ်။

43 နန်းနို့လေထဲမာ အယ်မျိုးဖြစ်ဂေန။ အယ်မျိုးဖြစ်

မယ့်စား ကီးဆောင်းဖြစ်ရှင်ဟူ ဖယ်လူဘဲဖြစ်ဖြစ် နန်းနို့
ထဲမာ စေခံဖြစ်ရမယ်။

44 အယ်ဘီးဟာ ကီးဆောင်း ဖြစ်ရှင်ဟူ ဖယ်လူဘဲ
ဖြစ်ဖြစ် ဂူလောင်းရဲ့ ကျွန်ဖြစ်ရမယ်။

45 ဖြားဖြစ်ကြောန်းနူးဆိုဟာ လူ့ရဲ့သားဟာလည်း ခိုင်း
စားဟို့လာဇာ မှုဟု။ သူဟာ စေခံဟို့န သူ့သတ်ဟို့ စွန့်ဘီး
လူလေဟို့ ဝီးနုတွပ် လာဟယ်” ဆိုဘီး မိန့်တော်မူလေဟ
ယ်။

ယေရှုဟာ မျစ်ကန်းဗာတိမဲဟို့ မြင်စေဟူကြောန်း
(မသဲ ၂၀.၂၉-၃၄; လုကာ ၁၈.၃၅-၄၃)

46 သူးနို့ဟာ ယေရိခေါမြို့ဟို့ ရော့-က်လာဂေဟယ်။
အယ်ဘီးဟာ ယေရှုဟာ တမဲ့တော်လေန ကီးမားဟူ လူ
အောက်ဂီးနတူးဒူ ထွပ်ဟားဟူ ခီမာ တိမဲရဲ့သား ဗာတိ
မဲ နာမယ်ရှိဟူ မျစ်ကန်းဒေါန်းဇား တယော့-က်ဟာ လမ်း
ဘေးမာ ထိုင်နေဟယ်။

47 သူဟာ နာဇရက်မြို့သား ယေရှု ဖြစ်ဟယ် ဆိုဇာဟို့
ကြားရဟူ ခီမာ သူဟု “ဒါဝိဒ်ရဲ့ သားတော်! ယေရှု! ကျွန်
တော့်ဟို့ သနားပါ!” ဆိုဘီး စဘီး အော်ဟစ်လေဟယ်။

48 လူလေဘောင်ဂီးဟု သူဟို့ ပြစ်တန်ဂေဘီး တိတိဟား
နေဟို့ ပြောဂေဟယ်။ အယ်ဘေမဲ့ သူဟု “ဒါဝိဒ်ရဲ့ သား
တော်၊ ကျွန်တော့်ဟို့ သနားပါ!” ဆိုဘီး ရင်ဟုထတ် ကုလ
ယ်ဟီး အော်ဟစ်လေဟယ်။

49 ယေရှုဟာ ရပ်လိုက်ဘီးန “သူ့ဟို့ ခေါ်ဂေ” ဆိုဘီး ပြောလေဟယ်။

အယ်ကြောန့် သူးနို့ဟာ မျစ်ကန်းဟို့ ခေါ်ဂေဟယ်။ သူး နို့ဟာ “အားငယ်န။ ထဒန်။ နန့်ဟို့ ကိုယ်တော် ခေါ်နေဟယ်” ဆိုဘီး ပြောဂေဟယ်။

50 အယ်လူဟာ သူးရဲ့ ဝတ်လောင်ဟို့ ဘေးဟို့ ပစ်ဒုလ လိုက်ဘီး၊ ထခူဘီးဟာ ယေရှုနားဟို့ လာဟယ်။

51 ယေရှုဟာ “နန့်တွပ် ဖြားဇာ လောက်ပေးစေရှင် ဟယ် နူး” ဆိုဘီး သူ့ဟို့ မေးလေဟယ်။

မျစ်စိကန်းဟူ လူဟာ “ဆရာ၊ ကျွန်တော် မြင်ရှင်ဟယ်” ဆိုဘီး ပြောလေဟယ်။

52 ယေရှုဟာ “သွားလိုက်၊ နန့်ရဲ့ ယောင်ကြည်ရှင်းဟာ န န့်ဟို့ ကျန်းမာစေဘီ” ဆိုဘီး မိန့်တော်မူလေဟယ်။

ရှစ်ရှင်းဘဲ အယ်လူဟာ မျစ်စိမြင်ဟူးဘီး လမ်းတ ရှော့-က်လောင်း ယေရှု နှော့-က်ဟို့ လိုက်လေဟယ်။

11

ယေရှုရှလင်မြို့ဟို့ အောက်ဗွဲခမ်းနားန ဝမ်ဟူးဟူကြော န်း

(မသဲ ၂၁.၁-၁၁; လုကာ ၁၉.၂၈-၄၀; ယောဟန် ၁၂.၁၂-၁၉)

¹ သူးနို့လေဟာ ယေရှုရှလင်မြို့န နီးကပ်လာဘီး သံလွင် တောန်မာရှိဟူ ဗက်ဖာဂေဝါန ဗေသနိဝါဟို့ ရော့-က်လာ

ဂေဟူ ခီမာ ယေရှုဟာ တဗဲတော် နှေ့ယော့-က်ဟို စေ လွတ်ဘီး၊

² သူးနို့ဟို ပြောနေဇာဟု “နန်းနို့ရှေ့မာရှိဟူ ဝါဟိုသွား ဂေ။ နန်းနို့ဟာ အယ်နေရာဟို ရော့-က်ရော့-က်ရှင်း ဖယ် သူလည်း စီးဖူးသေးဘဲဟူ မြည်းသားဂန်း တကောန်ဟို ခ ယ်ဟားဇာဟို နန်းနို့ တွဲလေ့မယ်။ အယ်မြည်းဟို ကြိုးဖြေ ဘီးဟာ ယူလာဂေ။

³ နန်းနို့ဟို ယော့-က်ယော့-က်ဟု ‘ဖြားဖြစ်ကြောန့် အယ် မျိုး လောက်ရဟယ်နူး’ ဆိုဘီး မေးမယ် ဆိုဟာ ‘သခင်* လိုရှိဟယ်။ အယ်နေရာဟို ရှစ်ရှင်း ပုလန်ပွဲပေးလေ့မယ်’ ဆိုဘီး ပြောဂေ” ဆိုဘီး မိန့်တော်မူဟယ်။

⁴ အယ်ကြောန့် သူးနို့ဟာ ထွပ်ဟားဘီး လမ်းဘေးဟု အီခွဗော့-က်မာ ခယ်ဟားဟူ မြည်းသားဂန်း တကောန်ဟို တွဲဂေဟယ်။ သူးနို့ဟာ မြည်းဟို ကြိုးဖြေနေဟူ ခီမာ

⁵ လမ်းမာရပ်နေဟူ လူတချို့ဟု “နန်းနို့ဟု ဖြားဖြစ် ကြောန့် အယ်မြည်းဟို ကြိုးဖြေနေဂေနူး” ဆိုဘီး သူးနို့ ဟို မေးဂေဟယ်။

⁶ သူးနို့ဟု ယေရှုပြောလိုက်တိုင်း ပုလန်ဖြေဂေဟယ်။ အယ်ဆိုန အယ်လူလေဟာ သူးနို့ဟို သွားခွမ့်ပေးဂေဟ ယ်။

⁷ သူးနို့ဟာ မြည်းသားဂန်းဟားဟို ယေရှုနားဟို ခေါ် ဆောန်လာဘီး မြည်းထတ်မာ သူးနို့ဝတ်လောင်ဟို တန်လို

* 11:3 သခင်၊ အယ်မျိုးမူဘဲနေဟာ မြည်းဇှောင်။

က်ဂေဟယ်။ အယ်ဘီးဟာ ယေရှုဟာ မြည်းဟို့ စီးလေဟယ်။

⁸ လူလေ ဘောင်းဂီးဟုလည်း သူးနို့ ဝတ်လောင်လေဟို့ လမ်းမာ ခမ်းဂေဟယ်။ တချို့လူလေဟာ ကွမ်းပုလန်ထဲ ဟုနေ သစ်ခတ်လေဟို့ ခွတ်ဘီး လမ်းမာခမ်းဂေဟယ်။

⁹ ရှေ့မာရှိဟူ လူလေန နှော့-က်ဟု လိုက်လာဟူ လူလေ ဟာ “ဟောရှုဏှာ! ဘုရားသခင်ရဲ့ နာမန ကြွလာဟူ သခင်ဟာ မင်္ဂလာရှိပါစေ!

¹⁰ ကြွလာနေဟူ နို့လေဖ ဒါဝိဒ်ရဲ့ နိုင်ငံတော်ဟာ မင်္ဂလာရှိပါစေ! မြင့်ဆောင်းမာ ဟောရှုဏှာ ဖြစ်ပါစေ! ဆိုဘီး ချီးမွမ်းဂေဟယ်!”

¹¹ ယေရှုဟာ ယေရှုရှလင်မြို့ထဲဟို့ ဝမ်ဘီး ဗိမာန်တော်ထဲဟို့ ကြွဟွားဟယ်။ အယ်ဘီးဟာ ရာရာဟို့ ကေတော်မူဟယ်။ အယ်ဘေမဲ့ နေဝမ်ဟွားဘီ ဖြစ်ဟူကြောန့် တမဲ့တော် ဆယ့်နေ့ပါးနတူးဒု ဗေသနိဝါဟို့ သွားလိုက်ဟယ်။

ယေရှုဟာ သဖန်းဗန်ဟို့ ကီဆဲဟူကြောန့်

(မသံ ၂၁.၁၈-၁၉)

¹² နှော့-က်တနေ့မာ သူးနို့ဟာ ဗေသနိဝါဟုနေ ပုလန်လာဂေဟူ ခီမ ယေရှုဟု ဗိုက်ဆာနေဟယ်။

¹³ ကိုယ်တော်ဟာ ဝပ်လေန ဖောင်းနေဟူ သဖန်းဗန်ဟို့ ဝီးဟုနေ မြင်လေဟယ်။ အယ်ကြောန့် သီးတွံနိုင်ဟယ် ဆိုဘီး ပန်နားဟို့ သွားလိုက်ဟယ်။ အယ်ဘေမဲ့ ပန်နားဟို့

ရော့-က်ဟွားဟူ ခီမာ သဖန်းသီးဆွပ်ဟို့ခီ ရော့-က်သေး
ဘဲဟူကြောန့် ဝပ်လေဘဲ တို့ဟယ်။

¹⁴ အယ်ဆိုန ယေရှုဟု “နန့်ရဲ့ သီးဟို့ ကာလစဉ်ဆစ်
ဖယ်သူလဲ စားရစေန!” ဆိုဘီး သဖန်းဗန်ဟို့ မိန့်တော်မူ
လေဟယ်။

တမ့တော်လေလည်း ကြားဂေ့ဟယ်။

ယေရှုဟု ဗိမာန်တော်ဟို့ သွားဟူကြောန့်

(မသဲ ၂၁.၁၂-၁၇; လုကာ ၁၉.၄၅-၄၈; ယောဟန်
၂.၁၃-၂၂)

¹⁵ သူးနို့ဟု ယေရုရှလင်မြို့ဟို့ ရော့-က်ဟွားဟူ ခီမာ
ယေရှုဟု ဗိမာန်တော်ဟို့ သွားဘီးဟု ရောန်းဝယ်နေဟူ
လူလေဟို့ စဘီးဟု နှန်ထုလေဟယ်။ ကိုယ်တော်ဟု ကပ်
လဲမားလေရဲ့ ဗွဲလေန ချိုးငုတ်ရောန်းနေဟူ ထိုင်ခေါင်လေ
ဟို့လည်း မော့-က်ပစ်လိုက်ဘီး

¹⁶ သူဟု ဗိမာန်တော်ဝမ်းဟို့ ဖြတ်ကူးဘီး ကူပစ်စီးလေ
ရောန်းဝယ်ဟို့တွပ် ဖယ်သူဟို့လည်း ခွမ်ပေးဟွမ်း။

¹⁷ အယ်ဘီးန ကိုယ်တော်ဟု လူလေဟို့ သွန်သန်ဇာဟု
“ ‘ငါ့ရဲ့ အီတော်ဟို့ လူမျိုးအားလောင်းတွပ် ဆုတောင်းအီ
ဆိုဘီး ခေါ်ခါရလေ့မယ်’ ဆိုဘီး ကျမ်းစာမာ ရေးဟွားဟု
ယ်မူလော။ အယ်ဘေမဲ့ နန်းနို့ဟု အယ်အီတော်ဟို့ မှလ
လေတွပ် နေရာဖြစ်ခိုင်းဂေ့ဟယ်!”

¹⁸ ယဇ်ပုရောဟိတ်ဂီးလေန ကျမ်းတတ်ဆရာလေဟု
အယ်ဇာဟို့ ကြားဟွားဂေ့ဟယ်။ အယ်ကြောန့် ယေရှုဟို့

သတ်ဟို့တွပ် စဘီးဟာ နည်းလမ်းရှာဂေဟယ်။ လူအောက်ဂီး တခုလောင်းဟာ ကိုယ်တော်ရဲ့ သွန်သန်ဇာဟို့ အံ့
ဩဟူးဟူကြောန့် သူးနို့ဟာ ကိုယ်တော်ဟို့ ကြော-က်နေ
ဂေဟယ်။

¹⁹ ညဉ့်မိုက်လာဟူ ခီမာ ယေရှုန တဗဲ့တော်လေဟာ မြို့
ပုလန်ဟို့ ထွပ်ဟူးဂေဟယ်။

သဖန်းဗန်ဟု သင်ဂန်းဇာ

(မသဲ ၂၁.၂၀-၂၂)

²⁰ သူးနို့ဟာ နော-က်တနေ့ မိုးလန်းစောစောဂီး လမ်း
ရှော-က်ဟူးဂေဟူ ခီမာ ပြစ်ဟုနေဘီး ခြော-က်နေဟူ
သဖန်းဗန်ဟို့ သူးနို့ဟာ မြင်ဟူးဂေဟယ်။

²¹ ပေတရဟု ဒီရဟူးဘီး ယေရှုဟို့ “ဆရာ၊ ကေလိုက်
ဂေ! ကိုယ်တော် ကီဆဲလိုက်ဟူ သဖန်းဗန်ဟာ ခြော-က်
ဟူးဘီး!” ဆိုဘီး လျော့-က်လေဟယ်။

²² ယေရှုဟု “ဘုရားသခင်ဟို့ ယောင်ကြည်ပါ။

²³ ငါ မှန်းမှန်ကန်းကန် ပြောမယ်။ ဖယ်လူဘဲ့ဖြစ်ဖြစ်
အယ်တောန်ဟို့ ‘အယ်နေရာဟုနေ ရွှေ့ဘီး ပန်လယ်ထဲဟို့
ကုလလော’ ဆိုဘီး သူ့ရဲ့ စိန်လောင်းထဲမာ သံသယမဲ့ဘဲ့
ယောင်ကြည်ဘီး ပြောမယ် ဆိုဟာ အယ်တိုင်းဘဲ့ ဖြစ်လေ
မယ်။

²⁴ အယ်ကြောန့် နန်းနို့ဟို့ ငါပြောမယ်။ နန်းနို့ဟာ တခုခု
တွက် ဆုတောင်းဘီး တောင်းရှော-က်ဟူ ခီမာ အယ်ဇာဟို့

ရပ်းဘီး ဆိုဘီး နန်းနို့ ယောင်ကြည်ဂေ။ အယ်ဆိုဟာ နန်း
နို့ ဖြားဇာဘွဲ တောန်းတောန်း ရဲဂေလေ့မယ်။

²⁵ နန်းနို့လေဟာ ရပ်ဘီး ဆုတောန်းဟူ ခီမာ နန်းနို့မာ
ယော့-က်ယော့-က်ဟို့ ပြစ်မှားဇာ တခုခုရှိမယ် ဆိုဟာ
အယ်လူဟို့ ခွမ်လွတ်ဂေ။ အယ်ဆိုဟာ ကောန်းဂန်ဘော
င်ဟု နန်းနို့ဖလည်း နန်းနို့လေရဲ့ ပြစ်ဟို့ လွတ်ပေးလေ့
မယ်။”

²⁶ †

ယေရှုရဲ့ ခွမ်အာဏာနု ဆိုင်ဟူမေးခွန်း

(မသံ ၂၁.၂၃-၂၇; လုကာ ၂၀.၁-၈)

²⁷ သူးနို့ဟာ ယေရှုလင်မြို့ဟို့ နော့-က်တခါ ရော့-က်
ဟားဂေဟယ်။ ယေရှုဟာ ဗိမာန်တော်ထဲမာ လမ်းရှော့-က်
နေဟူ ခီမာ ယဇ်ပုရောဟိတ်ဂီးလေ၊ ကျမ်းတတ်ဆရာလေ
နု သတ်ကီးဝါးဂီးလေဟာ ကိုယ်တော်နားဟို့ လာဂေဘီး

²⁸ ကိုယ်တော့်ဟို့ “အယ်မူဇာလေဟို့ ဖြားခွမ်အာဏာနု
လောက်နေနူး။ အယ်ခွမ်အာဏာဟို့ ဖယ်သူဟုပေးနူး” ဆို
ဘီး မေးဂေဟယ်။

²⁹ ယေရှုဟာ “နန်နို့ဟို့ ငါ မေးခွန်းတခု မေးမယ်။ နန်းနို့
ဟာ ငါဟို့ ဖြေပေးမယ် ဆိုဟာ အယ်မူဇာလေဟို့ လောက်
ဟို့ ငါမာ ဖြားခွမ်အာဏာ ရှိဟယ် ဆိုဇာဟို့ ငါပြောမယ်။

11:25 ၁၁.၂၅.၂၆ မ ၆.၁၄.၁၅ † **11:26 ၁၁.၂၆** တချို့
မူရင်းလတ်ရေးမူလေမာ ခန်းငယ် ၂၆ ဟို့၊ နန်းနို့ဟာ တခြားလူလေရဲ့
ပြစ်လေဟို့ လွတ်ဘဲနနေမယ် ဆိုဟာ ကောန်းဂန်ဘောင်ဟု နန်းနို့ဖဟာ
နန်းနို့ရဲ့ ပြစ်လေဟို့ လွတ်ပေးလေ့မယ် မူဟု၊ ဆိုဘီး ထပ်ပေါင်းထဲဟားဟယ်
(ရှု မ ၆.၁၅)။

30 ဗတုတိဇိပေးဟို့တွပ် ယောဟန်ရဲ့ ခွမ့်အာဏာဟာ ကောန်းဂန်ဟုနေ ဖြစ်ဇာလော။ လူဟုနေဖြစ်ဇာလော။ ငါ့ ဟို့ဖြေဂေ့!” ဆိုဘီး ပုလန်မိန့်တော်မူလေဟယ်။

31 သူးနို့ရှင်းရှင်း စဘီး ဆွေးနွေးဂေဇာဟု “နို့လေဟု ဖြားမျိုးပြောရဟို့နူး။ ‘ကောန်းဂန်ဟုနေ ဖြစ်ဟယ်’ ဆိုဘီး နို့လေဖြေမယ် ဆိုဟာ ‘အယ်ဆိုဟာ ဖြားဖြစ်ကြောန့် နန်း နို့ဟု ယောဟန်ဟို့ ယောင်ကြည်ဂေဟုနူး’ ဆိုဘီး သူဟာ ပြောလေ့မယ်။

32 ‘လူဟုနေဖြစ်ဟယ် ...’ ဆိုဘီး နို့လေ ဖြေမယ် ဆို ဟာ” သူးနို့လေဟာ လူလေဟို့ ကြော့-က်ဂေဟယ်။ ဖြား ဖြစ်ကြောန့်နူးဆိုဟာ ယောဟန်ဟို့ ပရောဖက်မှန် ဖြစ်ဟု ယ် ဆိုဘီး လူတိုင်းဟု မှတ်ယူဟားဂေဟယ်။

33 အယ်ကြောန့် သူးနို့ဟာ “ကျွန်တော့ဟားလေ သိဟု” ဆိုဘီး ယေရှုဟို့ ဖြေလိုက်ဂေဟယ်။

ယေရှုဟု “အယ်ဆိုဟာ အယ်မူဇာလေဟို့ ဖြားခွမ့် အာဏာနု ငါလောက်ဟယ် ဆိုဇာဟို့လည်း ငါပြောဟု” ဆို ဘီး သူးနို့ဟို့ မိန့်တော်မူလေဟယ်။

12

စဗျစ်ခြံလောက်မားလေရဲ့ ပေါင်ဥပမာ

(မသဲ ၂၁.၃၃-၄၆; လုကာ ၂၀.၉-၁၉)

1 အယ်ဘီးနု ယေရှုဟာ သူးနို့ဟို့ ပေါင်ဥပမာနု စဘီး ပြောလိုက်ဇာဟု “လူတယော့-က်ဟာ စဗျစ်ခြံဟို့ တည်

ဘီး၊ ခြံစည်းရိုး ပတ်ပတ်လည်ရံဘီး စပျစ်သီးနယ်ဟို့တွပ်
တွမ်းဟို့လည်း တူးလေဟယ်။ အယ်ဘီးဟာ မျှော်စင်ဟို့
ဆော့-က်ဟယ်။ အယ်ဘီးန သူဟာ စပျစ်ခြံလောက်မား
လေ တချို့ဟို့ ငှါးရစ်ဘီးဟာ ခရီးထွပ်ဟူးလေဟယ်။

² စပျစ်သီးဆွတ်ဟူခီ ရော့-က်လာဟူ ခီမာ စပျစ်ခြံဟု
သီးတချို့ဟို့ ယူဟို့တွပ် ကျွန်တယော့-က်ဟို့ ခြံလောက်
မားလေနားဟို့ လွတ်လိုက်ဟယ်။

³ ခြံလောက်မားလေဟာ အယ်ကျွန်ဟို့ ဖမ်းဘီး ရိုက်
လေဟယ်။ အယ်ဘီးဟာ လတ်ခဲခဲ ပုလန်လွတ်လိုက်ဂေ
ဟယ်။

⁴ အယ်ဆိုန ဇရှင်ဟာ နော့-က်ထပ် ကျွန်တယော့-က်
ဟို့ လွတ်လေဟယ်။ ခြံလောက်မားလေဟာ အယ်ကျွန်ဟို့
ခေါန်းရိုက်ခွဲဘီး ရှစ်ကွဲအောန် လောက်လေဟယ်။

⁵ ဇရှင်ဟာ နော့-က်ထပ် ကျွန်တယော့-က်ဟို့ လွတ်လေ
ဟယ်။ အယ်ဆိုန အယ်တယော့-က်ဟို့လည်း သူးနို့ဟု သ
တ်ဂေဟယ်။ အယ်ဘီးဟာ တခြားကျွန်လေ ဘောင်းဂီးဟို့
လည်း တချို့ဟို့ ရိုက်ဂေဘီး တချို့ဟို့ သတ်ဂေဟယ်။

⁶ အယ်လူရဲ့ ရှစ်ဆောင်းသား တယော့-က်ဒဲဘွဲ စေလွ
တ်ဟို့ ကျန်လေဟယ်။ သူဟု ‘သူးနို့လေဟာ ငါ့ရဲ့ သားဟို့
လေးစားဂေလေမယ်’ ဆိုဘီး ပြောဘီးန နော့-က်ဆောင်း
မာ သူရဲ့ သားဟို့ ခြံလောက်မားလေနားဟို့ စေလွတ်လေ
ဟယ်။

⁷ အယ်ဘေမဲ့ အယ်ခြံလောက်မားလေဟု ‘အယ်လူဟာ

ဇရှင်ရဲ့ မှီစားမှီခံ ဖြစ်ဟုယ်။ လာဂေ။ သူ့ဟို့ သတ်ဂေဇို။ အယ်ဆိုဟာ သူ့ရဲ့မှီအောက်စာဟာ နို့လေရဲ့ အောက်စာ ဖြစ်ဟူးလေ့မယ်၊’ ဆိုဘီး ရှင်းရှင်း ပြောဂေလေဟုယ်။

⁸ အယ်ကြောန့် သူးနို့ဟာ သူ့ဟို့ ဖမ်းဘီးဟာ သတ်လိုက် လေဟုယ်။ အယ်ဘီးန စပျစ်ခြံပုလန်ဟို့ ပစ်ဟူးလိုက်ဂေ ဟုယ်။”

⁹ “အယ်ဆိုဟာ စပျစ်ခြံဇရှင်ဟု ဖြားမျိုး လောက်လေ့ မယ်နူး။ သူ့ဟာ လာဘီး အယ်ခြံလောက်မားလေဟို့ သတ် ပစ်လိုက်ဘီးဟာ စပျစ်ခြံဟို့ တခြားလူလေဟို့ ပေးလေ့ မယ်။

¹⁰ အယ်ကျမ်းစာဟို့ နန်းနို့ဟာ သေးသေချားချာဟူး ဖ တ်ဂေဟုလော။”

“သောင်းဝမ်ဟု ဆိုဘီးဟာ တိုက်ဆောက်မားလေ ဖယ်
ဟူးဟူကုလော့-က်ဟာ
ရေး ကီး ဆော င်း ဟူ ဒေါ န် ချော က် ကု လော့-က်
ဖြစ်လာရဟုယ်။

¹¹ အယ်ဇာဟာ ဘုရားသခင်အားဖြင့် ဖြစ်လာဟုယ်။
နို့လေရှေ့မာ အံ့ဩဘွယ်ဖြစ်ဟုယ်!”

¹² အယ်န သူးနို့လေဟာ ယေရှုဟို့ ဖမ်းဟို့ ကြိုးစားဂေ ဟုယ်။ ဖြားဖြစ်ကြောန့်နူးဆိုဟာ ကိုယ်တော်ဟာ သူးနို့ဟို့ စောန်းဘီးဟာ အယ်ဥပမာဟို့ ပြောလိုက်ဟုယ် ဆိုဇာဟို့ သူးနို့ဟာ သိဂေဟုယ်။ အယ်ဘေမဲ့ သူးနို့ဟာ လူအောက်

ဂီးဟို့ ကြော-က်ဂေဟယ်။ အယ်ကြောန့် ကိုယ်တော့်ဟို့ ထားရစ်ဘီး ထွပ်ဟားဂေဟယ်။

ခွန်ပေးဇာနဆိုင်ဟူမေးခွန်း

(မသဲ ၂၂.၁၅-၂၂; လုကာ ၂၀.၂၀-၂၆)

¹³ အယ်ဘီးန သူးနို့ဟာ ကိုယ်တော်ရဲ့ စကားထဲမာ ကိုယ်တော့်ဟို့ ဖမ်းဟို့တွပ် ဖာရ်ရဲတချို့န ဟေရ်ဒရဲ့လူလေ တချို့ဟို့ ယေရုရှားဟို့ လွတ်လိုက်ဂေဟယ်။

¹⁴ အယ်လူလေဟာ ယေရုရှားဟို့ လာဘီး “ဆရာ၊ ကိုယ်တော်ဟာ လူလေဖြားမျိုးဘဲထန်ထန် စိုးရိမ်မှုမော့ဘဲန မှန်တိုင်းဘဲ ပြောဟယ် ဆိုဇာဟို့ ကျွန်တော့်ဟားလေ သိဂေဟယ်။ ကိုယ်တော်ဟာ ဖယ်လူရဲ့ မျစ်နာဟို့လည်း ကော့ဘဲန လူလေတွပ် ဘုရားသခင်ရဲ့ လိုတော်ဟို့ မှန်တိုင်း သွန်သန်လေဟယ်။ ကံသာမန်းဂီးဟို့ ခွန်ပေးဇာဟာ ကျွန်တော့်ဟားလေရဲ့ ပညတ်တရားဟို့ ဆန့်ကျင်နေဇာလော။ ကျွန်တော့်ဟားလေဟာ ခွန်ပေးသင့်လော။ ပေးသင့်ဟုလော” ဆိုဘီး မေးလျော့-က်ဂေဟယ်။

¹⁵ အယ်ဘောမဲ့ ယေရုဟာ အယ်လူလေရဲ့ ဟန်ဆောန်ဇာဟို့ သိဟူကြောန့် “နန်းနို့ဟ ငါဟို့ ဖြားဖြစ်ကြောန့် ထောန်ချော့-က်ဆင်ဟို့ ကြိုးစားဂေနှူး” ဆိုဘီး မေးလေဟယ်။ “ဒေနာရိတပုလားဟို့ ယူလာဂေ၊ ငါကော့ကော့မယ်။”

¹⁶ သူးနို့ဟာ ဒန်းဂီးဟို့ ယူလာဂေဟယ်။ အယ်ဆိုန ကိုယ်တော်ဟာ “အယ်ဇာဟာ ဖယ်လူရဲ့ရောက်ပေါင်နှူး။ အယ်ဘီးဟာ ဖယ်လူရဲ့လိစာနှူး” ဆိုဘီး မေးလေဟယ်။

သူးနှိဟု “ကဲသာရဲ့ ရောက်ပေါင်န လိစာ ဖြစ်ဟယ်” ဆိုဘီး ပုလန်လျှော့-က်လေဟယ်။

17 အယ်ကြောန့် ယေရှုဟု “ကဲသာန ဆိုင်ဇာဟို့ ကဲသာဟို့ ပေးဂေ။ ဘုရားသခင်န ဆိုင်ဇာဟို့ ဘုရားသခင်ဟို့ ပေးဂေ” ဆိုဘီး သူးနှိလေဟို့ မိန့်တော်မူလေဟယ်။ အယ်ဆိုန သူးနှိလေဟု ယေရှုဟို့ အံ့ဩဟူးဂေဟယ်။

သေရာဟုနေ ထမြော့-က်ဇာန ဆိုင်ဟူမေးခွန်း
(မသ် ၂၂.၂၃-၃၃; လုကာ ၂၀.၂၇-၄၀)

18 အယ်ဘီးန သေရာဟုနေ ထမြော့-က်ဇာ မှေ့ဟု ဆိုဘီး ပြောဟူ ဇဒျုကဲတချို့ဟု ယေရှုနားဟို့ လာဘီး၊

19 “ဆရာ၊ ‘လူတယော့-က်ဟု သားမီးလေမှေ့ဘဲန သေဟူးဘီး မယားဟို့ ထားရစ်မယ် ဆိုဟု၊ အယ်လူရဲ့ ညီဟု အယ်မောက်ဆိုးမဟို့ ယူရမယ် အယ်ဘီးဟု သူးနှိမာ ရလာဟူ သားမီးလေဟို့ သူ့နောန်ရဲ့ သားမီးလေ ဆိုဘီး မှတ်ယူရမယ်’ ဆိုဘီး အယ်ပညတ်တရားဟို့ ကျွန်တော့် လေတွပ် မောရှေဟု ရေးဟူးဟယ်။

20 ညီကိုခွန်နစ်ယော့-က်ရှိဘီး၊ နောန်ဂီးဟု မီးမယူဘီးဟု သားမီးလေမှေ့ဘဲန သေဟူးဟယ်။

21 အယ်ဆိုန ဒုတိယညီဟု အယ်မီးမဟို့ ယူလိုက်ဟယ်။ သူလည်းဘဲ သားမီးလေမှေ့ဘဲန သေဟူးဟယ်။ တတိယညီဟုလည်း အယ်မျိုးဘဲဖြစ်ဘီး

22 ညီကို ခွန်နစ်ယော့-က်လောင်းဟာ အယ်မီးမဟို ယူဘီး သားမီးလေမွေ့ဘဲန သေဟားဂေဟယ်။ နှော့-က်ဆောင်းမာ အယ်မီးမဟုလည်း သေဟားဟယ်။

23 ရှင်ပုလန်ထမြော့-က်နေမာ ဂူလောင်းဟာ ထမြော့-က်ဟူ ခီမာ အယ်မီးမဟာ ဖယ်လူရဲ့ မယားဖြစ်မယ်နူး။ သူးနို့ ခွန်နစ်ယော့-က်လောင်းဟာ အယ်မီးမဟို ယူဟားဂေဟယ်” ဆိုဘီး ပြောဂေဟယ်။

24 ယေရှုဟာ “နန်းနို့ဟာ ကျမ်းစာဟိုလည်း သိဂေဟ။ ဘုရားသခင်ရဲ့ တဂိုးတော်ဟိုလည်း သိဂေ့ဘဲဟူကြောန့် အယ်မျိုးယူလွဲနေဂေဟယ် မူဟုလော။

25 ပြားဖြစ်ကြောန့်နူးဆိုဟာ လူလေဟာ သေရာဟုနေထမြော့-က်ဟူ ခီမာ သူးနို့ဟာ အီထောန်ပြုဇာမွေ့ဘဲန ကောန်းဂန်ဘောင်မာ ကောန်းဂန်တမန်လေမျိုး ဖြစ်ဟားလေ့ဟယ်။

26 သေဟားဟူလူလေ ထမြော့-က်ရှင်းန ပတ်သတ်ဘီး မောရှေရဲ့ကျမ်းမာ မီးလောန်နေဟူ ချောင်နဆိုင်ဟူ ကျမ်းပိုင်ဟို ဖတ်ဖူးဂေဟလော့။ အယ်ကျမ်းမာ ရေးဟားဇာဟု ဘုရားသခင်ဟာ ‘ငါဟာ အာဗြဟံရဲ့ ဘုရားသခင်၊ ဣဇာက်ရဲ့ ဘုရားသခင်၊ ယာကုပ်ရဲ့ ဘုရားသခင် ဖြစ်ဟယ်’ ဆိုဘီး မောရှေဟို ပြောဟားဟယ်။

27 အယ်သခင်ဟာ သေဟားဟူ လူလေရဲ့ ဘုရားသခင်မူဟ။ သတ်ရှင်နေဟူ လူလေရဲ့ ဘုရားသခင်ဖြစ်ဟယ်။ နန်းနို့ဟာ ရရာတိုင်း ယူလွဲနေဂေဟယ်!” ဆိုဘီး ပုလန်ဖြေ

လေဟယ်။

ကီးမြတ်ဟူ ပညတ်တော်ကြောန်း

(မသဲ ၂၂.၃၄-၄၀; လုကာ ၁၀.၂၅-၂၈)

²⁸ အယ်နေရာမာ ဆွေးနွေးဟူးဇာလေဟုံ ကြားဟူးဟူ ကျမ်းတတ်ဆရာ တယော-က် ရှိနေဟယ်။ ယေရှုဟာ ဇဒ္ဒါကဲလေဟုံ ကောန်းဟူ ဖြေဟုံ ပေးလိုက်ပီးဘိ ဆိုဇာဟုံ သူမြင်ဟာဘီး ကိုယ်တော်ဟုံ “ပညတ်လေ ဂူလောင်းထဲ မာ ဖယ်ပညတ်ဟာ ရေးကီးဆောင်းဖြစ်နူး” ဆိုဘီး မေးလျှော့-က်လေဟယ်။

²⁹ ယေရှုဟာ “ရေးကီးဆောင်း ပညတ်ဟာ ‘ဣသရေလ လူမျိုးလေ၊ နားထောန်ဂေ့! နို့လေရဲ့ သခင် ဘုရားသခင် ဟာ တဆူဒဲရှိဟူ ဘုရားသခင် ဖြစ်ဟယ်။”*

³⁰ နန်ရဲ့ သခင်၊ ဘုရားသခင်ဟုံ စိန်လောင်းစွမ်းရှိမျှ၊ စိဝိညာဉ်စွမ်းရှိမျှ၊ ဉာဏ်စွမ်းရှိမျှ၊ ကိုယ်စွမ်းရှိမျှ ရှစ်ပါ။’

³¹ ‘နန်ရဲ့ အီဇနီးရှင်းဟုံ နန်ကိုယ်နန် ရှစ်မျိုး ရှစ်ပါ’ ဆိုဇာဟာ ဒုတိယ ရေးကီးဆောင်း ပညတ်ဖြစ်ဟယ်။ အယ် ပညတ် နေ့ခုထတ် ပိုဘီး ရေးကီးဟူ ပညတ် မှေဟာ” ဆိုဘီး ယေရှုဟာ ပုလန်ဖြေလေဟယ်။

³² ကျမ်းတတ်ဆရာဟာ ယေရှုဟုံ “မှန်ပါဟယ် ဆရာ! ဘုရားသခင်ဟာ တဆူဒဲဘဲရှိဘီး ဘုရားသခင်မှတပါး

12:28 ၁၂.၂၈-၃၄ လု ၁၀.၂၅-၂၈ * 12:29 ၁၂.၂၉ နို့လေရဲ့ သခင် ဘုရားသခင်ဟာ တဆူဒဲရှိဟူ ဘုရားသခင် ဖြစ်ဟယ်၊ အယ်မျိုးမူဘွဲနေဟာ နို့လေရဲ့ သခင် ဘုရားသခင်ဟာ တပါးဒဲရှိဟူ ဘုရားသခင် ဖြစ်ဟယ်။

တခြားဘုရား မေ့ဟု ဆိုဘီး ဆရာပြောဇာဟာ မှန်ဟယ်။

³³ ဘုရားသခင်ဟို့ စံနှလောင်းစွမ်းရှိဟူမျှ၊ ဉာဏ်စွမ်းရှိ
မျှ၊ ကိုယ်စွမ်းရှိမျှန ရှစ်ပါ။ အယ်ဘီးဟာ နန်ရဲ့ အီဇနီးရှ
င်းဟို့ နန်ကိုယ်နန် ရှစ်မျိုးဘဲ့ ရှစ်ပါ ဆိုဇာဟာ ဘုရားသခ
င်ဟို့ ပူဇော်ဟူ မီးရှို့ယဇ်န တခြားယဇ် ဂူလောင်းထတ် ပို
ဘီး ရေးကီးဟယ်” ဆိုဘီး ပုလန်လျှော့-က်လေဟယ်။

³⁴ အယ်လူရဲ့ဖြေဟာ ရရာတိုင်း ပညာရှိဟယ် ဆိုဇာ
ဟို့ ယေရှု မြင်ဟားဟူ ခီမာ ကိုယ်တော်ဟု “နန်ဟာ
ဘုရားသခင်ရဲ့ နိုင်ငံတော်န ဝီးဟု” ဆိုဘီး သူးဟို့ မိန့်တော်
မူလေဟယ်။

အယ်ဘီးန ဖယ်သူဟုလည်း ယေရှုဟို့ ထပ်ဘီး မေးခွန်း
လေဟို့ မေးရဲဂေဟမ်း။

မေရှိယန ဆိုင်ဟူမေးခွန်း

(မသဲ ၂၂.၄၁-၄၆; လုကာ ၂၀.၄၁-၄၄)

³⁵ ယေရှုဟု ဗိမာန်တော်မာ သွန်သန်နေဟူ ခီမာ ကိုယ်
တော်ဟု “ခရစ်တော်ဟာ ဒါဝိဒ်ရဲ့သားမှလေး ဖြစ်ဟယ်
ဆိုဘီး ကျမ်းတတ်ဆရာလေဟု ဖယ်မျိုးပြောနိုင်ဂေနှူး။

³⁶ ဒါဝိဒ်ကိုယ်တိုင် သန်ရှင်းဟူဝိညာဉ်တော်အားဖြင့်
ပြောဟားဇာဟု၊

“ဘုရားသခင်ဟု ငါ့သခင်ဟို့ ပြောဟယ်။

နန်ရဲ့ ရန်သူလေဟို့ နန်ရဲ့ ခေဖွားအော့-က်မာ ခုလ
ဟားခန်ထိ

ငါ့ရဲ့ ညာဖတ်မာ ထိုင်နေပါ။”

37 “ဒါဝိဒ်ကိုယ်တိုင်ဟု ကိုယ်တော့်ဟို့ ‘သခင်’ ဆိုဘီး ခေါ်ဟယ်။ ဖယ်မျိုး ဖြစ်ဟူကြောန့် မေရှိယဟာ ဒါဝိဒ်ရဲ့ သားမှလေး ဖြစ်နိုင်ဟို့နူး” ဆိုဘီး ကြေညာလေဟယ်။

ယေရှုဟု ကျမ်းတတ်ဆရာလေဟို့ ရှောန်ဟို့ ဒီပေးဟူကြောန်း

(မသဲ ၂၃.၁-၃၆; လုကာ ၂၀.၄၅-၄၇)

လူအောက်ဂီးဟာ ယေရှုရဲ့ စကားဟို့ ဝန်းသာအားရ နားထောန်နေဂေဟယ်။

38 အယ်မျိုး သွန်သန်နေဟူ ခီမာ ယေရှုဟု “ကျမ်းတတ်ဆရာလေဟို့ ဒီထားဂေ။ သူးနို့ဟာ ဝတ်လောင်ရှယ်လေဟို့ ဝတ်ဘီးဟာ ရှော့-က်သွားရဇာ ကြိုက်ဂေဘီး ဆေးလေမာ ရိုသေပေးဇာဟို့ ခံရှင်ဂေဟယ်။

39 ဝါလယ်ဇရပ်လေမာ သီးသပ်ထားဟားဟူ ထိုင်ခေါင်လေ၊ စားသော့-က်မွဲလေမာလည်း ကောန်းဆောင်း နေရာလေဟို့ ဝီးကော့-က်ဂေဟယ်။

40 မောက်ဆိုးမလေရဲ့ အီလေဟို့ တရားဘဲဟူနည်းန သီးယူဟယ်။ အယ်ဘီးဟာ လူကြားကောန်းအောန် ရှယ်ဟီး ဆုတောင်းဂေဟယ်။ သူးနို့ရဲ့ ပြစ်ဒန်ဟာ ပိုဘီး ဆိုးလေမယ်!” ဆိုဘီး မိန့်တော်မူလေဟယ်။

မောက်ဆိုးမရဲ့ လူငွေကြောန်း

(လုကာ ၂၁.၁-၄)

41 ယေရှုဟာ ဗိမာန်တော် လှူခံစောင်းရှေ့မှာ ထိုင်နေဟူ ခီမာ လှူခံစောင်းထဲဟို့ လူလေဟာ ကပ်ထုံနေဇာဟို့ ကေ့ ရှူနေဟယ်။ ကပ်ပေါဟူ လူလေဘောင်ဂီးဟာ ကပ်ဘောင် ဂီး ထုံဂေ့ဟယ်။

42 အယ်ဘေမဲ့ ဆင်းရဲဟူ မောက်ဆိုးမတယော့-က်ဟာ လာဘီးဟာ တပဲလော့-က်ဘွဲတန်ဘီး ရရာတိုင်း နဲဟူ ကြေးပုလား နှေးပုလားဟို့ ထုံလေဟယ်။

43 ယေရှုဟာ တမဲ့တော်လေဟို့ ခေါ်ဘီးဟာ “နန်းနို့ဟို့ ငါ မှန်တိုင်းပြောမယ်၊ အယ်ဆင်းရဲဟူ မောက်ဆိုးမဟာ လှူခံစောင်းထဲဟို့ ထုံဝမ်ဂေ့ဟူလူလေ ဂူလောင်းထတ် ပို ဘီး ဟာ ထုံလေဟယ်။

44 ဖြားဖြစ်ကြောန်နှူးဆိုဟာ အယ်လူလေ ဂူလောင်းဟာ သူးနို့ရဲ့ ကြွယ်ဝဇာလေထဲဟု နဘီး ထုံဂေ့ဟယ်။ အယ်မီး မဟာ ရရာတိုင်း ဆင်းရဲဘေမဲ့လည်း သူဟာ သတ်မီးဟို့ အောက်စာ ဂူလောင်းဟို့ ထုံလေဟယ်” ဆိုဘီး သူးနို့ဟို့ မိန်တော်မူလေဟယ်။

13

ယေရှုဟာ ဗိမာန်တော်ပျစ်စီးမယ့်ဇာဟို့ ပြောဟူကြော န်း

(မသံ ၂၄.၁-၂; လုကာ ၂၁.၅-၆)

1 ယေရှုဟာ ဗိမာန်တော်ဟုနေ ထွပ်ဟားနေဒူးမာ၊ တ မဲ့တော်လေထဲဟု တယော့-က်ဟု “ဆရာ၊ ကေ့ကေ့! ရ

ရာတိုင်းအံ့သြဘွယ်ကောင်းဟူ ကုလော့-က်တောင်းလေန ဆော့-က်ဦးလေ!” ဆိုဘီး ကိုယ်တော်တို့ဟို့ ပြောလေဟယ်။

² ယေရှုဟု “အယ်ဆော့-က်ဦးဂီးလေဟို့ နန်းနို့ မြင်ဘဲ လော။ ကုလော့-က်တောင်းလေ တလောင်းလည်း အယ် ဆော့-က်ဦးရဲ့ ရင်နေရာမာ ကျန်ဂေဟို့ မူဟု။ ကုလော့-က် တောင်းလေ အားလောင်း ပြိုကုလလေ့မယ်” ဆိုဘီး ပု လန်ဖြေလေဟယ်။

ဆင်းရဲဒေါက်ခန ညဉ့်ဗန်းနှိစစ်ဇာလေကြောင်း

(မဿဲ ၂၄.၃-၁၄; လုကာ ၂၁.၇-၁၉)

³ ယေရှုဟု သံလွင်တောန်ထတ်မာ ဗိမာန်တော်ဖတ်ဟို့ မျစ်နှာမူဘီး ထိုင်နေဟူ ခီမာ ပေတရု၊ ယာကုပ်၊ ယောဟန် န အနုဒြေလေဟု ကိုယ်တော်နားဟို့ တိတိဟား လာဂေ ဟယ်။

⁴ သူးနို့လေဟု “အယ်ဇာလေဟု ဖယ်ခီမာ ဖြစ်လာလေ့ မယ် ဆိုဇာဟို့ ကျွန်တော့်ဟားလေဟို့ ပြောပြပါ။ အယ်ဘီး ဟု အယ်ဇာလေ အားလောင်း ပုလဲဇောင်ဟို့ ဖြားနိမိတ် ဖြစ်လာလေ့မယ် ဆိုဇာဟို့ ကျွန်တော့်ဟားလေဟို့ ပြောပြ ပါ” ဆိုဘီး လျော့-က်ဂေဟယ်။

⁵ ယေရှုဟု “နန်းနို့ဟို့ ဖယ်သူလည်း လှည့်ဇားနိုင်အောန် ဒီထားဂေ။

⁶ လူလေဘောင်ဂီးဟု ငါ့နာမန ရော့-က်လာဘီး ပြော ဇာဟု ‘ငါ့ဟု အယ်လူဘဲ ဖြစ်ဟယ်!’ ဆိုဘီး လူလေဘော င်ဂီးဟို့ လှည့်ဇားဂေလေ့မယ်။

⁷ နန်းနို့လေဟာ စစ်ပွဲလေန စစ်ပွဲဒန်းလေဟို ကြားရဟူ ခီမာ ထိလန့်ဟူးဂေ့န။ အယ်ဇာလေဟု ဖြစ်ရမယ်။ အယ်ဘေမဲ့ ဆောင်းဟာရော-က်သေးဟူ။

⁸ လူမျိုးလေဟာ သူးနို့ရှင်းရှင်း တိုက်ခိုက်လေ့မယ်။ နိုင်ငံလေဟာ သူးနို့ရှင်းရှင်း တိုက်ခိုက်လေ့မယ်။ နေရာတိုင်းမာလည်း မှလေငလျင်လေ လော့-က်လေ့မယ်။ အယ်ဘီးဟာ စားဇာ ရှားပါးလေ့မယ်။ အယ်ဇာလေဟာ သားမွီးဟူ ဝေဒနာရဲ့ စဖြစ်လေဟယ်။

⁹ “နန်းနို့ ကိုယ်တိုင်ဟာ ဒိရှိရမယ်။ နန်းနို့ဟာ ဖမ်းခံရဂေ့ဘီး တရားရောင်းဟို ခေါ်ဟူး ခံရဂေ့လေ့မယ်။ ဝါလယ်ဇရပ်လေမာလည်း နန်းနို့ဟာ ရိုက်ခံရလေ့မယ်။ နန်းနို့ဟာ မြို့ဝန်မန်းလေန မန်းဂီးလေ ရှေ့မာ မတ်တတ်ရပ်ဘီးဟာ သူးနို့ဟို ငါ့တွပ် သတ်သေဖြစ်စေလေ့မယ်။

¹⁰ အယ်ဘေမဲ့ ဆောင်းရော-က်ခန်မာ ဒန်းကောင်းဟို လူမျိုးဂူလောင်းဟို ဟောပြောရလေ့မယ်။

¹¹ နန်းနို့ဟို ဖမ်းဘီး တရားရောင်းဟို ခေါ်ဟူးဂေ့ဟူ ခီမာ ပြားမျိုးပြောရမယ် ဆိုဇာဟို ကြိုတန်ဘီး စိုးရိမ်ဂေ့န။ ခီရော-က်လာဟူ ခီမာ နန်းနို့ဟို ဖော်ပြဟူ စကားလေဟို ပြောဂေ့။ ပြားဖြစ်ကြောန့်နူးဆိုဟာ အယ်စကားဟို နန်းနို့ပြောနေဇာ မှဟု သန်ရှင်းဟူဝိညာဉ်တော် ပြောနေဇာဖြစ်ဟယ်။

¹² လူလေဟာ သူးနို့ရဲ့ ညီကိုရင်းဟို သေစေဟိုတွပ် အ

ပ်ဂေ့လေ့မယ်။ အယ်ဘီးဟာ ဖလေဟာ သူးနီရဲ့ သားမီးလေဟို သေစေဟိုတွပ် လောက်လေ့မယ်။ သားမီးလေဟာ လည်း သူးနီရဲ့ မိဖလေဟို ရန်ပြုဘီးဟာ သေစေဟိုတွပ် လောက်လေ့မယ်။

¹³ ငါ့နာမကြောန့် လူတိုင်းဟာ နန်းနီလေဟို မူးတီးလေ့မယ်။ အယ်ဘေမဲ့ ဆောင်းထိ တည်ကြည်ဟူလူဟာ ကယ်တန်ရှင်းဟို ခံရလေ့မယ်။

ရွံ့ဇာကောန်းဟူ ဇာလေကြောန်း

(မသဲ ၂၄.၁၅-၂၈; လုကာ ၂၁.၂၀-၂၄)

¹⁴ “‘ရွံ့ဇာကောန်းဟူဇာ’ ဟာ မေ့အပ်ဘဲဟူ နေရာမာ ရှိနေဇာဟို နန်းနီလေဟာ မြင်ရဂေ့လေ့မယ်။” စာဖတ်လူဟာ အယ်ဓိပါယ်ဟို နားလည်ပါစေ! “အယ်ဆိုဟာ ယုဒနယ်မာရှိဟူ လူလေဟာ တောန်ထတ်ဟို ပုလေးဂေ့စေ။

¹⁵ အီးခေါန်မိုးထတ်မာ ရှိဟူလူဟာ အော့-က်ဟို ဆင်းဘီး အီထဲဟို ဝမ်ဘီးဟာ ဖြားဇာလည်း ယူစေန။

¹⁶ လယ်ထဲမာ ရှိဟူ လူဟာ သူရဲ့ ဝတ်လောင်ဟို ယူဟိုတွပ် အီဟို ပုလန်စေန။

¹⁷ အယ်နေရစ်ဟာ ဝန်းရှင်မလေန သားရှင်မိလေ ရရာတိုင်း ခတ်ခဲလေ့မယ်!

¹⁸ အယ်ဇာလေဟာ ဆောန်းကာလမာ ဖြစ်ဘဲဟိုတွပ် ဆုတောင်းဂေ့!

¹⁹ ဖြားဖြစ်ကြောန့်နူးဆိုဟာ ဘုရားသခင် ဖန်ဆင်းဟူ

ကမ္ဘာဦးစဟုနေ ခုခီထိ အယ်နေရစ်လေရဲ့ ရရာတိုင်း ဆိုးဝါးဟူ ဆင်းရဲဒေါက်ခမျိုး ဖြစ်ဖူးဟု။ နှော-က်ထပ်လည်း အယ်မျိုး ဖြစ်လေ့ဟို့ မှဟု။

²⁰ ဘုရားသခင်ဟာ အယ်နေရစ်လေဟို့ ရှယ်စေမယ် ဆိုဟာ ဖယ်လူလည်း သတ်ရှင်ဘီး လွတ်လေ့ဟို့ မှဟု။ အယ်ဘေမဲ့ ကိုယ်တော် ဝီးကော့-က်ဟားဟူ လူလေတွပ် အယ်နေရစ်လေဟို့ တိုစေလေ့မယ်။

²¹ “အယ်ကာလမာ ယော့-က်ယော့-က်ဟု ‘ကော့ကော့။ အယ်နားမာ ခရစ်တော် ရှိဟယ်! ဟို့နားမာ ခရစ်တော် ရှိဟယ်!’ ဆိုဘီး နန်းနို့ဟို့ ပြောမယ် ဆိုဟာ အယ်လူဟို့ ယောင်ကြည်ဂေ့နု။

²² ဖြားဖြစ်ကြောန့်နွဲ့ဆိုဟာ ခရစ်တော် တုယောန်လေန ပရောဖက် တုယောန်လေဟာ ပေါ်လာလေ့မယ်။ ဖြစ်နိုင်မယ် ဆိုဟာ သူးနို့လေဟာ ဘုရားသခင် ဝီးကော့-က်ဟားဟူ လူလေဟို့လည်း လှည့်ဇားနိုင်ဟို့တွပ် အံ့ဩဘွယ်လေ န နိမိတ်လတ်ခဏာလေဟို့ ပြဂေ့လေ့မယ်။

²³ အယ်ကြောန့် နန်းနို့ဟာ ဒိန်နေဂေ့! ငါဟာ အယ်ဇာလေ ဂူလောင်းဟို့ နန်းနို့ဟို့ ကြိုတန်ဘီး ပြောပြဟားဟယ်။

လူရဲ့သား ပုလန်ကြွလာဟို့ကြောန့်

(မသဲ ၂၄.၂၉-၃၁; လုကာ ၂၁.၂၅-၂၈)

²⁴ “ဒေါက်ခဆင်းရဲလေ ကုလရော့-က်လာဟူ နေရစ်

လေမာ နေဟာ မိုက်ဟွားလေ့မယ်။ လဟာလည်း လန်းဟို့
မှုဘိ။

²⁵ ကြယ်လေဟာ ကောန်းဂန်ဟုနေ ကွီကုလလေ့မယ်။
အယ်ဘီးဟာ အာကာသ တဂိုးလေဟာ လှောက်ဂေ့လေ့
မယ်။

²⁶ အယ်ခီမာ မိုးတီထဲမာ ကီးမားဟူ တဂိုးတော်န ဖောင်း
သရေတော်လေနတူးဒု လူရဲ့သား ကြွလာဇာဟို့ လူလေ
ဟာ မြင်ရဂေ့လေ့မယ်။

²⁷ အယ်ဘီးန လူရဲ့သားဟာ ကောန်းဂန်တမန်လေဟို့
ရပ်လေးမျှစ်နာဟို့ စေလွှတ်ဘီး မုလေဂီးစွန်းဟုနေ တခြား
တဖတ်စွန်းထိ ဘုရားသခင်ရဲ့ ဝီးကော့-က်ဟွားဟူ လူလေ
ဟို့ စုသီးလေ့မယ်။

သမန်းဗန်ရဲ့ သင်ဂန်းဇာကြောန်း

(မသဲ ၂၄.၃၂-၃၅; လုကာ ၂၁.၂၉-၃၃)

²⁸ “သမန်းဗန်ဟုနေ သင်ဂန်းဇာ တခုဟို့ သန်ယူဂေ။
အယ်ပန်ရဲ့ ခတ်လေဟာ နုလာဘီး ဝပ်လေထွပ်လာဟူ ခီ
မာ နွီကာလ နီးလာဘိ ဆိုဇာဟို့ နန်းနို့ဟာ သိဂေ့ဟယ်။

²⁹ အယ်မျိုးဘဲ အယ်မူဇာလေ ဖြစ်လာဇာဟို့ နန်းနို့ဟာ
မြင်ရဟူ ခီမာ လူရဲ့သားဟု ခွဗော့-က်ဝနီးဟို့ ရော့-က်နေ
ဘိ* ဆိုဇာဟို့ သိမှတ်ဂေပါ။

13:25 ၁၃.၂၅ ဗျာ ၆.၁၃ 13:26 ၁၃.၂၆ ဗျာ ၁.၇ * 13:29
၁၃.၂၉ ခွဗော့-က်ဝနီးဟို့ ရော့-က်နေဘိ၊ အယ်မျိုးမူဘဲနေဟာ ကိုယ်တော်
ရော့-က်လာခါနီးဟွားဘိ။

30 ငါ မှန်တိုင်းပြောမယ်၊ အယ်မူဇာလေ ဂူလောင်း ဖြစ်သေးခန့် ခု သတ်ရှင်နေဟူ လူလေဟာ လောင်းဝ သေရလေ့ရှိ မှုသေးဟူ။

31 ကောန်းဂန်န မုလေဂီးဟာ ပျစ်စီးဟူးလေ့မယ်။ အယ်ဘေမဲ့ ငါ့ရဲ့ စကားလေဟာ လောင်းဝ ပျစ်စီးဟို့ မှုဟူ။

အယ်နေရစ်ခီနာရီဟို့ ဖယ်လူလည်းသိဟု

(မသေ ၂၄.၃၆-၄၄)

32 “အယ်ဘေမဲ့လည်း အယ်နေရစ် နာရီ ရော့-က်လာဟူ ခီဟို့ ဖယ်လူလည်း သိဂေဟု ကောန်းဂန်ဘောင်ဟု ကောန်းဂန်တမန်လေလည်း သိဟူ။ သားတော်လည်း သိဟူ။ ဖတပါးဒဲဘဲ သိလေဟယ်။

33 ဒိပြုဘီး ခုနီးနီးကြားကြား နေဂေ။ ဖြားဖြစ်ကြောန့် နူးဆိုဟာ အယ်ခီဟာ ဖယ်ခီမှ ရော့-က်လာမယ် ဆိုဇာဟို့ နန်းနီလေ သိဂေဟူ။

34 အယ်ဇာဟာ ဝီးဟို့ ထွပ်ဟူးဟူ လူတယော့-က်နတူဟယ်။ သူဟာ သူ့အီဟို့ ထားရစ်ဘီး သူ့ရဲ့ စေခံလေဟို့ ခွမ့်အာဏာန လောက်ကိုယ်စီ လောက်ဆောန်ဟို့ မိန့်ပေးဟူးရစ်ဟယ်။ အယ်ဘီးဟာ ခွဗော့-က်စောန်မားဟို့ ဒိနစောန်ဟို့ ပြောဟူးရစ်ဟယ်။

35 အယ်ဆိုဟာ ဒိနစောန်ဂေ။ ဖြားဖြစ်ကြောန့်နူးဆိုဟာ အီဇရှင်ဟာ ဖယ်ခီပုလန်လာမယ် ဆိုဇာဟို့ နန်းနီလေ သိ

ဂေဟှ။ နေဒန်ဇာခါ၊ ညဉ့်နတ်ခါ၊ မိုးသာထခါ၊ မိုးလန်းစော
စောဂီး၊ ခီလေမာ ဖြစ်ရှင်ဖြစ်မယ်။

³⁶ သူဟှာ ရောက်တရစ် ရော့-က်လာမယ် ဆိုဟှာ နန်းနို့
လေ အိမ့်နေဇာဟှို တွံစေန။

³⁷ အယ်ဘီးဟှာ နန်းနို့ဟှို ပြောဟှားတိုင်း လူတိုင်းဟှို
လည်း ငါပြောဟှယ်။ ဒိနစောန်နေဂေ့!” ဆိုဘီး သူးနို့ဟှို
မိန်တော်မူလေဟှယ်။

14

ယေရှုဟှို သတ်ဟှို ကြံစည်ဂေဟှာကြောင်း

(မသဲ ၂၆.၁-၅; လုကာ ၂၂.၁-၂; ယောဟန် ၁၁.၄၅-
၅၃)

¹ ပသခါပွဲန တဆေးမ္မေဘဲဟှာ မုပွဲတော်ဖြစ်ခန် နေ့
ရစ်လိုမာ၊ ယဇ်ပုရောဟိတ်ဂီးလေန ကျမ်းတတ်ဆရာလေ
ဟှာ ယေရှုဟှို တိတိဟှားဖမ်းဘီး သတ်ဟှိုတွပ် နည်းလမ်း
ရှာကြံနေဂေဟှယ်။

² သူးနို့ဟှာ “နို့လေဟှာ ပွဲတော်ရစ်ထဲမာ အယ်ဇာဟှို
လောက်ဂေ့န၊ လူလေဟှာ ရောင်းရင်းဆန်ခတ် ဖြစ်ဟှားနို့
င်ဟှယ်” ဆိုဘီး ပြောဂေဟှယ်။

ဗေသနိဝါမာ ယေရှုဟှာ ဆီမီးလောင်းခံရဟှာကြောင်း

(မသဲ ၂၆.၆-၁၃; ယောဟန် ၁၂.၁-၉)

³ ယေရှုဟှာ ဗေသနိဝါမာ နူနာရောဂါဖြစ်ဖူးဟှာ ရှိမုန်ရဲ့
အီမာရှိဟှယ်။ ယေရှုဟှာ စားသော့-က်နေဒူးမာ မီးမတ

ယော့-က်ဟာ ရရာတိုင်း ဖိုးကီးဘီး နာဒုဆီမွီးစစ်စစ်န ပု
လဲနေဟူ ကုလော့-က်ဖုလူဖူးဟို ယူဘီး ရော့-က်လာဟု
ယ်။ အယ်ဘီးဟာ အယ်ဖူးဟို ရိုက်ခွဲလိုက်ဘီးဟာ ယေရှု
ရဲ့ ခေါင်းထတ်ဟို လောန်းခလလေဟယ်။

4 အယ်နေရာမာရှိဟူ လူတချို့ဟာ စီဆိုးလာဘီးဟာ
“ဖြားဖြစ်ကြောန့် အယ်ဆီမွီးဟို ကျိုးမွေ့ဘဲန လောက်နေ
ရနိုး။

5 အယ်ဆီမွီးဟို ငွေဒန်းဂါး* ၃၀၀ ကျော်န ရောင်းဘီး
ဟာ အယ်ကပ်လေဟို ဆင်းရဲသားလေဟို ပေးရမယ်!” ဆို
ဘီး ယော့-က်နယော့-က်ပြောနေဂေဟယ်။ အယ်ဘီးဟာ
သူနိုးဟာ အယ်မီးမဟို ရရာတိုင်း ပြစ်တန်ဂေဟယ်။

6 အယ်ဘေမဲ့ ယေရှုဟု “အယ်မီးမဟို ထားလိုက်ဝေါ!
ဖြားဖြစ်ကြောန့် သူဟို နောက်ရှစ်နေဂေနိုး။ သူဟု ငါ့တွပ်
ကောန်းဟူဇာဟို လောက်ဟယ်။

7 ဆင်းရဲသားလေဟာ နန်းနိုးန မြဲဒမ်း ရှိဂေဟယ်။ အယ်
ဘီးဟာ နန်းနိုး လိုရှင်ဟူခီတိုင်း သူနိုးဟို ကူညီနိုင်ဟယ်။
အယ်ဘေမဲ့ ငါဟု နန်းနိုးန မြဲဒမ်းရှိနေဟို မဟု။

8 အယ်မီးမဟာ သူတတ်နိုင်မျှလောက်ဟယ်။ သံဂြိုဟ်
ဟို့တွပ် ကြိုတန်ဘီးဟာ ငါ့ရဲ့ကိုယ်ထတ်ဟို ဆီမွီးလောန်း
ခလလေဟယ်။

9 နန်းနိုးဟို ငါ မှန်တိုင်းပြောမယ်၊ ကမ္ဘာနို့ ဧဝံဂေလိ
ဟောပြောဟူ နေရာတိုင်းမာအယ်မီးမ လောက်ရစ်ဇာလေ

* 14:5 ၁၄.၅ ငွေဒန်းဂါး၊ ရှု ၆၃၇။

ဟို့လည်း သူရဲ့ မှတ်တရဖြစ် ပြောကြားရလေ့မယ်” ဆိုဘီး မိန့်တော်မူလေဟယ်။

ယေရှုဟို့ သစ်စာဖော့-က်ဟို့ ယုဒဘောတူဟူကြောန်း
(မသဲ ၂၆.၁၄-၁၆; လုကာ ၂၂.၃-၆)

¹⁰ အယ်ဘီးန တမဲ့တော်ဆယ့်နှေ့ပါးထဲဟု တပါးဖြစ်ဟူ ယုဒရှုကာရုတ်ဟာ ယဇ်ပုရောဟိတ်ဂီးလေနားဟို့ ယေရှုဟို့ အပ်ဟို့တွပ် သူးနို့နားဟို့ သွားလေဟယ်။

¹¹ သူလာပြောဇာဟို့ သူးနို့လေဟာ ကြားရခီမာ ဝန်းသာဟားဟယ်။ အယ်ဘီးဟာ သူဟို့ ကပ်ပေးဟို့တွပ် ဒိပေးရေဟယ်။ အယ်ကြောန့် ယုဒဟာ ယေရှုဟို့ အပ်ဟို့တွပ် ခွမ့်ကောန်းဟို့ စဘီး ရှာနေလေဟယ်။

ယေရှုဟု တမဲ့တော်လေန ပသခါညဉ့်ဇာ စားဟူကြောန်း

(မသဲ ၂၆.၁၇-၂၅; လုကာ ၂၂.၇-၁၄, ၂၁-၂၃; ယောဟန် ၁၃.၂၁-၃၀)

¹² တဆေးမော့ဘဲဟူ မုပွဲတော်ရဲ့ ပထမနေ၊ ပသခါသိုးသားဂန်းဟားလေဟို့ သတ်ရဟူ နေ့မာ ယေရှုရဲ့ တမဲ့တော်လေဟာ “ကိုယ်တော်တွပ် ပသခါ ညဉ့်ဇာစားဟို့ ကျွန်တော့်ဟားလေဟို့ ဖယ်နားမာသွားဘီး ပြင်ဆင်စေရှင်ဟယ်နူး” ဆိုဘီး ကိုယ်တော်ဟို့ မေးလျှော့-က်ရေဟယ်။

¹³ အယ်ကြောန့် ယေရှုဟု တမဲ့တော်နှေ့ပါးဟို့ စေလွှတ်လေဟယ်။ သူးနို့ဟို့ ပြောလိုက်ဇာဟု “မြို့ထဲဟို့ သွားရေ။

ရေအိုးထမ်းလာဟု လူတယော့-က်ဟု နန်းနို့ဟို့ တို့ဂေလေ့မယ်။ သူ့နော့-က်ဟို့ လိုက်ဟူးဂေ့။

14 သူဝမ်ဟူးဟူ အီရဲ့ အီဇရှင်ဟို့ ပြောပါ ‘ဆရာဟု ငါ့တမဲ့တော်လေနတူးဒူး ပသခါ ညဉ့်ဇာစားဟို့တွပ် ခန်းဟာ ဖယ်မာနူး’ ဆိုဘီး ဆရာဟု မေးခိုင်းလိုက်ဟယ် ဆိုဘီး ပြောပါ။

15 အယ်ဆိုဟာ သူဟာ သင့်ပြင်ဆင်ဟူးဘီး ကီးမားဟူ ထပ်ခန်းမဟို့ နန်းနို့ဟို့ ပြလေ့မယ်။ အယ်ခန်းမာ နို့လေတွပ် ညဉ့်ဇာစားဟို့ ပြင်ဂေ့ပါ။”

16 အယ်တမဲ့တော်လေဟာ ထွပ်ဟူးဘီး မြို့ထဲဟို့ ဝမ်ဟူးဂေ့ဟူ ခီမာ သူးနို့ဟို့ ယေရှုပြောလိုက်တိုင်းဘဲ ဂူလောင်းဟို့ တို့ရလေဟယ်။ အယ်ကြောန့် သူးနို့ဟာ ပသခါ ညဉ့်ဇာစားဟို့ ပြင်ဆင်ဂေ့ဟယ်။

17 ညဉ့်ခန်းဇာ ရော့-က်လာဟူ ခီမာ ယေရှုဟာ တမဲ့တော်ဆယ်နှေ့ပါးနတူးဒူ ကြွလာဂေ့ဟယ်။

18 သူးနို့ဟာ ဗွဲမာထိုင်ဘီး စားနေဂေ့ဒူးမာ ယေရှုဟု “နန်းနို့ဟို့ ငါ မှန်တိုင်းပြောမယ်၊ နန်းနို့ထဲဟု တယော့-က်ဟာ ငါ့ဟို့ သစ်စာဖော့-က်လေ့မယ်။ အယ်လူဟာ ငါ့နတူးဒူ စားသော့-က်နေဟယ်” ဆိုဘီး မိန့်တော်မူလေဟယ်။

19 တမဲ့တော်လေဟာ စိကောန်းဘဲ ဖြစ်ဟူးဂေ့ဘီး “ကျွန်တော်လော” ဆိုဘီး ယော့-က်ဘီးယော့-က် ကိုယ်တော်ဟို့ စဘီးမေးလျှော့-က်ဂေ့ဟယ်။

20 ယေရှုဟု “တဆယ့်နှစ်ပါးထဲဟု တပါးဖြစ်ဘီး ငါ့န တူးဒူး စံထဲမာ မုနှိုက်ဟူလူ ဖြစ်ဟုယ်။

21 လူ့ရဲ့သားဟာ ကျမ်းစာမာ ရေးဟူးတိုင်း သေခံရ လေ့မယ်။ အယ်ဘေမဲ့ လူ့ရဲ့သားဟို့ သစ်စာဖော့-က်ဟူ အယ်လူတွပ် အမင်္ဂလာဖြစ်ဟုယ်! အယ်လူဟာ မွီးဖွားလာ ဘဲနေဇာဟု သူ့တွပ် ပိုဘီး ကောန်းသေးဟုယ်!” ဆိုဘီး ပု လန်ဖြေတော်မူလေဟုယ်။

သခင်ဘုရားရဲ့ညဉ့်ဇာကြောင်း

(မသံ ၂၆.၂၆-၃၀; လုကာ ၂၂.၁၄-၂၀; ၁ ကောရိနု သု ၁၁.၂၃-၂၅)

22 သူးနို့လေဟာ စားနေဒူးမာ ယေရှုဟာ မဟိုယူဘီး၊ ကျေးဇူးတော်ဟို့ ချီးမွမ်းဘီးမှ မဟိုဖဲဘီးဟာ တမဲ့တော် လေဟို့ ပေးလေဟုယ်။ ကိုယ်တော်ဟု “ယူဂေ။ အယ်မု ဟာ ငါ့ရဲ့ကိုယ်ခန္ဓာ ဖြစ်ဟုယ်” ဆိုဘီး မိန့်တော်မူလေဟု ယ်။

23 ခွပ်ဟို့လည်း ယူဘီးဟာ ဘုရားသခင်ရဲ့ ကျေးဇူး တော်ဟို့ ချီးမွမ်းလေဟုယ်။ အယ်ဘီးန သူးနို့လေဟို့ ပေးလိုက်ဟုယ်။ သူးနို့လေ ဂူလောင်းဟာ အယ်ခွပ်ဟို့ သော့-က်ဂေဟုယ်။

24 ယေရှုဟု “အယ်ဇာဟာ လူလေတွပ် လောန်းပေးဟူ ဘုရားသခင်ရဲ့ ပဋိညာဉ်နဇိခတ်ဟူးဟူ ငါ့ရဲ့သွီးဖြစ်ဟု ယ်။

25 နန်းနို့ဟို့ ငါ မှန်ပြောမယ်၊ ဘုရားသခင်ရဲ့ နိုင်ငံတော် မာ စပျစ်ပိုင်သစ်ဟို့ သော့-က်ရဟူ နေ့ရော့-က်ခန်ထိ ငါ ဟာ အယ်စပျစ်ပိုင်ဟို့ နော့-က်တခါ လောင်းဝ သော့-က် ဟို့မူဘီ” ဆိုဘီး မိန့်တော်မူလေဟယ်။

26 အယ်ဘီးန သူးနို့လေဟာ ချီးမွမ်းချင်းဟို့ ဆိုဘီး သံလွင်တောန်ဟို့ ထွပ်ဟားဂေဟယ်။

ယေရှုဟာ ပေတရုငြင်းပယ်မယ် ဆိုဇာဟို့ ကြိုတန် ပြောဟူကြောန်း

(မသံ ၂၆.၁-၃၅; လုကာ ၂၂.၃၁-၃၄; ယောဟန် ၁၃.၃၆-၃၈)

27 ယေရှုဟ “ငါ့ဟို့ ထားရစ်ဘီး နန်းနို့ဂူလောင်းဟာ ထွပ်ပုလေးလေ့မယ်၊ ဖြားဖြစ်ကြောန်းနူးဆိုဟာ ကျမ်းစာ ထဲမာ ပြောဟားဇာဟာ ‘ဘုရားသခင်ဟာ သိုးထီးမားဟို့ ရိုက်သတ်လေ့မယ်၊ အယ်ဆိုဟာ သိုးလေဂူလောင်းဟာ ဆွတ်ဆွတ်ဖုလူဟားဂေလေ့မယ်။’

28 အယ်ဘေမဲ့ ငါဟာ ထမြော့-က်ဟားဘီးန၊ ငါဟာ ဂါ လိလဲနယ်ဟို့ နန်းနို့ထတ်ရင်သွားလေ့မယ်” ဆိုဘီး သူးနို့ လေဟို့ မိန့်တော်မူလေဟယ်။

29 ပေတရုဟ “တခြားလူလေ ဂူလောင်းဟာ ထားရစ် ဂေ့ဘေမဲ့၊ ကျွန်တော့်ဟာ ကိုယ်တော့်ဟို့ လောင်းဝထားရစ် ဟို့ မူဟာ!” ဆိုဘီး ပုလန်လျော့-က်လေဟယ်။

³⁰ ယေရှုဟု “နန်ဟို့ ငါ မှန်တိုင်းပြောမယ်၊ ခုညဉ့်မှာဘဲ ကြစ်နေ့ခါ တွန်ခန်မာ နန်ဟု ငါ့ဟို့ သိဟုဆိုဘီး သောင်းခါ ပြောလေ့မယ်” ဆိုဘီး ပေတရုဟို့ မိန့်တော်မူလေဟယ်။

³¹ အယ်ဘေမဲ့ ပေတရုဟု “ကျွန်တော့်ဟု ကိုယ်တော်န တူးဒု သေရမယ် ဆိုဟုလည်း၊ အယ်မျိုးလောင်းဝ ငြင်းပယ်ဟို့ မူဟု!” ဆိုဘီး လေးလေးနတ်နတ်ဟူး ပုလန်လျှော့-က်လေဟယ်။

အယ်ဘီးဟု တခြားတမဲ့တော်လေ အားလောင်းဟုလည်း အယ်မျိုးဘဲ လျှော့-က်ဂေဟယ်။

ယေရှုဟု ဂေသရှေမန်မာ ဆုတောင်းဟူကြောင်း
(မသံ ၂၆.၃၆-၄၆; လုကာ ၂၂.၃၉-၄၆)

³² သူးနို့လေဟု ဂေသရှေမန် ဆိုဘီး နာမယ်ခေါ်ဟူ နေရာဟို့ သွားဂေဟယ်။ အယ်ဘီးန ယေရှုဟု “ငါဆုတောင်းနေဒူးမာ အယ်နေရာမာ ထိုင်နေဂေပါ” ဆိုဘီး တမဲ့တော်လေဟို့ ပြောဟယ်။

³³ ကိုယ်တော်ဟု ပေတရု၊ ယာကုပ်န ယောဟန်ဟို့ သူးနတူးဒု ခေါ်ဆောန်ဟူးလေဟယ်။ ဆိုးဝါးဟူ ပုပန်သောကဟု ကိုယ်တော်ဟို့ စိုးမိုးလာလေဟယ်။

³⁴ အယ်ဘီးဟု ကိုယ်တော်ဟု “ငါ့စိဟု သေလော့-က်အောန် ဝန်းနဲနေလေဟယ်။ အယ်နေရာမာ နေရစ်ဘီး ဒိနစောန်နေဂေ” ဆိုဘီး သူးနို့ဟို့ မိန့်တော်မူဟယ်။

35 ကိုယ်တော်ဟု ရှေ့ဟို့ နံနဲတိုးဟူးဘီးဟာ သူ့ကိုယ်သူ မှလေဂီးမာ လဲဒုလလိုက်ဘီး ဖြစ်နိုင်မယ် ဆိုဟာ အယ်ခိ နာရီဟို့ သူ့ဟုနေ လွန်ဟူးစေပါ ဆိုဘီး ဆုတောင်းလေဟု ယ်။

36 “အဗုဗ၊ ဖ! ကိုယ်တော်တွပ် ရှိမျှဂူလောင်းဟာ ဖြစ်နိုင်ဟယ်။ အယ်ဝေဒနာခွပ်ဟို့ ကျွန်တော့်နားဟုနေ ဖယ်ပေးပါ။ အယ်ဘေမဲ့ ကျွန်တော့်ရဲ့ လိုဖြစ်စေန။ ကိုယ်တော်ရဲ့ လိုဘဲ ဖြစ်စေပါ။”

37 အယ်ဘီးန ကိုယ်တော်ဟာ ပုလန်လာဟူ ခီမာ တဗွဲတော်သောင်းပါးဟာ အိမ္မိနေဂေဇာဟို့ တွံဟူးဟယ်။ ကိုယ်တော်ဟု “ရှိမုန်၊ နန်ဟု အိမ္မိနေလော။ တနာရီလော့-က် စောန်နေနိုင်ဟုလော” ဆိုဘီး ပေတရုဟို့ မိန်တော်မူလေဟယ်။

38 ကိုယ်တော်ဟု “နန်းနို့ဟာ စောင်ဇမ်းသွီးဆောန်မူထဲဟို့ ကုလဘဲနေဟို့တွပ် ဆုတောင်းဘီး စောန်နေဂေ။ ဝိညာဉ်ဟုဆန္ဒရှိဘေမဲ့ ဇာတိဟုအားနည်းဟယ်” ဆိုဘီး သူးနို့ဟို့ မိန်တော်မူလေဟယ်။

39 ကိုယ်တော်ဟာ နော့-က်တခါ ထွပ်ဟူးဘီး၊ ရင်တိုင်းဘဲ ဆုတောင်းလေဟယ်။

40 ကိုယ်တော်ဟာ ပုလန်လာဟူ ခီမာ သူးနို့မျှစ်စိလေဟု လေးလံနေဟူကြောန့် အိမ္မိနေဇာဟို့ တခါတွံဟူးဟယ်။ သူးနို့ဟာ ကိုယ်တော်ဟို့ ပြားဇာပြောရဟို့ သိဂေဟမ်း။

41 ကိုယ်တော်ဟာ သောင်းခါမြော့-က် ပုလန်လာဟူ ခီ

မာ ကိုယ်တော်ဟု “နန်းနို့ဟာ ခုထိ အိမ်မီးဘီး နားယူနေသေးလော။ တော်ဘီ! ခီနာရီဟာ ရှေး-က်လာဘီ! ကော့ဂေ့! လူ့ရဲ့သားဟာ ပြစ်သားလေရဲ့ လတ်ထဲဟို့ အယ်န့်ခံရမယ်။

⁴² ထဂေ့။ နို့လေ သွားဂေ့ဇိ။ ငါ့ဟို့ အပ်ဟို့လူဟာ ရှေး-က်လာဘီး!” ဆိုဘီး မိန့်တော်မူလေဟယ်။

ယေရှုဟို့ ဖမ်းဂေ့ဟူကြောန်း

(မသံ ၂၆.၄၇-၅၆; လုကာ ၂၂.၄၇-၅၃; ယောဟန် ၁၈.၃-၁၂)

⁴³ တမဲ့တော် ဆယ့်နှေ့ပါးထဲဟု တပါးဖြစ်ဟူ ယုဒဟာ ရှေး-က်လာဟူ ခီမာ ယေရှုဟာ စကားပြောနေဒူး ဖြစ်ဟယ်။ သူနတူးဒူ ဒေါက်လေ၊ ထားလေကိုင်လာဟူ လူအောက်ဂီး ပါလာဘီး အယ်လူလေဟို့ ယဇ်ပုရောဟိတ်ဂီးလေ၊ ကျမ်းတတ်ဆရာလေန သတ်ကီးဝါဂီးလေဟု စေလွှတ်လိုက်ဟယ်။

⁴⁴ ကိုယ်တော့်ဟို့ အပ်ဟူ လူဟု “ငါနမ်းဟူ လူဟာ နန်းနို့ လိုရှင်နေဟူလူ ဖြစ်ဟယ်။ သူဟို့ ဖမ်းဘီး စောန့်လေန ခေါ်ဟွားဂေ့” ဆိုဘီး လူအောက်ဂီးဟို့ ချစ်ပြဘီး မှတ်သားပေးဟွားလေဟယ်။

⁴⁵ ယေရှုနားဟို့ ရှစ်ရှင်း သွားဘီး၊ ယုဒဟု “ဆရာ!” ဆိုဘီး ခေါ်လိုက်ဘီး ကိုယ်တော့်ဟို့ နမ်းလေဟယ်။

⁴⁶ အယ်ကြောန့် သူးနို့ဟု ယေရှုဟို့ ဖမ်းဘီး ချောက်ဟွားဂေ့ဟယ်။

47 အယ်ဘောမဲ့ နားမာရပ်နေဟူ လူလေထဲဟု တယော့-က်ဟာ ထားဟို့ ဆွဲထုဘီး ယဇ်ပုရောဟိတ်မန်းရဲ့ ကျွန်တယော့-က်ဟို့ ခွတ်လိုက်ဟူ ခီမာ အယ်လူရဲ့ နားဝှပ် ပြတ်ဟူးဟယ်။

48 အယ်ဆိုန ယေရှုဟာ “ငါဟာ မှလတယော့-က် ဖြစ်ဟူကြောန့် နန်းနို့ဟာ ငါ့ဟို့ ဖမ်းဟို့တွပ် ဒေါက်လေ၊ ထားလေန ရော့-က်လာဂေ့ ဇာလော။

49 ငါဟာ နေ့တိုင်း နန်းနို့တူဒူး ဗိမာန်တော်ထဲမာ သွန်သန်နေဟယ်။ နန်းနို့ဟာ ငါ့ဟို့ ဖမ်းဂေ့ဟုမား။ အယ်ဘောမဲ့ ကျမ်းစာတိုင်းဘဲ ပုလဲဇောင်လာရမယ်” ဆိုဘီး သူးနို့လေဟို့ မိန့်တော်မူလေဟယ်။

50 အယ်ဆိုန တမဲ့တော်လေဟာ ကိုယ်တော့်ဟို့ ထားရစ်ဘီး ထွပ်ပုလေးဟူးဂေ့ဟယ်။

51 ပိချောဝတ် တထည်ဘဲ ခြောင်ဟူးဟူ လူငယ် တယော့-က်ဟာ ယေရှုနော့-က်ဟို့ လိုက်လာဟယ်။ သူးနို့ဟာ သူ့ဟို့ ဖမ်းဟို့ ကြိုးစားဂေ့ဟူ ခီမာ

52 သူဟာ ပိချောဝတ်ဟို့ ထားရစ်ဘီးဟာ ခုလေးပုလန်း ဗုလန်းန ထွပ်ပုလေးဟူးလေဟယ်။

ယေရှုဟာ တရားလွှတ်တော်ရှေ့မာ

(မသံ ၂၆.၅၇-၆၈; လုကာ ၂၂.၅၄-၅၅, ၆၃-၇၁; ယောဟန် ၁၈.၁၃, ၁၄, ၁၉-၂၄)

53 အယ်ဘီးန ယေရှုဟို့ ယဇ်ပုရောဟိတ်ဂီးလေ၊ သတ်ကီးဝါဂီးလေန ကျမ်းတတ်ဆရာလေ စုဝီးနေဟူ ယဇ်ပုရောဟိတ်မန်းရဲ့ အီဟို့ ခေါ်ဆောန်ဟူးဂေဟယ်။

54 ပေတရုဟ ခပ်ဝီးဝီးဟုနေ လိုက်လာဘီး ယဇ်ပုရောဟိတ်မန်းရဲ့ အီဝမ်းထဲဟို့ ဝမ်ဟူးလေဟယ်။ အယ်နေရာမာ သူဟာ စောန်လေနတူးဒူ ထိုင်ဘီး မီးကန်နေလေဟယ်။

55 ယဇ်ပုရောဟိတ်ဂီးလေန တရားလွှတ်တော် တခု လောင်းဟာ ယေရှုဟို့ သေဒန်ပေးနိုင်ဟို့တွပ် ကိုယ်တော်ဟို့ ဆန့်ကျင်ထွပ်ဆိုမယ့် သတ်သေတချို့ဟို့ ရှာဟို့ ကြိုးစားဂေဟယ်။ အယ်ဘေမဲ့ သူးနို့ဟာ ပြားဇာလည်း ရှာတို့ဂေဟယ်။

56 သတ်သေလေ ဘောင်းဂီးဟာ ယေရှုဟို့ ဆန့်ကျင်ဟို့ လီညာဘီး ထွပ်ဆိုဂေဟယ်။ အယ်ဘေမဲ့ သူးနို့ထွပ်ဆိုဇာလေဟု တူညီဂေဟယ်။

57 အယ်ဆိုန လူတချို့ဟာ ထရပ်ဘီးဟာ ယေရှုဟို့ ဆန့်ကျင်ဟို့ အယ်မျိုးလီညာဘီး ထွပ်ဆိုလိုက်ဇာဟု

58 “ ‘လူလောက်ဟူးဟူ အယ်ဗိမာန်တော်ဟို့ ငါဖြိုဖျစ်မယ်။ အယ်ဘီးဟာ သောင်းရစ်ကြာဘီးန လူလောက်ဘဲဟူ ဗိမာန်တော်ဟို့ ငါပုလန်ဆော့-က်မယ်’ ဆိုဘီး သူပြောဇာဟို့ ကျွန်တော့်လေ ကြားဟူးဟယ်။”

59 အယ်ဘေမဲ့လည်း သူးနို့ရဲ့ သတ်သေထွပ်ဆိုချစ်ဟာ

တူညီဂေဟု။

60 ယဇ်ပုရောဟိတ်မန်းဟာ သူးနှိလေ ဂူလောင်းရဲ့ ရှေ့
မာ ရပ်ဘီးဟာ ယေရှုဟို “အယ်လူလေဟာ နန်းဟို စွပ်စွဲ
ပြောဆိုနေဇာ နန်ဟာ ဖြားလည်းဖြေဘဲန နေဟို့လော” ဆို
ဘီး မေးလေဟယ်။

61 အယ် ဘေ မဲ့ ယေ ရှု ဟာ ဇ ပ် ပေါ့-က် ဟို့ ပိ
ဟားဘီး စကားခွန်းလည်း ပြောဟု။ တခါပုလန်ဘီး
ယဇ်ပုရောဟိတ်မန်းဟာ “နန်ဟာ မင်္ဂလာရှိဟူ ဘုရားသခင်
ရဲ့ သားတော် ခရစ်တော်လော” ဆိုဘီး ကိုယ်တော့်ဟို့ မေး
လေဟယ်။

62 ယေရှုဟာ “ငါဘွဲ့ဖြစ်ဟယ်။ လူ့ရဲ့သားဟာ တဂိုးတော်
ရဲ့ ညာဖတ်မာ ထိုင်နေဘီး ကောင်းဂန်မိုးတီဟို့ စီးဘီးလာ
နေဇာဟို့ နန်းနှိ ဗြင်ရလေ့မယ်” ဆိုဘီး မိန့်တော်မူလေဟ
ယ်။

63 ယဇ်ပုရောဟိတ်မန်းဟာ မိမိဝတ်ယောင်ဟို့ ဆုဖုလဲ
ဘီးဟာ “နှိလေဟာ နော့-က်ထပ် ဖြားသတ်သေလေ လို
သေးဟယ်နှူး။

64 ဘုရားသခင်ဟို့ ပြစ်မှားဘီး ပြောနေဟူ စကားဟို့ နန်း
နှိ ကြားရဂေဘီ။ နန်းနှိရဲ့ စီရင်ချစ်ဟာ ဖယ်မျိုးနှူး” ဆိုဘီး
မေးလိုက်ဟယ်။

သူးနှိလေ ဂူလောင်းဟာ ကိုယ်တော့်ဟို့ သေဒန်ခံထိုက်
ဟယ် ဆိုဘီး စီရင်ဂေလေဟယ်။

⁶⁵ သူးနို့ထဲဟုတချို့ဟာ ယေရှုဟို စဘီးဟာ ထိုးရယ်
န ထိုးဂေဟယ်။ အယ်ဘီးဟာ ကိုယ်တော့်ဟို မျစ်နှာဟို
ဖောင်းဘီး လတ်သီးန ထိုးဂေဟယ်။ “ဖယ်လူဟု ရိုက်လို
က်ဟယ် ဆိုဇာဟို ပရောဖက်ပြုပါ!” ဆိုဘီး သူးနို့ဟု ပြော
ဂေဟယ်။ အယ်ဘီးဟာ စောန့်လေဟာ ကိုယ်တော့်ဟို ခေါ်
ဆောင်းဟားဘီး ကိုယ်တော့်ဟို ပါးရိုက်ဂေဟယ်။

ပေတရုဟု ယေရှုဟို ငြင်းပယ်ဟူကြောင်း

(မသဲ ၂၆.၆၉-၇၅; လုကာ ၂၂.၅၆-၆၂; ယောဟန်
၁၈.၁၅-၁၈, ၂၅-၂၇)

⁶⁶ ပေ တ ရှ ဟာ အယ် အီ ဝမ်း ထဲ မာ ရှိ နေ ခူး မာ
ယဇ်ပုရောဟိတ် မန်း ရဲ့ စေ ခံ ဝယ် သား လေ ထဲ ဟု တ
ယော့-က်ဟာ ရော့-က်လာဟယ်။

⁶⁷ အယ်ဝယ်သားဟာ ပေတရု မီးကန်နေဇာဟို မြင်ဟူ ခိ
မာ သူဟာ သူဟို စေ့စေ့ကော့ဘီး “နန်ဟာလည်း နာဇရက်
မြို့သား ယေရှုနတူးဒူး ရှိနေဟယ်” ဆိုဘီး ပြောလေဟ
ယ်။

⁶⁸ အယ်ဘေမဲ့ ပေတရုဟာ “နန်ပြောနေဇာလေဟို ငါသိ
ဟု။ ငါနားလည်ဟု” ဆိုဘီး ငြင်ဘီးဟာ ပုလန်ဖြေလိုက်
ဟယ်။ အယ်ဘီးန ခြံဝဟို ထွပ်ဟားလေဟယ်။ အယ်ခီမာ
ဘဲ ကြစ်တွန်လေဟယ်။†

⁶⁹ စေခံဝယ်သားဟာ ပေတရုဟို အယ်နေရာမာ တို့ဟူ
ခီမာ နားမာရပ်နေဟူ လူလေဟို “အယ်လူဟာ သူးနို့လေ

† 14:68 ၁၄.၆၈ တချို့ မူရင်းလတ်ရေးမူလေမာ အယ်ခီမာဘဲ
ကြစ်တွန်လေဟယ်၊ ဆိုဇာဟာ မေ့ဟု။

ထဲဟု တယော့-က်ဖြစ်ဟယ်!” ဆိုဘီး ထပ်ပြောပုလန်ဟယ်။

⁷⁰ အယ်ဘောမဲ့ ပေတရုဟာ နော့-က်တခါ ငြင်းပုလန်ဟယ်။

နဲနဲကြာဘီးန နားမာရပ်နေဟူ လူလေဟ “နန်ဟာ မှန်ဘဲ သူးနို့ထဲဟု တယော့-က်ဖြစ်ဟယ်။ ဖြားဖြစ်ကြောန့်နူးဆို ဟာ နန်ဟုလည်း ဂါလိလဲပြည်သား တယော့-က်ဖြစ်ဟယ်” ဆိုဘီး သူးနို့ဟု ပေတရုဟို စွပ်စွဲဂေဟယ်။

⁷¹ အယ်ဆိုန ပေတရုဟ “ငါဟာ မှန်တိုင်း ပြောနေဟယ် ဆိုဇာဟို ငါကီရဲဟယ်။”

⁷² ရှစ်ရှင်းဘဲ ဒုတိယခါ ကြစ်တွန်လေဟယ်။ အယ်ဆိုန “နန်ဟာ ငါဟို သိဟု ဆိုဘီး သောင်းခါ ငြင်းလေ့မယ်” ဆိုဘီး ယေရှုပြောဟားဟူ စကားဟို ပေတရုဟာ ဒီရဟားဟယ်။ အယ်ဆိုန သူဟာ ရရာတိုင်း ငိုလေဟယ်။

15

ယေရှုဟို ပိလတ်ရှေ့ဟို ခေါ်ဆောန်ဟားဟူကြောန်း
(မဿဲ ၂၇.၁,၂,၁၁-၁၄; လုကာ ၂၃.၁-၅; ယောဟန် ၁၈.၂၈-၃၈)

¹ မိုးလန်းစောစောမာ ယဇ်ပုရောဟိတ်ဂီးလေဟာ ကျမ်းတတ်ဆရာလေ၊ သတ်ဂီးဝါဂီးလေန တရားလွှတ်တော်တခုလောင်းန မြန်းမြန်ဟား တို့ဂေဘီးဟာ ဆောင်းဖြတ်ဂေဟယ်။ သူးနို့ဟာ ယေရှုဟို တောက်ဂေ

ဘီး ခေါ်ဆောင့်ဟူးဟယ်။ အယ်ဘီးဟာ ပိလတ်မန်းဟို အပ်လိုက်ဂေဟယ်။

² ပိလတ်မန်းဟ “နန်ဟာ ယုဒလူမျိုးလေရဲ့ မန်းဂီးလော” ဆိုဘီး ယေရှုဟို မေးလေဟယ်။

ယေရှုဟ “မန်းဂီးပြောတိုင်းဘဲ” ဆိုဘီး ပုလန်ဖြေလေဟယ်။

³ ယဇ်ပုရောဟိတ်ဂီးလေဟာ ယေရှုဟို မျိုးမျိုးဘဲ စွပ်စွဲဂေဟယ်။

⁴ အယ်ကြောန့် ပိလတ်မန်းဟာ ယေရှုဟို “နန်ဟာ ဖြားလည်းဖြေဘိလော။ သူးနှိလေ ဂူလောင်းရဲ့ စွပ်စွဲချစ်လေဟို နားထောန်ကေ့!” ဆိုဘီး ထပ်ဘီးမေးလေဟယ်။

⁵ အယ်ဘေမဲ့ ယေရှုဟာ ခွန်းလည်း ပုလန်ပြောဘဲန အယ်တိုင်းဘဲ နေလေဟယ်။ အယ်ဆိုန ပိလတ်မန်းဟာ အံ့ဩဟူးလေဟယ်။

ယေရှုဟို သေဒန်ခလလိုက်ဟူကြောင်း

(မသဲ ၂၇:၁၅-၂၆; လုကာ ၂၃:၁၃-၂၅; ယောဟန် ၁၈:၃၉-၁၉.၁၆)

⁶ ပသခါပွဲတိုင်းမာ ပိလတ်မန်းဟာ ပြည်သူလေ တောန်းဟူ ထောန်သားတယော့-က်ဟို လွတ်ပေးဟူ ထောင်းဇ်ရှိဟယ်။

⁷ အယ်ခီမာ ဆူပူအံ့ကြွမှုမာ လူသတ်မှု ကျူးလွန်ဟူ ပေါင်ကန်သူလေနတူးဒု ဗာရဗုဗ နာမယ်ရှိဟူ လူတယော့-က်ဟာ ထောန်ကုလနေဟယ်။

8 လူအောက်ဂီးဟာ ပိလတ်မန်းနားဟို့ စုဝီးလာဘီး လောက်လေ့ရှိဟူတိုင်း သူးနို့ဟို့ လောက်ဆောန်ပေးဟို့ ပိလတ်မန်းဟို့ တောန်းဆိုဂေဟယ်။

9 ပိလတ်မန်းဟာ “နန်းနို့ဟာ ယုဒလူမျိုးရဲ့ မန်းဂီးဟို့ လွတ်ပေးစေရှင်ဟယ်လော” ဆိုဘီး သူးနို့ဟို့ မေးလေဟယ်။

10 ယဇ်ပုရောဟိတ်ဂီးလေဟာ ယေရှုဟို့ နာလိုဘဲဟူ ကြောန့် အပ်ဟယ်ဆိုဇာ ပိလတ်မန်းဟာ သိဟူကြောန့် ဖြစ်ဟယ်။

11 အယ်ဘေမဲ့ ယဇ်ပုရောဟိတ်ဂီးလေဟာ ဗာရဗုဗဟို့ ဘဲ လွတ်ပေးဟို့တွပ် ပိလတ်မန်းနားမာ တောန်းဆိုဟို့ လူအောက်ဂီးဟို့ နှိမ့်ဆော်ဂေဟယ်။

12 ပိလတ်မန်းဟာ “ယုဒလူမျိုးရဲ့ မန်းဂီး ဆိုဘီး နန်းနို့ ခေါ်ဟူ လူဟို့ ငါဖယ်မျိုးလောက်ရဟို့နူး” ဆိုဘီး လူအောက်ဂီးဟို့ ထပ်မေးလေဟယ်။

13 အယ်လူလေဟာ “သူဟို့ ကားစင်တန်ပါ!” ဆိုဘီး အော်ဂေဟယ်။

14 ပိလတ်မန်းဟာ “ဖြားဖြစ်ကြောန့်နူး။ အယ်လူဟာ ဖြား ပြစ်မှုဟို့ ကျူးလွန်ဟားနူး” ဆိုဘီး မေးလေဟယ်။

လူလေ ဂူလောင်းဟာ “သူဟို့ ကားစင်တန်ပါ!” ဆိုဘီး ပိုဘီး ဟာ ကုလယ်ဟီးအော်ဂေဟယ်။

15 ပိလတ်ဟာ လူအောက်ဂီးဟို့ ကျေနပ်စေရှင်ဟယ်။ အယ်ကြောန့် သူးနို့တွပ် ဗာရဗုဗဟို့ လွတ်ပေးလိုက်ဟယ်။

အယ်ဘီးန သူဟာ ယေရှုဟို ကျာပွတ်န ရိုက်စေဘီးဟာ
ကားစင်တန်ဟို့တွပ် အပ်လေဟယ်။

စစ်သားလေဟာ ယေရှုဟို ရယ်ဇားဟူကြောင်း
(မဿဲ ၂၇.၂၇-၃၁; ယောဟန် ၁၉.၂-၃)

¹⁶ စစ်သားလေဟာ ယေရှုဟို မြို့ဝန်မန်းရဲ့ အိခြိဝမ်းထဲ
ဟို့ ခေါ်ဆောန်ဟားဘီး တပ်ဖွဲ့တဖွဲ့လောင်းဟို့ စုခိုင်းလိုက်
ဟယ်။

¹⁷ သူးနို့ဟာ ယေရှုဟို ခရမ်းရောန် ဝတ်လောင်ဟို့ ဝတ်
ပေးလိုက်ဟယ်။ အယ်ဘီးန ဆူးခတ်လေဟို့ သရဖူဖြစ်
ရစ်လောက်ဘီး ကိုယ်တော့်ဟို့ ဆောင်းပေးလိုက်ဟယ်။

¹⁸ အယ်ဘီးန ကိုယ်တော့်ဟို့ “ယုဒလူမျိုးရဲ့ မန်းဂီး
သတ်တော်ရှယ်ပါစေ!” ဆိုဘီး စဘီး နှောက်ဆစ်ဂေဟ
ယ်။

¹⁹ သူးနို့ဟာ ကိုယ်တော်ရဲ့ ခေါင်းဟို့ ကျူဒေါက်န ရိုက်
ဂေဟယ်။ ကိုယ်တော့်ဟို့လည်း ထိုးရယ်န ထိုးဂေဟယ်။
သူးနို့ရဲ့ ဒူးဟို့ ထော့-က်ဘီးဟာ ကိုယ်တော့်ဟို့ ရှိခိုးဂေဟ
ယ်။

²⁰ သူးနို့ဟာ ကိုယ်တော့်ဟို့ ရယ်ဇားဂေဘီးဟာ သူးနို့ဟ
ခရမ်းရောန် ဝတ်လောင်ဟို့ ခလွတ်ဘီးဟာ ကိုယ်တော်ရဲ့
ဝတ်ဟို့ ပုလန်ဝတ်ပေးဂေဟယ်။ အယ်ဘီးန သူးနို့ဟာ
လတ်ဝါးကပ်တိုင်ထတ်မာ သတ်ဟို့တွပ် ကိုယ်တော့်ဟို့
ခေါ်ဟားဂေဟယ်။

ယေရှုဟို ကားစင်တန်ဘီး သတ်ဟူကြောန်း
(မသေ ၂၇:၃၂-၄၄; လုကာ ၂၃:၂၆-၄၃; ယောဟန်
၁၉:၁၇-၂၇)

²¹ သူးနှိဟာ တောဝါဟုနေ မြို့ဟိုတတ်လာဟူ ရှိမုန်နာ
မယ်ရှိဟူ လူတယော့-က်ဟို လမ်းမာ တွဲလေဟယ်။ အယ်
ဆိုန စစ်သားလေဟာ ယေရှုရဲ့ လတ်ဝါးကပ်တိုင်ဟို သူဟို
တန်ဘီးထမ်းခိုင်းလေဟယ်။ (ရှိမုန်ဟာ ကုရေနေမြို့သား
ဖြစ်ဘီး အာလေဇနဒြန် ရှဖရဲ့ ဖလည်း ဖြစ်ဟယ်။)

²² သူးနှိဟာ ယေရှုဟို ဂေါလဂေါသ ဆိုဘီး ခေါ်ဟူ နေ
ရာဟို ခေါ်ဆောန်ဟားဂေဟယ်။ ဂေါလဂေါသရဲ့ ဓိပါယ်
ဟု “ဦးခေါန်းခွဲနေရာ” ဖြစ်ဟယ်။

²³ အယ်နေရာမာ သူးနှိဟာ ကိုယ်တော့ဟို မုရန် ဆိုဘီး
ခေါ်ဟူ ဆေးန ရောဟားဟူ ဝိုင်ဟို တိုက်ဟို ကြိုးစားဂေ
ဟယ်။ အယ်ဘေမဲ့ ယေရှုဟု သော့-က်ဟု။

²⁴ အယ်ဘီးန သူးနှိဟာ ကိုယ်တော့ဟို ကားစင်တန်
ဘီး သတ်ဂေဘီးဟာ ဝတ်ရဲ့ ဖြားပိုင်းဟို ဖယ်လူဟုရဟု
ယ် ဆိုဇာဟို မြင်ဟိုတွပ် မဲနှိုက်ဘီး သူးနှိရှင်းရှင်းထဲမာ
ကိုယ်တော်ရဲ့ ဝတ်ဟို ခွဲဝီဂေဟယ်။

²⁵ သူးနှိဟာ ကိုယ်တော့ဟို ကားစင်တန်ဘီး သတ်ဟူ ခီ
ဟာ မိုးလန်း ကိုးနာရီ ဖြစ်ဟယ်။

²⁶ ကိုယ်တော့ဟို ဆန့်ကျင်ဘီး စွတ်စွဲချစ်ဟို ရေးဟား
ဟူစာမာ “ယုဒမန်းဂီး” ဆိုဘီး ဖြစ်ဟယ်။

27 သူ့နှို့ဟာ ယေရှုနတ်တူးဒု မှလန့်ယော့-က်ဟိုလည်း ဘယ်ဖတ်မာ တယော့-က် ညာဖတ်မာ တယော့-က် ထား ဘီးဟာ ကားစင်တန်ဂေဟယ်။

28 *

29 ဖြတ်သွားဖြတ်လာလောက်နေဟူ လူလေဟာ ခေါင်း ခါဘီးဟာ ယေရှုဟို ကဲ့ရဲ့လိုက်ဇာဟု “ဟင်! ဗိမာန်တော် ဟိုဖြိုခွလဘီး သောင်းရစ်ထဲမာ ပုလန်ဆော့-က်ဟိုလူ!

30 ခု လတ်ဝါးကပ်တိုင်ဟုနေ ဆင်းလာဘီးဟာ နန်းကိုယ် နန် ကယ်တန်ပါ!”

31 အယ်မျိုးဘွဲ ယဇ်ပုရောဟိတ်ဂီးလေန ကျမ်းတတ် ဆရာလေဟာ ယေရှုဟို ရယ်ဇားဂေဘီး၊ ယော့-က်န ယော့-က်ပြောနေဇာဟု “အယ်လူဟာ တခြားလူလေဟို ကယ်ဟယ်။ အယ်ဘေမဲ့ သူ့ကိုယ်သူလော ကယ်နိုင်ဟု မား!

32 ဣသရေလမန်းဂီး၊ ကယ်တန်ရှင် ခရစ်တော်ဟာ ခု ဘွဲ လတ်ဝါးကပ်တိုင်ဟုနေ ဆင်းလာဇာဟို နို့လေမြင်ရ မယ် ဆိုဟာ နို့လေဟု ယောင်ကြည်မယ်!”

အယ်ဘီးဟာ ယေရှုနတ်တူးဒု ကားစင်တန်ဘီး သတ်ခံရ ဟူ လူန့်ယော့-က်ဟိုလည်း ယေရှုဟို ရယ်ဇားဂေဟယ်။

* 15:28 ၁၅.၂၈ တချို့ မူရင်းလတ်ရေးမူလေမာ ခန်းငယ် ၂၈ ဟို၊ အယ်နည်းလမ်းဟာ ကျမ်းစာစစ်မှန် ဖြစ်လာမယ် ဆိုဘီး ပြောဟားဇာဟု “ကိုယ်တော်ဟာ ရာဇဝတ်ကောန်လေရဲ့ စာရင်းထဲမာ ပါဝမ်ဟားလေဟယ်၊” ဆိုဘီး ထပ်ပေါင်းထဲဟားဟယ် (ရှု လု ၂၂.၃၇)။ 15:29 ၁၅.၂၉ မာ ၁၄.၅၈; ယော ၂.၁၉

ယေရှုရဲ့ သေဆောင်းမှုကြောန်း
(မသံ ၂၇.၄၅-၅၆; လုကာ ၂၃.၄၄-၄၉; ယောဟန်
၁၉.၂၈-၃၀)

³³ မွန်းဒဲ့ခီမာ တနိုင်ငံလောင်းဟာ မှော်န့်ကုလဟားဘီး၊
အယ်ဇာဟာ သောင်းနာရီကြာလေဟယ်။

³⁴ နေဒန်သောင်းနာရီမာ ယေရှုဟာ “ဧလိ၊ ဧလိ၊ လာမ
ရှာဗခသနီ” ဆိုဘီး သံကုလယ်ဂီးန အော်လိုက်ဟယ်။
အယ်ဗိပါယ်ဟု “ကျွန်တော့် ဘုရားသခင်၊ ကျွန်တော့်
ဘုရားသခင် ဖြားဖြစ်ကြောန့် ကျွန်တော့်ဟို့ စွန့်ပစ်နူး” ဆို
ဘီး ဖြစ်လေဟယ်။

³⁵ နားမာရပ်နေဟူ လူတချို့ဟာ အယ်စကားဟို့ ကြား
ဟူ ခီမာ သူးနို့ဟု “နားထောန်ကော့။ သူဟာ ဧလိယဟို့ ခေါ်
နေဟယ်!” ဆိုဘီး ပြောဂေဟယ်။

³⁶ သူးနို့ထဲဟု တယော့-က်ဟာ ဝိုင်ရှင်ထဲမာ နှစ်ဟားဟူ
ရေမှလောက်န ပုလေးလာဟယ်။ အယ်ဘီးဟာ အယ်ဇာ
ဟို့ ကျူဒေါက်ဖျားမာ တတ်လေဟယ်။ အယ်ဘီးန သူဟာ
ယေရှုရဲ့ ဇတ်ပေါ့-က်မာ ထားပေးလိုက်ဘီးဟာ “စောန့်ပါ
အူး! ဧလိယဟာ သူ့ဟို့ လတ်ဝါးကပ်တိုင်ဟုနေ အော့-က်
ဟို့ ယူဒလဟို့တွပ် လာနေဟယ် ဆိုဇာဟို့ နို့လေကော့ကော့
ဇို!” ဆိုဘီး ပြောဟယ်။

³⁷ သံကုလယ်ဂီး အော်ဘီးန ယေရှုဟာ သတ်ချောက်
တော်မူလေဟယ်။

38 ဗိမာန်တော်ရဲ့ လိုက်ကာဟာ ထတ်ဟုနေအော့-က်ထံ
နေ့ခြမ်းကွဲဟွားဟယ်။

39 လတ်ဝါးကပ်တိုင်ရှေ့မာ ရပ်နေဟူ တပ်မှူးဟာ ယေရှု
ဖယ်မျိုးသေဟွားဟယ်[†]ဆိုဇာဟို့ မြင်ဟွားဟယ် “အယ်လူ
ဟာ မှန်ဘဲ ဘုရားသခင်ရဲ့ သားတော်ဖြစ်ဟယ်!” ဆိုဘီး
ပြောလေဟယ်။

40 အယ်နေရာမာ ရှိနေဟူ မီးမတချို့ဟာ ဝီးဟုနေဘီး
ကော့နေဂေဟယ်။ အယ်မီးမလေထဲမာ မာဂဒလမြို့သူ မာ
ရိ၊ ယာကုပ်ငယ်န ယောသေလေရဲ့မိဖြစ်ဟူ မာရိန ရှာလုံ
လေ ရှိနေဟယ်။

41 ယေရှုဟာ ဂါလိလဲနယ်မာ ရှိနေဒူးဟု၊ သူးနို့ဟာ ကို
ယ်တော့နော့-က်ဟို့ လိုက်ဘီး လောက်ကျေး ပြုစုဂေဟ
ယ်။ အယ်နေရာမာ ကိုယ်တော်နတူးဒူ ယေရုရှလင်မြို့ဟို့
လိုက်လာဟူ တခြားမီးမလေလည်း ဘောင်ဂီးရှိနေဂေဟ
ယ်။

ယေရှုဟို့ သင်္ဂြိုဟ်ဟူကြောန်း

(မသံ ၂၃.၅၇-၆၁; လုကာ ၂၃.၅၀-၅၆; ယောဟန်
၁၉.၃၈-၄၂)

42 အယ်နေဟာ ဖိနေ့ဖြစ်ဟယ် (အယ်နေဟာ ဒန်းနေ့တိုင်
ခန်နေ့ဖြစ်ဟယ်)။ အယ်ကြောန့် နေဒန်ဇာရော့-က်လာဟူ
ခီမာ

[†] 15:39 **၁၅:၃၉** သေဟွားဟယ်၊ တချို့ မူရင်းလတ်ရေးမူလမာ
အော်ဘီးဟာ သေဟွားဟယ်၊ ဆိုဘီး ပါရှိဟယ်။ 15:40 **၁၅:၄၀,၄၁** လု
ဇ.၂.၃

43 တရားလွတ်တော်ရဲ့ လေးစားခံရဟူ ဖွဲ့ဝမ်တယော့-က်ဖြစ်ဘီး ဘုရားသခင်ရဲ့ နိုင်ငံတော်ဟို့ စောင့်မျှော်နေဟူ အရိမသဲမြို့သား ယောသပ်ဟာ ယေရှုရဲ့လောင်းဟို့ တောင်းဟို့တွပ် ပိလတ်နားဟို့ ရဲရဲတန်းတန်းဟားဘဲ့ ဝမ်းဟားလေဟယ်။

44 ပိလတ်ဟာ ယေရှုသေဟားဘီး ဆိုဇာဟို့ ကြားဟူ ခီမာ အံ့ဩဟားလေဟယ်။ သူဟာ တပ်မှူးဟို့ ခေါ်လိုက်ဘီး ယေရှုသေဟားဇာ ဖယ်မျှကြာဟားဘီ ဆိုဘီး မေးလေဟယ်။

45 သေဟားဘီ ဆိုဘီး တပ်မှူးရဲ့စီရင်ခံဇာဟို့ ကြားရဟူ ခီမာ ပိလတ်ဟာ ယောသပ်ဟို့ လောင်းဟို့ပေးလိုက်ဟယ်။

46 အယ်ကြောန် ယောသပ်ဟာ ပိဖုလူဟို့ ဝယ်ဘီး၊ လောင်းဟို့ ယူခလဘီး ပိဖုလူန ပတ်လေဟယ်။ အယ်ဘီးဟာ ကုလော့-က်ဆောန်ဟို့ ထွမ်းဟားဟူ သန်းခလိုင်ဂူထဲမာ လောင်းဟို့ ထားဟားလေဟယ်။ အယ်ဘီးန သူဟာ သန်းခလိုင်ဂူဝဟို့ ကုလော့-က်တောင်းဂီးန ပိဟားလိုက်ဟယ်။

47 မာဂဒလမြို့သူ မာရိန ယောသေရဲ့မိ မာရိဟာ စောန့်ကေနေဂေဘီး ယေရှုရဲ့လောင်းထားဟားဟူ နေရာဟို့ တွဲမြင်ဂေဟယ်။

16

ရှင်ပုလန်ထမြော့-က်ဟူကြောန်း

(မသဲ ၂၈.၁-၈; လုကာ ၂၄.၁-၁၂; ယောဟန် ၂၀.၁-၁၀)

¹ ဒန်းနေလွန်ဘီးန မာဂဒလမြို့သူ မာရိ၊ ယာကုပ်ရဲ့မိမာရိန ရှာလုံဟာ ယေရှုရဲ့လောင်းတို့ လူးပေးတို့တွပ် နံ့သာလေတို့ ဝယ်ယူဂေဟယ်။

² နန်းနွေနေ့ မိုးလန်းစောစော နေထွပ်ခီမာ သူးနို့ဟာ သန်းခလိုင်တို့ သွားဂေဟယ်။

³ သူးနို့ဟာ “သန်းခလိုင်ရဲ့ ဂူဝဟနေ ကုလော့-က်တောင်းတို့ ဖယ်သူဟာ တွန်းဖယ်ပေးတို့နူး” ဆိုဘီး ယော့-က်နယော့-က် မေးနေဂေဟယ်။

⁴ အယ်ဘေမဲ့ သူးနို့ဟာ ကေ့လိုက်ဟူ ခီမာ ရရာတိုင်းကီးဟူ အယ်ကုလော့-က်တောင်းတို့ တွန်းဖယ်ဟူးဘီးသား ဖြစ်နေဇာတို့ သူးနို့ဟာ တို့ဟူးဂေဟယ်။

⁵ အယ်ကြောန့် သူးနို့ဟာ သန်းခလိုင်ထဲတို့ ဝမ်ဟူးဘီး အယ်နေရာမာ ဝတ်လောင်ဖုလူ ဝတ်ဟူးဟူ လူငယ်တယော့-က်ဟာ ညာဖတ်မာ ထိုင်နေဇာတို့ မြင်ဟူးလေဟယ်။ အယ်န သူးနို့ဟာ ထိလန်ဟူးဂေဟယ်။

⁶ အယ်လူဟာ “လန်ဂေ့န။ နန်းနို့ဟာ ကားစင်တန်ခံရဟူ နာဇရက်မြို့သားယေရှုတို့ ရှာနေဟယ် ဆိုဇာတို့ ငါသိဟယ်။ ကိုယ်တော်ဟာ အယ်နေရာမာ မေ့ဟုမ်း ကိုယ်တော်ဟာ ထမြော့-က်ဟူးဘီး! ကေ့ကေ့၊ အယ်နေရာဟာ ကိုယ်တော်တို့ ထားဟူနေရာဖြစ်ဟယ်။

⁷ နန်းနို့ဟာ ပေတရုန တခြားတမဲ့တော်လေနားတို့ သွားဘီးဟာ ‘ကိုယ်တော်ဟာ ဂါလိလဲပြည်တို့ ရင်ဦးဆောင်း

သွားမယ်။ နန်းနို့ဟို ကိုယ်တော် ပြောဟူးဟူ တိုင်းဘဲ အယ်နေရာမာ နန်းနို့ဟာ ကိုယ်တော့်ဟို တွဲရလေ့မယ် ဆိုဘီး ပြောဂေ့ပါ။”

⁸ အယ်ကြောန့် မီးမဂီးလေဟာ စိုးရိမ်ထိလန့်ဘီး သန်းခဲ လိုင်းဟုနေ ထွပ်လာဘီး ပုလေးဟူးဂေ့ဟယ်။ သူးနို့ဟာ ကြော-က်နေဂေ့ကြောန့် ဖယ်သူဟိုလည်း ပြားလည်းပြောဂေ့ဟုံ။

ဒန်းကောန်း နည်းဟောင်းဆောင်းသတ်တမျိုး*

ယေရှုဟာ မာဂဒလမြို့သူ မာရီဟို ကိုယ်ထန်ရှားပြဟူ ကြောန်း

(မဿဲ ၂၈.၉-၁၀; ယောဟန် ၂၀.၁၁-၁၈)

[
⁹ ယေရှုဟာ နန်းနွေနေ့ မိုးလန်းစောစောမာ သေရာဟုနေ ထမြော-က်ဘီးန၊ ကိုယ်တော်ဟာ နတ်ဆိုးခွန်နစ်ကောန် ထွပ်ဟူးဟူ မာဂဒလမြို့သူ မာရီဟို ရင်ဦးဆောင်း ကိုယ် ထန်ရှားပြဟယ်။

¹⁰ သူဟာ ကိုယ်တော်ရဲ့ ပေါန်းဖော်လေနားဟို သွားဘီး ပြောလေဟယ်။ သူးနို့ဟာ မြည်တမ်း ငိုကြွေးဘီး

¹¹ အယ်ဘီးဟာ ယေရှုဟာ သတ်ရှင်နေဟယ် ဆိုဇာန သူဟာ ကိုယ်တော့်ဟို တွဲလိုက်ဟယ် ဆိုဘီး သူ့ရဲ့ ပြောဟူ

* 16:8 ၁၆.၈ တချို့ မူရင်းလတ်ရေးမူလေန ရှေးဟောင်း ဘာသာပြန်လေမာ ဒန်းကောန်းဟို အယ်မျိုး ဆောင်းသတ်ဇာ မွေဟု (ခန်းငယ် ၉-၂၀)။

စကားဟို သူးနို့ကြားလိုက်ဟူ ခီမာ သူးနို့ဟာ သူ့ဟို ယောင်
ကြည်ဂေဟူ။

ယေရှုဟာ တဗွဲတော်နေ့ပါးဟို ကိုယ်ထန်ရှားပြဟူ
ကြောန်း

(လုကာ ၂၄.၁၃-၃၅)

¹² အယ်ဘီးန သူးနို့ထဲဟု နေ့ယော့-က်ဟာ တောဝါဟို
လမ်းရှော့-က်သွားနေဒူးမာ ယေရှုဟာ ခြားနားဟူ ပေါင်စံ
န သူးနို့ဟို ကိုယ်ထန်ရှားပြဟယ်။

¹³ သူးနို့ဟာ တခြားလူလေနားဟို ပုလန်ဟားဘီးဟာ
ပြောပြလေဟယ်။ အယ်ဘေမဲ့ အယ်ဒန်းဟို သူးနို့ဟာ
ယောင်ကြည်ဂေဟူ။

ယေရှုဟာ တဗွဲတော်ဆယ့်တပါးဟို ကိုယ်ထန်ရှားပြ
ဟူကြောန်း

(မဿဲ ၂၈.၁၆-၂၀; လုကာ ၂၄.၃၆-၄၉; ယောဟန်
၂၀.၁၉-၂၃; တမန်တော် ၁.၆-၈)

¹⁴ အယ်ဘီးန တဗွဲတော်ဆယ့်တပါး စားသော့-က်နေ
ဟူ ခီမာ ယေရှုဟာ သူးနို့ဟို ကိုယ်ထန်ရှားပြလေဟယ်။
သူးနို့ဟာ ယောင်ကြည်ဘဲန စိန်လောင်းမာကျောနေဘီး
ကိုယ်တော် ထမြော့-က်ဘီးန ကိုယ်တော့်ဟို တွံရဟူ လူ
လေရဲ့စကားဟို ယောင်ကြည်ဘဲဟူကြောန်း ယေရှုဟာ သူး
နို့ဟို ဆောင်းမလေဟယ်။

¹⁵ ကိုယ်တော်ဟု သူးနို့ဟို “တကမ္ဘာလောင်းဟို ပုလုံနို့

အောန်သွားဘီး လူတိုင်းဟို့ ဒန်းကောန်း ဟောပြောဂေ။

16 ယောင်ကြည်ဘီး ဗတုတိဇံခံဟူလူ မှန်မျှဟာ ကယ်
တန်ခံရလေ့မယ်၊ ယောင်ကြည်ဘဲဟူ လူမှန်မျှဟာ ပြစ်
စီရင်ခံရလေ့မယ်။

17 ယောင်ကြည်သူလေဟာ နိမိတ်လတ်ခဏာလေ ပြဟို့
တွပ် တဂိုးဟို့ ပေးအပ်ခံရလေ့မယ်၊ သူးနို့ဟာ ငါနာမဟို့
အားကိုးဘီး နတ်ဆိုးလေဟို့ နှိပ်ထုဂေလေ့မယ်၊ သူးနို့ဟာ
ထူးဆန်းဟူ ဘာသာစကားလေဟို့ ပြောဂေလေ့မယ်၊

18 သူးနို့ဟာ ဗီလေဟို့ ကိုင်ဂေလေ့မယ်။ သေစေတတ်
ဟူ ဖြားမျိုးဆီလေဘဲဖြစ်ဖြစ် သော့-က်မယ် ဆိုဟာ ဥပါဒ်
ဖြစ်ဟူ။ ကျန်းမာဘဲဟူ လူနာလေထတ်မာ လတ်တန်ဟူ ခီ
မာ လူနာလေဟာ ကျန်းမာဟွားလေ့မယ်” ဆိုဘီး မိန့်တော်
မူလေဟယ်။

ယေရှုဟာ ကောန်းဂန်ဟို့ ယူဆောန်ခံရဟူကြောင်း
(လုကာ ၂၄.၅၀-၅၃; တမန်တော် ၁.၉-၁၁)

19 သခင်ယေရှုဟာ သူးနို့န စကားပြောဘီးန ကောန်းဂန်
ဘောင်ဟို့ ယူဆောန်ခံရဘီးဟာ ဘုရားသခင်ရဲ့ ညာဖတ်
မာ ထိုင်နေလေဟယ်။

20 တဗွဲတော်လေဟာ နေရာရှိမျှဟို့ သွားဘီးဟာ ဟော
ပြောဂေဟယ်။ အယ်ဘီးဟာ သခင်ဘုရားဟာ သူးနို့လေ
နတူးဒူ လောက်ဆောန်နေဘီး အယ်မျိုးလောက်ဆောန်ဟူ

နိမိတ်လတ်ခဏာလေအားဖြင့် သူးနှိရဲ့ တရားဟောချစ်
ဟာ မှန်ဟယ် ဆိုဇာဟို့ သတ်သေပြလေဟယ်။]

တခြားကျမ်းဟောင်းဆောင်းသတ်†

[
21 မီးမဂီးလေဟာ ပေတရုန သူငယ်ဂျင်းလေနားဟို့
သွားဂေ့ဘီး၊ သူးနှိကြားရဟူ ဒန်းလေဟို့ ပုလန်ဘီးပြော
ဂေ့ဟယ်။

22 အယ်ဘီးန ယေရှုကိုယ်တိုင်ဟာ သူတမဲ့တော်လေဟို့
ထာဝရကယ်တန်ဇာ ဒန်းစကားဟို့ ပြောဟို့တွပ် ရှေ့ဟုနေ
နော့-က်ဟို့ လွတ်လိုက်ဟယ်။]

† 16:20 ၁၆.၂၀ တချို့ မူရင်းလတ်ရေးမူလေန ရှေးဟောင်း
ဘာသာပြန်လေမာ အယ်မျိုးတိုးတိုဟား ဆောင်းသတ်ဟားဟူ ဒန်းကောန်မာ
ပိုဘီး ရှယ်ဟူ ဆောင်းသတ်ဟို့ ထပ်ပေါင်းထဲဟားဇာလေ ရှိလေဟယ်
(ခန်းငယ် ၉-၂၀)။

ဓမ္မသစ်ကျမ်း ထားဝယ်ဘာသာစကား
The Holy Bible in the Tavoyan language of
Myanmar: ဓမ္မသစ်ကျမ်း ထားဝယ်ဘာသာစကား

copyright © 2024 The Word for the World International

Language: (Tavoyan)

Contributor: The Word for the World International

ထားဝယ် ဓမ္မသစ်ကျမ်း

The New Testament in Dawei Language

The Word for the World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

0c63f106-1001-58e4-ad11-6f62c327c4e1